

**NATIONAL ASSEMBLY OF
SEYCHELLES**

Wednesday 13th June 2023

The Assembly met at 0902am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Nou zofisye Lasanble; manm piblik ki a lekout. Byenveni pou nou travay lasemenn. Mersi pou zwenn nou zot tou ankor enn fwa. Madanm Clerk nou annan prezantasyon dokiman.

MADAME CLERK

Mersi Mr Speaker. Bonzour Mr Speaker, bonzour tou bann Manm, tou bann *staff* Lasanble e osi dimoun ki pe ekout nou. Bann papye ki pe ganny prezante I;

S.I. 42 of 2023 Pride of the Republic of Seychelles Award Order, 2023.

S.I.43 of 2023- Public Enterprises Act (Commencement) Notice, 2023.

S.I. 44 of 2023 Customs Management (Amendment) Regulations, 2023.

*Financial Intelligence Unit (FIU) – Annual Report for the Year 2022
Seychelles Pension Fund – Annual Report 2022.*

Mersi Mr Speaker.

MR SPEAKER

Mersi Madanm Clerk. Lo nou *Order Paper* nou prosede avek *Private Notice Question*, madanm raporter mon a demann ou apel Minis e son delegasyon.

Bon, bonzour e byenveni Minis pou Zafer Entern Mr Errol Fonseka e ansanm avek Minis bann zofisye Mr Ted Barbe, *Commissioner of Police*; Mr Francis Songoire, *Deputy Commissioner of Police*. Mr Antoine Denousse, *Assistant Commissioner* e osi Mr Ned Wirtz, *Assistant Commissioner of Police* e mon a note ki Mr Francis Songoire i a kote lo latab.

Bon, mersi Minis ek ou delegasyon pou zwenn nou pou *Private Notice Question*. Mon ava prezan apel *Leader* Lopozisyon pou poz son kestyon silvouple.

HON SEBASTIEN PILLAY

Mersi Mr Speaker. Bonzour Mr Speaker. Bonzour tou koleg Onorab. Bonzour Minis ek ou delegasyon. Bonzour tou bann profesyonnel Au Cap ki dan

Gallery, (mon krwar ou'n bliye Mr Speaker, ou pe al fer apre) e bonzour tou dimoun ki pe ekout nou, pe swiv nou ozordi bomaten.

Mon kestyon pou Minis i lir koumsa; Eski Minis pour Zafer Entern i kapab eksplike:

- a. Ki vre sityasyon kriminalite dan nou pei?
- b. Ki bann vre statistik lo lakantite ka krim ek drog ki lotorite in rikorde? E
- c. Eski sitwayen i ankor kapab fer konfyans lotorite apre ki menm drog ki'n ganny sezi par lotorite ti pe ganny vann lo bann *ghetto* e lezot landrwa?

Mersi Mr Speaker.

MR SPEAKER

Mersi. Mersi Minis. Avan mon pas Minis laparol les mon a dir labyenveni nou bann viziter ki dan Galeri. Eskiz mwan pou pa remark zot - vizyon i e pti pe difisil sa kote.

Minis ou repons silvouple.

MINISTER ERROL FONSEKA

Mersi Mr Speaker. Premyerman bonzour Mr Speaker. Bonzour *Leader of Government Business*, bonzour *Leader* Lopozisyon, tou Manm Onorab e tou dimoun a lekout e byensir nou bann

viziter an o. I gou pou vwar sa lentere lo sa kestyon ozordi.

Alor Mr Speaker e mersi pou sa loportinite e mersi Onorab pou ou kestyon.

Mr Speaker, nivo kriminalite dan nou pei i konsernan, me an menm tan sa Gouvernman i determinen pou adres sa sityasyon e parey zot in vwar nou pe fer en ta sikse.

Nivo krim ki nou pe eksperyanse dan nou zoli Sesel ti rezourd avek 2 koudpwen dan mon lepok ler mon ti zenn, i denozour ganny rezourd avek kouto e versman disan.

Nou vwar bann sityasyon ki'n arive dan serten *housing estate* kot dimoun pe bles kanmarad avek gran kouto e lezot zouti. Nou'n vwar sityasyon ki'n arive kot Bar Peser – (*by the way* in arete la en)? kot ankor dimoun in bles kanmarad, e nou'n demann nou lekor ki pe arive avek nou sosyete Kreol?

Ozordi nou vwar diferan nivo krim, nou vwar krim finansyel ki lye avek koripsyon, vyolans domestik, labi zanfan, *cybercrime*, *scam* ki pe arive partou. *Drug trafficking*, *human trafficking*, *transnational organize crime* ki met plis presyon lo lapolis e fer li pli difisil pou zot kapab partaz zot resours pou fer fas avek sa defi.

E dan tou sa kalite krim i annan son bout vyolans ladan. Me tou sa bann krim pa'n fek komans ozordi. Ozordi nou pe vwar li eklate e sa i pou 2 rezon prensipal. Nou pa'n adres sa bann sityasyon o moman ki ti pli fasil pou adres li.

E dezyenman pa bliye ki ti annan en letan kot en zofisye lapolis ouswa en zofisye larme ou en gro zofisye dan *civil service* ki'n fer en krim pa ti ganny en pinisyon legal parey nou pe fer ozordi.

Nou dan Gouvernman ozordi napa triyaz dan bal kafe, e nou pou kontinyen adres sa bann sityasyon ler i arive. Dan sa kantite louvraz ki lapolis i vwar li pe fer fas avek, i bezwen osi ogmant son kapasite pou kapab fer fas avek sa kantite e kalite krim ki pe arive.

E menm si zot kapab vwar sa kantite sikse ozordi pou anmenn dimoun Ankour e kondann zot i annan bokou travay pou fer. Akoz sa sanzman dan nivo krim e kalite krim i parey en nenport sanzman, e dan en nenport sanzman lavites sa sanzman i enportan pou *monitor*.

Akoz si sa sanzman i pli vit ki ou fason travay pou ou rezourd sa problem, ou pou bezwen met bokou plis zefor pou ou *regain the initiative*, pou

ou rebran sa linisyativ e sanmenm sa nou bi ozordi. Me nou bezwen realize ki sa i pran en pe letan.

Alors pour sa rezon, Lapolis pe re aziste son travay pou fer fas avek sa realite ozordi. Ki bann vre statistik lo lakantite ka krim ek drog ki Lotorite in rikorde? Mr Speaker, menm si mon pronons en konsern li sityasyon kriminalite dan pei, bann sif pa alarman.

An konparezon avek lannen pase i annan en rediksyon 2 poursan dan nivo krim an zeneral, menm si i annan en pti logmantasyon dan bann ka vol pou sa menm peryod lannen pase.

An 2022 ti annan 539 e sa lannen 555, en pti logmantasyon. Konsernan bann krim kont endividi atraver bann aksyon lapolis, sa bann ka in diminyen. Sa bann ka kot dimoun i fer agresyon kont kanmarad, lapolis atraver son bann *spot check* in sezi plizyer zouti ofansif parey kouto, kannif, baton *you name it*. Sa in en rezilta - nou'n vwar en rediksyon 9poursan dan sa bann ka.

Mr Speaker kot i konsern bann ka drog, statistik i montre ki Lapolis in fer gran progres dan sa laliny. Pour peryod Zanyve ziska Me, ti annan 137 ka

posesyon an 2022 e sa lannen i annan 379.

Pou lofans trafik drog lannen pase ti annan 4 ka, sa lannen nou annan rikord 17 ka ziske la.

E pou kiltivasyon lannen pase, ti annan zis 1 ka e sa lannen nou annan 19 ka.

An total sa lannen ziska Me, nou'n sezi anviron 620 kilo *Heroin*, 390 *crystal meth*, 2399 plan kanabis, 4 kilo kanabis e 1 kilo.2 *Cocaine*.

Alor Mr Speaker ler mon dir ki sityasyon kriminalite i konsernan, mon pa pe koz lo statistik, me plito konportman lazenes; dimoun dan bann *housing estate*, kalite vyolans ki nou pa ti annan dan lepase.

Nou pei pe sanze *for the worst* e nou bezwen plis zefor pou adres sa e nou bezwen fran ek sa konsern.

Eski sitwayen i kapab - i ankor kapab fer konfyans lotorite apre ki menm drog in ganny sezi par lotorite ti pe ganny vann lo *ghetto* e lezot landrwa? Sa i lot kestyon Onorab. Mr Speaker an relasyon avek sa drog ki ti pe ganny vann ou pran, sa ki mon kapab asir manm piblik, se ki atraver lenformasyon ki ti ganny resevwar, lotorite ti reazir vit e 4 zofisye e 2 sivilyen

ti ganny arete rimann e ganny large lo kondisyon.

Mr Speaker atraver sa aksyon, nouvo protokol in ganny etabli e nou pa ekspekte sa bann tel aksyon. Nou kapab osi dir manm piblik, ki nou'n rekipper mazorite sa bann sibstans. Avek sa, mon le konklir ki sa ka i ankor anba *investigation*, e nou pa kapab fer plis komanter lo la.

Alor, mon pa tro asire ki *ghetto* ki Onorab in vizite pou determinen ki sa menm drog i lo *ghetto*. Akoz en kilo ti ganny pran e 887.67 granm ti ganny rekipere; savedir 112.33granm ki nou'n perdi.

Wi, drog i sours bokou nou problemn Sesel, ki enkli logmantasyon nivo krim dan pei.

Bann manman, bann fanmir pe soufer. Lazenes sa pep pe soufer me zanfana sa bann gran *dealer* pe ganny sa bon ledikasyon, e li i pa ganny servi pou al distribye drog lo *scooter*. So, Seselwa ouver zot lizye, pa les zot ou zot piti ganny servi.

Dan sa gran konba Servis Prizon i zwe en gran rol kle, e pli ale lapolis pe atrap plis dimoun e sa i met bokou presyon lo sa servis. Prizon pe osi fer fas avek bokou defi tel ki telefonn, drog dan prizon, ki annan problemn

mantal e lezot maladi ki bezwen ganny swen nesaser.

E tan ki nou pa separ sa bann diferan kategori prizonnyen, nou pou toultan fer fas avek sa bann defi. Me nou deza annan en plan pou nou fer sa diferans ek nou *high security prison* ki pe vini, *hopefully* lot lannen in fini konplet.

Mon oule donn zot en pti pe *stats* menm si zot pa'n demann mwan lo *prison*, zis pou donn zot en apersi ki pe arive. Akoz ler zot fer zot louvraz isi i ariv laba.

Total population Q1 2022 - 310, 310.

Total population Q1 2023 - 362.

Sa i fer en poursantaz 16poursan *increase*. Ladan *the convict* ant 2022 ti 219 e Q1 2023 i 258; - en poursantaz 17 *increase*; 17 poursan.

Remand populations Q1 2022 - 91;

Remand population Q1 2023 -104.

Popilasyon *remand* in *increase* par 14poursan. E la an *June*, popilasyon rimann i 123. Mon krwar i annan en pe travay pe ganny fer, ou dakor ek sa? I annan travay pe ganny fer.

Offences; drug offences registered in Q1 2022 - 73 and

Q1 2023 - 103. Sa i en logmantasyon 41poursan.

Theft count registered in Q1 2022 i 62. E theft registered Q1 2023 i 81. Increase 31 percent.

Burglary; count ki'n rezistre Q1 2022 - 68.

Count 2023 Q1 - 76. Ogmantasyon 11poursan.

Frod count registered Q1 2022 - 14.

Fraud count registered Q1 2023 - 46. Increase 228 percent.

Sexual offences count registered Q1 2022 - 29.

Sexual offences; count registered Q1 2023 - 27. Increase 6 poursan.

Murder offences; count registered Q1 2022 ti 36.

Murder offences; count registered 2023 - 41. I 13 poursan increase.

So, ler ou get sa bann *increase*, zis pou *sum up*, poursantaz *drug offences* an totalite *from 2022/2023* i 41 poursan *increase*.

Theft - 31 percent;

Burglary - 11 percent,

Fraud - 228 percent,

Murder 13poursan e sexual offences 6poursan. Mon poz sa la.

Lo kestryon konfyans Mr Speaker, mon annan zis en larepons pou sa. Mr Speaker mon krwar Seselwa i vwar klerman ki kantite aktivite lapolis pe fer atraver sa bann sif

ki nou'n fek donnen. Konfyans sa Gouvernman i solid akòz? Akòz nou pran aksyon kont tou dimoun ki kas Lalwa e non pa zis serten. E finalman konfyans i vini, akòz nou onnet avek larealite.

Parey Prezidan in touzour onnet atraver son larepons ki konsern bann tel size. E ozordi tou dimoun i annan akse avek lenformasyon. Par ler zot met fo lenformasyon me selman zot annan akse.

E lo sa kestyon konfyans, ozordi i annan plis dimoun ki pe raport krim avek lapolis, kan lontan ti annan en mefyans - en mefyans avek piblik pou fer en rapor pangar zot ti ganny viktimize.

Finalman Mr Speaker, sa latas Lapolis i posibleman pli gro latas sa melanz kriminalite ki Lafors Lapolis in deza fer fas avek. E pou sa rezon Mr Speaker nou bezwen en zefor kolektif avek tou dimoun responsab e annou ankouraz nou bann zofisye, menm Onorab ki anmenn sa kestyon mon ti a kontan vwar li vin devan e felisit sa bann zofisye pou son travay. Kot i mal dir i mal, me kot i byen osi annou felisit sa louvraz ki pe ganny arive.

Mr Speaker, ozordi mon pran sa lokazyon pou remersye

manm piblik ki ed lapolis dan son travay, e la mon ti a kontan felisit bann *Neighborhood Watch*. Bann group parey Au Cap in fer, mon konnen La Misère zot so anler laba. Sa bann dimoun pe fer ki viv laba pou sa gran rol. E mon remersye zot pou sa gran rol atraver zot *Neighborhood Watch*. E nou ti a kontan ankouraz lezot distrik pou fer parey.

Nou defi *Law and Order* dan pei pa bon pou nou Lendistri Touris e nou lekonomi an zeneral, alors sa led ki nou gannyen avek manm piblik i tre enportan. Mersi ankor enn fwa a tou manm piblik lo zot kontribisyon.

Nou pou kontinyen travay for lo tou fron pou batay kont sa bann menas lo *border control*, lo *port*, *airport*, lo delo, patrol vizib lo teren, dan kominote e dan bann landrwa touristik. E si nou met tou nou zefor ansanm, nou pou reisi. Ankor enn fwa nou bezwen sa zefor kolektif.

Finalman Mr Speaker nou napa en lot swa, nou bezwen anmenn *Law and Order* dan nou pei, kot nou prop dimoun i kapab viv dan son lakaz. Kot nou prop dimoun i kapab mars okenn landrwa anpe e kot nou bann viziter i kapab zwir labote nou pei dan trankilite.

Mr Speaker, *Luanda* avek en popilasyon 13milyon.8 ek en pep ki ti tre popilarize, zot in fer li. Nou osi avek ni 1 pousan zot popilasyon nou pa pou kapab? Wi nou kapab e wi nou pou fer li. Mersi Mr Speaker.

(APPLAUSE)

MR SPEAKER

Mersi Minis. Mon a pran kestyon. Mersi-mersi pou gard lord. Nou a pran kestyon siplemanter bann Manm, mon fer zot rapel parey labitid ki nou pou termin sa *PNQ* sesyon *PNQ* 10er.

Donk, zot bezwen bref dan zot kestyon e limit 2 kestyon silvouple. Mon ti a prefere 1, me 2 maksimonm. E nou a sey pran otan kestyon ki posibil ki letan i permet nou. Onorab Lemiel ou kestyon.

HON SYLVANNE LEMIEL

Mersi Mr Speaker. Bonzour Mr Speaker, tou mon bann koleg Manm Onorab, Minis avek ou delegasyon bonzour e tou dimoun ki a lekout.

Mr Speaker mon pe vwar, premyerman enn, mon ti a kontan felisit bann zofisye lapolis ki pe vreman travay dan lentere pep Seselwa e ki pe vreman travay pou zot fer sir ki kriminalite dan Sesel i a bese, e

mon konnen ki nou pa pou kapab rezourd tou ka.

Me selman i annan zofisye lapolis ki senser la ki pe travay, me par kont Minis petet i enportan osi pou ou vwar osi serten bann zofisye Lapolis, ki ankor *still* pa pe byen delivre e ki port larogans anver bann dimoun sirtou drayver lo semen, e lezot dimoun osi dan kominote.

So, felisitasyon pou bann ki pe fer byen, me an menm tan petet bann ki pa pe fer byen osi pou zot redi en pti pe zot soset en pti pe pli anler, e ki aksyon i ganny pran.

An menm tan osi dan menm laliny, Minis ou'n koz lo - e nou'n vwar lo televizyon, ki i annan bann sivilyen ki pe ed Lapolis atraver bann ka vol touris lo lans. Nou lo nou kote nou profite osi pou felisit sa bann dimoun ki travay avek lapolis pou fer sir ki zot ariv a trouv en solisyon dan sa bann ka vol, e bann lezot problem ki arive dan nou kominote.

Dan mon kestyon mon distrik i enn parmi bann ki'n ganny afekte e i ankor pe ganny afekte par bann diferan ka, vol. La mon pou vin preziman letan ti annan sa bann *issue* met klou lo lans, zot in vin ekrir lo legliz, zot in vin met koksiss napa ki pa'n ganny fer.

So ki bann determinasyon mon ti a kontan konnen ki lapolis in kapab arive dan tou sa bann ka, kekwa ki pa'n pas zis Anse Royale me in pas dan tou lezot distrik. Ki determinasyon petet Lapolis in arive avek sa bann ka? Eski in annan serten lenformasyon ki zot in gannyen? In annan serten aksyon ki'n kapab ganny pran? So mon ti a kontan ganny en pti pe detay dan sa laliny. Mersi Mr Speaker.

MR SPEAKER

Mersi. Minis ou repons silvouple.

MINISTER ERROL FONSEKA

Mersi Mr Speaker. Onorab mersi pou ou kestyon e mersi pou ou bann sipor lo sa louvraz ki lapolis pe fer e osi bann, bann led ki nou pe gannyen ek sivilyen fantastik sa e mon krwar sanmenm sa bann koze kolektiv ki nou bezwen fer.

Byensir lo kestyon arogans dan tou sa travay ki nou pe fer la, lenportans en zofisy *professional* i lakle osi. E sa touzour nou pe koz lo la ek *Compol*. Nou, i kapab donn ou tou lekipman, si nou napa sa bout *ok* e sa i nou bezwen sanz mantalite, konportman, ledikasyon. Tou keksoz i vin

dan sa *grounding* ki nou bezwen fer pou annan sa zofisy.

Lo kestyon *integrity* osi i ankor egziste dan lapolis e nou'n vwar, nou'n vwar sityasyon ki'n arive. So, lo kestyon *integrity* e zot, zot kapab konpran sa difikilte osi ler ou pe travay pou met zefor, ou pe ganny retire lo sa bann problem *integrity*.

So, nou konsernen ek sa e *believe you may* ki nou pe adres sa. Mon a pas ek *Compol* pou donn en pti *feedback* lo sa bann lezot kestyon ki ou'n demande. Mersi Mr Speaker.

MR SPEAKER

Mersi. *Compol*?

COMMISSIONER OF POLICE

MR TED BARBE

Bonzour Mr Speaker. Bonzour *Leader of Government Business*, bonzour *Leader of the Opposition*, bonzour Manm Onorab, bonzour bann dimoun Au Cap ki la e tou lezot Seselwa ki a lekout.

Minis in reponn en pti pe sa kestyon lo size senserite, pa pe delivre, larogansite dan travay. Sa i keksoz ki nou pa kapab demanti - i *être*. E zisteman nou pe travay lo bann endividi ki pe fer sa. Nou annan *refresher courses* lakademi ki nou pe refer. E annefe en

keksoz ki kontinyen nou pe al fer la pou fer sir ki nou tir en pti pe larouy lo sa bann ki pa pe neserman *focus*.

E mon konnen poudir zofisyè Lapolis i realize poudir ler i annan pe pous devan, en pe, pe redi deryer. Me sa bann ki pe redi deryer, zot konnen e zot pa devret dan Lapolis. Si ou demann mwan *unless* zot sanz en pe zot mantalite, e se sa ki nou pou fer. Zot pou bezwen redi soset parey ou'n dir taler. Zot bezwen *pull up their socks* e si zot pa fer zot landrwa i pa pou dan Lapolis, akoz Lapolis i *teamwork*, nou siport kanmarad, nou bezwen konnen kwa ki nou pe *focus* lo la.

Mon'n dir ankor enn fwa nou annan servis ki nou donnen, se nou *product* e nou kliyan *customer* se nou piblik. So, nou bezwen mazin sa a toultan ki nou, ki nou travay. Nou annan determinasyon pou travay avek sivilyen in toultan la. E zisteman nou pe anforse li. Avek sa 2 group ki pe fer *Neighborhood Watch* ki Minis in koz lo la pli boner, nou felisit zot e nou pou zwenn zot.

Lapolis i deza an kontak avek zot e nou pou zwenn e nou pou fer plizyer distrik ki kot krim si oule, i en pti pe entans pou annan sa *Neighborhood Watch program* ki annan lapolis

onboard ek bann lezot *stakeholders*, e sa i ede zisteman pou *bridge the gap* e dekouver bann lofans.

Akoz san piblik napa deteksyon, nou kapab fer deteksyon me piblik i *75 percent or even 80 percent* nou lanmen drwat si oule. So, nou depan en kantite lo zot.

Lo size ekrir lo bann legliz eksetera, nou'n vwar poudir i pa en keksoz ki normal si oule, ou e sa ki pe ganny *focus* se Legliz Katolik e tou dernyerman Legliz Anglican in sibir sa lensidan li osi.

E nou, nou annan *file* ki'n ganny ki lo la, nou pe dokimant tou sa bann lensidan ki pe arive kot bann legliz. E en zour ki apel en zour sa bann dimoun nou pou konnen lekel ki pe fer sa. Sa mon garanti nou pou konnen lekel.

Nou annan ki nou'n sispekte, ki nou'n rankontre zot, me nou pou fer sir ki nou dekouver sa *case* - sa bann *case* ki'n arive. E osi nou ankouraz legliz la mon profit en pti pe letan, met en pti pe sa ki nou dir *CCTV camera* akoz i pou ede sa. *CCTV camera* in ed nou en kantite dan nou bann demars pou fer deteksyon bann ka, so mon ava ankouraz bann legliz pou fer sa.

Lo size vol lo lans, ankor enn fwa nou remersi piblik e mon pou zis fer sorti la poudir lapolis nou ti deza annan en program, mon krwar i pou enteres tou dimoun ki la anndan. Nou ti deza annan en program *Tourism Police* ki nou ti apel sa *way back* e mon kapab dir i ti mal ganny organize.

Mal, mal ganny organize akoz bann lozistik pa ti ganny met an plas. Nou ti zis lanse ler ti annan sa demann san ki nou pran kont poudir pou fer en *Tourism Police* i annan en ta keksoz ki nou bezwen met an plas. Akoz nou pa pou *dump* gard lo lans or *whoever* lo lans *just like that*. Lapli, soley zot lo lans, napa landrwa pou fer isi pou fer laba. Nou tou nou konnen nou'n deza koz lo la.

So, nou'n fer en lot lapros. Mon pa pou devwal la, me mon dir zot poudir i an mars e *anytime soon* nou pou vwar prezans lapolis pli entans lo lans e nou pou *get rid* ek sa bann voler ki pe *tarnish* repitasyon Sesel atraver vol bann touris. Mersi bokou.

(APPLAUSE)

MR SPEAKER

Mersi. Onorab Loze.

HON JOHAN LOZE

Mersi Mr Speaker. Mr Speaker *I want to start by beseeching the Chair*, Minis in entrodwir en size. In koz lo lonnekte, zot toultan koz onnet e ki Prezidan i reponn tou son kestyon onnet. Mr Speaker *I put it before you* ki Minis in koz lo *600kg Heroin*, me Prezidan lo *HARDtalk* in koz lo 5 tonn.

Nou annan en diferans apepre 4.4 tonn la, i annan en problem mon pa konnen si nou pou kapab *trust* statistik ki pe ganny met devan nou.

Mr Speaker, mon ti le poz en kestyon; ki prosedir eski pe ganny servi par bann lafors disipliner lord ek lape, kot i konsern koleksyon levidans - sa zistwar *chain of evidence* la?

Akoz i annan bokou lensidan ki pe arive ki pe *add up*, ki pe vol konfyans dimoun. Nou tande nou tou ki swiv keksoz, lapolis i dormi avan zot fini kont en sak larzan. Levidans ki ganny kolekte dan *case* zarm i ariv dan lanmen Prezidan, i lir apre i vin koze lo televizyon; drog i *end up* lo *ghetto* e i annan tout en bann brouyar ki pe pase. So, mon anvi konnen ki koleksyon levidans pe ganny fer annord e tou keksoz i anba *lock and key* ler zot atrape e i byen.

E ankore Mr Speaker, eski piblik i kapab fer konfyans sa prosedir *chain of evidence*? E zis an terminan Mr Speaker mon zis anvi fer Minis konnen ki nou annan gran respe pou lapolis, mon oule remersi li menm li Minis ek son bann gard, e ki napa personn dan sa Lasanble ozordi ki pou apel lapolis gardbou parey parti *SNP* ti fer. Mersi Mr Speaker.

MR SPEAKER

Mersi. Minis ek *panel*, mon konnen nou dan en size tre konplike avek en kantite detay selman mon pou *remind* zot osi pou keston letan pou gard repons direk lo keston silvouple.

MINISTER ERROL FONSEKA

Mersi Mr Speaker. Mon'n fekoz ek *Compol will answer this one*. Mersi.

MR SPEAKER

Compol ou annan laparol.

COMMISSIONER OF POLICE

MR TED BARBE

Mersi Mr Speaker. Lo size *chain of evidence*, mon pa pou al an detay lo la aköz i en size lapolis e ki manner nou prezerv levidans nou pa kapab neserman *reveal* sa *in the entity to the public* e lezot

dimoun. Aköz sakenn i annan son louvraz, son domenn ki i fer e i annan serten keksoz ki ou bezwen kit li. Aköz sa size tou bann prose ki nou kit li annord, pou fer sir ki nou ganny en konviksyon ler nou ariv Ankour, *ok*?

Se *chain of evidence*, se sa ki an kontak avek *whatever* lobze ki nou konsider li koman *exhibit* i fer sir ki i ganny *properly guarded, secured* e si i ganny *pass on to the right person* dan sa ka kot *Fingerprint* e *when it reaches the fingerprint expert*, bann dimoun *crime scene expert from the Fingerprint, then its them who's gonna to bring the evidence to court*.

E sa dimoun ki'n an kontak avek sa lobze an premye, i pou bezwen vin Ankour li osi. So, sa *chain* fodre pa i ganny kase. *Throughout* fodre i pe ganny *maintain* e rikorde. Sorti kote, in al kote ziska, *disposal in court*. Se sa ki mon kapab dir lo la, e ou bezwen kit li *intact*, i pa devret ganny *altered* eksetera. So, sa i en pti pe lo la.

Lo size tonaz bann drog si mon pou koz lo la, senpleman mon pou dir ki se ki sa ki'n ariv lo later Mahe, eski nou pe *refer* to ki nou'n koz lo la, la ki Minis in donn bann *stats*, bann ki'n

ganny dispose outside Mahe as later Mahe sa i en lot zafer.

Sa ki nou'n *refer to* la, se sa ki nou'n anmase ki nou'n anmenn Mahe, ki *as exhibit* ki'n vin ater. Se sa ki nou'n koz lo la. Mersi Mr Speaker.

MR SPEAKER

Mersi. Onorab Loze ou'n lev lanmen, mon vreman prese pou letan. Si ou annan en klarifikasyon silvouple zis sa.

HON JOHAN LOZE

Zis en pti klarifikasyon pou Minis Mr Speaker. Nou'n met lapolis dan *hot seat* la ozordi. Mon zis anvi konnen Minis e partou dan lemonn i rekonnèt kot i annan en *rise in poverty*, sa i akonpanyen par en logmantasyon dan kriminalite.

So, eski Gouvernans pei pe pran an kont ki sa leksplozyon dan kriminalite, i an relasyon direk avek en leksplozyon dan lapovrete dan pei? Mersi Mr Speaker.

MR SPEAKER

Minis.

MINISTER ERROL FONSEKA

Mersi Mr Speaker. Mon pa konn keksoz, mon pa konpran ki ...

MR SPEAKER

Eskiz mwan, Minis avek respe pou Onorab Loze, mon pou dir sa i pa en klarifikasyon in al lo en lot pwen. So, mon pou sot sa kestyon e mon pou kontinyen avek Onorab Herminie.

MINISTER ERROL FONSEKA

Me Mr Speaker mon oule dir osi ki...

MR SPEAKER

Vitman Minis, vitman.

MINISTER ERROL FONSEKA

Pardon?

MR SPEAKER

Ale vitman dir.

MINISTER ERROL FONSEKA

Non mon pe zis dir pa kestyon *poverty*, napa *poverty* kontrè i annan plis, plis- Lekonomi i bon dan pei. Sanmenm i annan sa trafik osi. So, mon pa konnen kot i pe ale lo *poverty* mwan.

MR SPEAKER

Tre byen. Mersi, Onorab Herminie.

(Off-Mic)

MR SPEAKER

Order! Onorab Hermine.

HON WILBERT HERMINIE

Mersi Mr Speaker. Bonzour Mr Speaker; bonzour Minis; koleg Onorab, *Compol* ek son lekip. Kestyon ki'n anmennen par *Leader* Lopozisyon i pou ed lapolis pou nou ganny lenformasyon. Nou pa pe fer en latak. Minis in dir ki akt kriminalite dan pei i konsernen e alarman, e sa i en lendikasyon ki moral zofisye lapolis pe desann.

Kestyon i eski Minis in zwenn ek bann zofisye lapolis pou determinen kwa ki pe fer zot pa kapab delivre? E 2, eski Minis in zwenn ek bann zofisye lapolis pou revwar zot *Scheme of Service*? Mersi.

MR SPEAKER

Mersi Onorab. Minis.

MINISTER ERROL FONSEKA

Mr Speaker mon tro konpran ki Mr, ki sa Onorab pe vin lo la. Me lo kestyon moral, moral Lapolis i o ozordi. Akoz? Akoz zot pe ganny sa loportinite pou zot *handle* sa sityasyon dan pei. I en loportinite pou nou fer sa sanzman e zot pe travay tou ansanm ek nou.

So, ler i dir moral pa bon mon pa konnen avek ki i pe koze. Petet son prop moral ki pa tro bon, me-

(laughter)

MINISTER ERROL FONSEKA

Me moral Lapolis i bon!

(Interruption)

MR SPEAKER

Hold on. Order! Order!

MINISTER ERROL FONSEKA

Me Mr Speaker moral Lapolis i bon.

MR SPEAKER

Minis, eskiz mwan en pti kou.

MINISTER ERROL FONSEKA

Petet mon'n al an deor?

MR SPEAKER

Wi, ou'n al an deor. Pa servi repons.

MINISTER ERROL FONSEKA

Mon a bezwen *apologies*, selman i en *matter of speech* sa.

MR SPEAKER

Mersi.

MINISTER ERROL FONSEKA

Nou reste zanmi. Mersi.

MR SPEAKER

Mersi. Onorab Cosgrow ou kestyon. Onorab Cosgrow ou kestyon.

HON WALLACE COSGROW

Scheme of Service pou li Mr Speaker.

MR SPEAKER

Wi. Ale *Compol* adres *Scheme of Service*.

COMMISSIONER OF POLICE
MR TED BARBE

Mersi Mr Speaker. *Scheme of Service* Lapolis pe ganny revwar *its ongoing*, nou'n deza komans travay lo la.

MR SPEAKER

Thank you. Onorab Cosgrow.

HON WALLACE COSGROW

Mersi Mr Speaker. Bonzour Mr Speaker; bonzour Minis avek delegasyon lapolis e tou Manm Onorab, tou manm piblik avek bann dimoun anler dan Galeri ki pe ekout nou.

Mr Speaker, bomaten Minis in lir nou en pake statistik an sa ki konsern krim e kriminalite dan pei e mazorite statistik ki Minis in lir nou ozordi, se bann statistik ki pe ogmante.

Now, eski Minis i kapab dir nou ki bann zefor ekstra, li koman Minis e nou rekonnèt zefor zofisyè lapolis ozordi pou fer sa travay ki annan pou ganny fer. Me li koman *leader* koman sa dimoun ki pe diriz Lafors Lapolis, eski i kapab dir

nou ki bann zefor ekstra ki i pe mete? Ki bann mezir ekstra ki i pe mete pou asire ki sa bann statistik ozordi ki nou pe vwar sitan alarman i desann.

Mon lot kestyon Mr Speaker i al dan menm lalinyèr mon pe lir rapor *NBS* pou 2022/2023 premye kar, mon pe vwar ki lakantite *case* drog ki ganny rikorde in ogmante.

In ogmante e Mr Speaker i pa al anlinyèr avek sa bann *statement* ki nou pe tande par Prezidan, par Lotorite ki zot pe tyonbo drog, ki zot pe anpes drog antre, ki zot pe fer isi zot pe fer laba. Akoz si zot ti pe fer sa bann louvraz parey zot pe dir sitan byen, ozordi nou pa ti pou vwar sa kantite *increase* dan lakantite ka drog ki pe ganny rikorde.

Akoz sa i bann ka ki ganny rikorde par prosekisyon, so eski Minis i kapab dir nou ozordi, ki louvraz an plis zot pe fer pou anpes sa kantite drog antre dan pei? E lekel ki o komann sa bann zafer? Eski Prezidan? Eski ou Minis? Eski se lapolis?

Akoz ozordi dan lizye piblik nou pe vwar ki poudir Prezidan pe donn lord Lapolis ki pou al fer.

MR SPEAKER

Onorab.

HON WALLACE COSGROW

So, Minis donn nou kler lekel ki *the chain of command* dan Lapolis. Mersi bokou.

MR SPEAKER

Bon Onorab ou'n ariv lo 3 kestyon, Minis silvouple.

MINISTER ERROL FONSEKA

Mr Speaker mon pa konpran sa lozik mwan. Ler nou pe anmas plis drog nou pe fer plis zefor, me selman nou pa pe fer zefor? Be ... Ler nou *detection rate* i *higher*, nou pa pe fer zefor?

(Interruption)

MR SPEAKER

Onorab silvouple.

MINISTER ERROL FONSEKA

Sa lozik, sa lozik i en lozik ki mon krwar tou dimoun pou remarke ki i en pti pe difisil pou reponn. Akoz sa lozik i kler ki en kantite louvraz pe ganny fer. E mwan mon louvraz personnel i 24 lo 24 pou asiste Lapolis ek tou bann lezot *law enforcement* sityasyon.

So, mwan mon krwar rezilta ki pe arive i byen kler. Nou'n montre e napa en logmantasyon parey ou'n dir, sa i en fo parey nou'n eksplike. Selman ki mon ti pe sey dir, i nivo kriminalite i konsernan

akoz kalite, sa kalite krim ki pe arive ozordi i pa en krim ki ti egziste dan nou Kreol, *ok?* In sanze, *ok?*

So, sa sanzman in arive e nou bezwen fer fas ek sa bann sityasyon. So, an tousala Onorab mon krwar mon'n reponn sa kestyon dan mon prezantasyon bomaten. Mersi Mr Speaker.

MR SPEAKER

Mersi. Mon a pran kestyon Onorab William. Onorab William ou kestyon.

HON WAVEN WILLIAM

Mersi Mr Speaker. Bonzour Minis avek ou delegasyon, mon anvi demann avek Minis lo sa bann sif, mon pa'n tann li nonm bann *repeated offenders* pou nou kapab konpran en pti pe? E mon anvi konnen ki zot pe fer?

Dezyenmman Minis eski zot pe konsider revwar ankor *The Criminal Procedure Code*, *Criminal Code* pou kapab fer travay Lapolis en pti pe pli fasil?

Eski zot pe travay lo la akoz en bon pe letan depi ansyen Gouvernman, nou'n trouv en pti sanzman dan Lalwa resaman, me nou pa vwar poudir i annan gran keksoz ki pe sanze pou kapab ed lapolis fer byen son travay. Mersi.

MR SPEAKER

Mersi. Minis ou repons?

MINISTER ERROL FONSEKA

Mersi Mr Speaker. Mersi Onorab pou ou kestyon. Lo premye kestyon Onorab, wi mon pa'n mansyonnen selman mon annan sa *figures* devan mwan, i 30poursan, 35 poursan *recidivists* dan prizon. E mon a pas sa lot kestyon ek *Compol* pou reponn sa. Mersi.

MR SPEAKER

Compol. Yes? Sorry Mr Denousse.

ASSISTANT COMMISSIONER OF POLICE**ANTOINE DENOUSSE**

Mersi Mr Speaker. Bonzour tou dimoun, bonzour Dirizan Zafer Gouvernman, Dirizan Lopozisyon e tou bann Manm, tou dimoun ki a lekout.

Mr Speaker *regarding* kestyon ki annan pou fer avek *CPC Criminal Procedure Code*, nou pou bezwen antre dan en konversasyon avek *AG's Office* pou nou vwar ki mannyer nou kapab fer li. Vre ki i annan, ki nou pas ladan kekfwa i annan serten bout ki nou bezwen fer serten travay. Nou ava antre dan konversasyon avek *AG's*

Office, pou nobou fer gete *how best* nou kapab lo la.

Vre in annan bann pti bout amannman ki'n ganny fer o firanmezir diran bann lannen. Me nou ava pran sa an kont pou nou asiz avek, koz avek *AG* pou nou gete *how best*. Parey mon'n dir i annan bokou bann pti amannman ki'n ganny fer ladan. Mersi Mr Speaker.

MR SPEAKER

Mersi *ASP*. Mon a pran kestyon Onorab Uranie.

HON ROCKY URANIE

Mersi Mr Speaker. Bonzour Minis ek ou delegasyon. Bonzour tou koleg Onorab, en bonzour spesyal pou bann zabitan Au Cap ki anler dan Galeri.

Mr Speaker *weekend* ti annan en gro batay foutbol, alors mwan koman *MNA Zil Pros* mon oule swet tim *La Passe* ek *Anse Reunion* dir zot felisitasyon pou sa zoli *game* ki zot in fer Sanmdi. E lo mon non personnel e osi lo non parti Prezidan Parti Dokter Patrick Herminie nou felisit, nou le felisit tim *La Passe* pou sa lakonplisman e osi *Anse Réunion* pou ariv dan final.

Mr Speaker dezyenmman, mon oule felisit bann zofisyè Lapolis - mon annan zanmi ki

dan Lapolis e zot pe fer bann travay formidab; pou sa travay ki zot pe fer i annan Lapolis ki fer zot travay vreman, vreman byen pou gard lord ek lape.

E osi felisit bann dimoun ki ed Lapolis dan bann demars pou ki...

MR SPEAKER

Onorab al lo kestyon.

HON ROCKY URANIE

Mr Speaker, mon vin lo mon kestyon. Mon kestyon i annan pou fer avek konfyans ki tonm dan trwazyenm parti kestyon *Leader* Lopoziyon, konfyans dan lotorite.

Minis in vin la in fer detrwa *statement*. I annan enn ki in dir ki i pran aksyon kont tou dimoun ki kas Lalwa non pa zis serten. Alor mon pe demande aköz ki sa madanm i ankor la, ti deza dan *meeting* piblik pou plennyen pou son *case*, ki Minis Derjaques ti tap son fiy ki ti dan Lapolis *on duty*?

Alors mon kestyon i ki aksyon ki lapolis pe pran, pe fer pou asire ki bann zofisye Lapolis ki *on duty* i ganny proteze e zot ganny lazistis? Mersi.

MR SPEAKER

Mersi. Minis mon pa krwar Lasanble i devret pran okenn ka

spesifik. Mon a les ou zize ki ou kapab reponn. Ki ou kapab reponn dan sa kestyon.

MINISTER ERROL FONSEKA

Wi. Mon krwar Dokter ... Yes, Mr Speaker, mon pa pe reponn en kestyon ki pa lo *Law and Order*. Sa sityasyon i dan lanmen lapolis e nou les lapolis fer son travay. Mersi Mr Speaker.

MR SPEAKER

Mersi. Bon, mon pou bezwen aret kestyon siplemanter lezot Manm. Mon pou pas lo loter kestyon Onorab Pillay.

HON SEBASTIEN PILLAY

Mersi Mr Speaker e mersi Minis pou ou bann larepons. Minis mon bezwen dir poudir mon ekstrememan konsernen.

E mon note atraver ou Mr Speaker ki mon vwar mazorite dan Lasanble i bat lanmen, ler Minis i koz lo en sityasyon kriminalite alarman dan nou pei e sa i fer onte pou en Lasanble, Mr Speaker!

(APPLAUSE)

MR SPEAKER

Onorab! Onorab sa komanter i *out of order*! Si Manm in bat lanmen se pa ki zot pe aprouv to kriminalite. Silvouple arete

avek sa bann komantr provokan, silvouple! Poz ou kestyon. Poz ou kestyon Onorab.

HON SEBASTIEN PILLAY

Mersi Mr Speaker. Mr Speaker mon pou demann Minis pou balans en pe ou moral avek mwan la, annou sey konpran en keksoz. Tou statistik ki ou'n nonm nou i montre en logmantasyon dan kriminalite.

Mon annan devan mwan Rapor Biro Statistik ki Lapolis ki donn lenformasyon e i paret ki depi sa rapor in ganny pibliye ankor rikord, i annan ankor en gran logmantasyon dan krim ki'n ganny rikorde kot ou'n menm koz dan serten ka 200poursan logmantasyon.

Sa i montre ou klerman en Minister ki pe *fail* pou kapab adres problemn kriminalite. Plizyer kestyon in ganny demande avek ou si i annan problemn pou fer avek liyerasi, avek lafason keksoz i ganny fer.

So, mon premye kestyon pou ou. Par egzanp ban lofans ki konsern bann krim serye, *LDS* i dir poudir logmantasyon ti 55.6poursan pou premye kar lannen. Minis in montre nou poudir sa statistik i bokou pli o. Ki ou pe fer, ki stratezi ou annan pou adres sa problemn bann krim e bann lofans serye

ki pe monte, ki pe kontinyen ogmante dan nou pei? Sa i mon premye kestyon.

Mon dezyenm kestyon Mr Speaker. Mon dezyenm kestyon Minis in tap kalot dan sa *statement*, oubyen dan sa largiman ki lapovrete i kontribye dan logmantasyon krim.

Mr Speaker, mon vwar sa i drol, akoz mon pe get resers ki ti ganny *provided* par sa eksper Angle ki ti vin travay pou lapolis, e i ti koz lo *opportunity crimes* e bann krim relye avek dimoun ki avek lapovrete.

So eski Minis i kapab dir nou ki bann mezir i pe met an plas e ki diskisyon i pe fer ek Gouvernman dan sirkonstans kot zot in rankontre oubyen vwar bann krim ki'n montre poudir sa bann krim, pe ariv akoz kondisyon ekonomik ki bann dimoun pe viv ladan?

E dernyen kestyon Mr Speaker, mon ti annan 3 pwen dan mon dernyen kestyon, mon dernyen kestyon.

MR SPEAKER

Ale, silvouple!

HON SEBASTIEN PILLAY

Mr Speaker kan eski Gouvernman pou aret sey bat nou latet lo statistik ki met devan nou?

Mr Speaker, Minis i admet poudir zofisye ki fer *seizure* i pran drog ki'n sezi. Nou pa kapab *account* pou 100gramm drog ki en boug in met dan son lavenn, ki kapab kout li pou li ariv lopital. E Minis pa vwar sa en pwen konsern e dir nou poudir nou ki annan en problem? Non!

I annan en mank konfyans dan lafason ki serten zofisye, lafason ki *leadership* pe *manage* lapolis e sa ki nou, nou oule ganny en klarifikasyon lo la, se eski Gouvernman pe pran mezir pou adres sa bann sityasyon?

E ki i pe fer pou asire ki piblik i konpran klerman ki Lapolis anba Konstitisyon i ganny dirize par en Komisyoner Lapolis, se li ki sipoze ansarz lapolis e non pa Prezidan Larepublik ki pou donn lord zofisye lapolis dan en *meeting* piblik. Non pa Minis ki pou donn lord, non pa en Depite Komisyoner ki pou pran lord lo li menm. Me i annan en Komisyoner Lapolis Mr Speaker.

So eski Minis i kapab dir nou, eski Minis i kapab dir nou ki zot pe fer pou etablir en konfyans dan piblik, ki piblik i konnen klerman ki Mr Ted Barbe i Komisyoner Lapolis e se

Mr Barbe ki ansarz son Departman Lapolis.

E mon pou met en keksoz devan ou Mr Speaker an pasan.

(Interruption)

HON SEBASTIEN PILLAY

Mon pou met en keksoz devan ou Mr Speaker. I annan dimoun in ariv en staz kot zot menm *call* lezot dimoun lo non Lapolis e dir dimoun *turn up* pou vin kot *CID*. E Komisyoner i konnen ki mon pe dir ozordi.

MR SPEAKER

Onorab ou pe al dan bann alegasyon ki mon pa krwar ou kapab, permet. Ou'n demann 3 kestyon i sifizan.

(Interruption)

MR SPEAKER

Order! Minis ou a reponn bann kestyon ki'n ganny soumet silvouple.

MINISTER ERROL FONSEKA

Mr Speaker. Onorab mersi pou ou, mon pa konnen mannyer mon pou dir sa, akoz lapovrete ler i annan 3 pousan *unemployment* dan en pei ou pe koz lapovrete? *This is*, sa se en rikord enkrwayab pou en pei annan sa kalite *unemployment rate ok?*

(APPLAUSE)

MINISTER ERROL FONSEKA

Savedir tou dimoun pe travay, tou dimoun i annan en sours larzan. So i enposib pou *relate* sa ansanm ler sa *stats*.

En lot kestyon ki mon vwar, en lot prononsman ki in fer 100poursan ogmantasyon, be kot ou'n ganny sa bann *chriffre*? Non, non sa ki mon'n dir....

(Interruption)

MR SPEAKER

Les Minis reponn kestyon *please!* Minis.

(Interruption)

MINISTER ERROL FONSEKA

Non, non. Ki sa pour...

(Interruption)

MINISTER ERROL FONSEKA

Non-non sa in grab sa dan ler. Mwan mon'n - si ou ekout *verbatim*, mon bann poursantaz *increase* mon'n montre. E parey mon'n dir i reflexir ki napa, i pa alarman sa bann ka statistik. Me konparezon ki mon pe fer i kalite kriminalite.

So annou pa sot isi, sot laba sa i kler sa devan mon prezantasyon ki mon'n fer. E konfyans! E lo kestyon sa drog ki'n ganny perdi, nou pa konsernen? Ou kapab servi en mo ki "nou pa konsernen?" Si nou pa ti konsernen ti pou annan sa bann dimoun pe mars lib parey ti abitye lontan. *Ok*.

(APPLAUSE)

(Interruption)

MR SPEAKER

Order!

MINISTER ERROL FONSEKA

Si nou pa ti konsernen nou pa ti pou'n pran aksyon! E pa zis sa. E pa zis sa. Nou'n pran aksyon, me pa zis nou'n pran aksyon. Nou les dimoun konnen, nou les piblik konnen.

Ou pa'n bezwen al fouye pou ganny sa lenformasyon, akoz nou'n dir tou dimoun. E sanmenm sa ki donn konfyans e napa en problenm konfyans ek sa Gouvernman. Akoz Seselwa i annan konfyans akoz nou kler, nou onnet, nou dir tou keksoz ki arive.

Mr Speaker, vreman setou mon larepons pou sa bann kestyon ki'n vini. I en nespes bouverzman ki pa realite, akoz konfyans dan Lapolis i la;

konfyans dan Gouvernman i la. Nou pe fer louvraz, nou pe fer kler ki nou pe fer, nou pa pe kasyet naryen, ozordi ki nou kasyet ozordi? Ozordi ki nou kasyet?

Sa kantite ka koripsyon ki nou pe met deor! Sa kantite dimoun ki zot in vwar ki'n al dan prizon ozordi, ki lontan zanmen ti pou arive. E sanmenm, nou problemm ozordi i akoz pa ti ganny fer avan?

Si i ti'n ganny rezourd ler sa sityasyon ti anba kontrol, nou ti pou annan en *deterrence* enkrwayab; be tou dimoun ti konnen zot ti kapab donn bal!

So sa bann kestyon Mr Speaker ler i sorti lo sa kote latab ek sa zistwar ki zot parti i annan, i fer ou konmsi etonnen ki i annan en lodas pou demann sa kalite kestyon. Mersi Mr Speaker.

(APPLAUSE)

MR SPEAKER

Mersi. *Order!* Mon pe termin sa sesyon kestyon la. Mon pa pe donn *Leader* Lopozisyon lot kestyon, akoz i tro servi son kestyon pou fer alegasyon, lakizasyon *and so on*.

(APPLAUSE)

MR SPEAKER

Bon Minis ek ou delegasyon mon remersye zot pou zot partisipasyon e mon a swet zot bon kouraz. Mersi e bon depar. Mersi.

(THE MINISTER AND HIS DELEGATION WERE EXCUSED FROM THE HOUSE)

HON SEBASTIEN PILLAY

Wi Onorab Pillay ki rezon ou'n lev lanmen?

HON SEBASTIEN PILLAY

Mersi Mr Speaker. Mr Speaker mwan mon tre kalm - mon napa okenn problemm. Zis mon oule klarifye en pti fason fer dan nou prosedir konmsi.

I paret mwan i, (ou a dir mwan si mon mal) i paret mwan ki i *ok* pou *panel* dir ek mon bann Manm lo mon kote latab ki zot moral pa bon. Me i pa *ok* pou nou dir *panel* okenn keksoz.

E ou pa'n fer Minis *apologise* dan Lasanble, pou mank respe pou en Manm Lasanble ki en vyolasyon - ki en vyolasyon son privez e sa ki anmenn lezot komanter ganny fer.

Now, mwan mon zis met sa devan ou, akoz in arive la tou dimoun i vwar ou reaksyon. Si mwan ki mal mon aksepte mon ki mal. Me in arive mon ti a

kontan i nou met li lo rikord.
Mersi bokou.

MR SPEAKER

Wi. Ou mal!

(APPLAUSE)

MR SPEAKER

Mersi. Madanm raporter nou
ava apel lot Minis pou kestyon
silvouple.

Bon, bonzour e byenveni
Minis Dezinyen, Minis Ferrari
ki avek nou pou pran bann
kestyon ki ti pou Minis pou
Lagrikiltir, Sanzman Klima e
Lanvironnman Minis Flavien
Joubert ki'n bezwen vwayaze
pou li al reprezant Sesel lo en
misyon deor.

Donk Minis Dezinyen pe
pran son bann kestyon. E mon
swet la byenveni osi Mr Joel
Valmont *CEO PUC* e Mrs Doreen
Bradburn *Deputy Chief
Executive Officer PUC*, pou
premye kestyon ki limero 64
Onorab Michel Roucou.

Mon a fer remarke mon
annan 7 kestyon, letan par
kestyon pou apeare 15minit.

HON MICHEL ROUCOU

Mersi Mr Speaker. Mon a dir en
bonzour tou dimoun. Bonzour
Minis ek ou lekip. Bonzour
spesyal zabitan Mont Fleuri e
osi bann zabitan Au Cap ki dan

Galeri ek nou. Mr Speaker mon
kestyon i koumsa;

Eski Minis i kapab dir
avek Lasanble ki plan *PUC* i
annan pou proze *sewage*, ki an
se moman i ariv la kot laplenn
lekol Mont Fleuri e, dan sa
konteks eski *PUC* i annan
okenn plan pou konekte
zabitan Forêt Noire lo sa
sistenm? Mersi.

MR SPEAKER

Mersi. Minis. Ou a diriz ou
delegasyon.

**DESIGNATED MINISTER
JEAN-FRANCOIS FERRARI**

Mersi Mr Speaker. Mr Speaker
bonzour. Bonzour tou bann
Manm Onorab e mersi Onorab
Roucou pou ou kestyon.

Mr Speaker mon larepons
i koumsa; kouvertir sistenm
sewage dan Mont Fleuri e
prensipalman dan rezyon Forêt
Noire i tre limite. Sa servis an se
moman i pe kouver Lekol
Segonder Mont Fleuri enn de
lakaz o bor Weeling apre en
housing block pre o bor Biro
Ladministrasyon Distrik.

Pou permet konekte bann
lakaz dan Forêt Noire nouvo
tiyo pou bezwen ganny enstale
e sa 2 stasyon laponp ki egziste
a ler aktyel pou bezwen ganny
agrandi e *upgraded*.

PUC i estimen ki i pou kout environ R4milyon pou agrandi sa sistenm *sewage*, koman en premye faz selman, ki a permet koneksyon pou environ 75 lakaz ki sitye ziska lo en nivo 20met oter an referans avek *above mean sea level*.

Alors pou donn bann dimoun ki konn en pe sa rezyon i sa 75 lakaz ki nou pe koz lo la i plito dan sa rezon *Lower Forêt Noire*, kot semen par anba kot Mr e Mrs Afif, dan sa rezonn koumsa.

Mr Speaker a ler aktyel, *PUC* i fer resorti ki dan demars pou rekonstri stasyon laponp Roche Caiman ki i ladan pou le moman, avek sa lot ki sitye o bor *Intelvision* lo konblaz, An vi ki zot dan en leta kritik, sa travay pe ganny fer lo la e i pa pratik pou met plis presyon lo sa bann lezot lenfrastruktir.

Zot in vwar Roche Caiman i annan en gro travay pe ganny fer pou *upgrade* sa laponp. *PUC* pe osi antreprann en *refurbishment* mazer lo stasyon tretman Providence. Sa bann louvraz pou pran environ 1 a 2an pou konplete apre ki Kontra in ganny sinyen. So i bann travay vreman enportan.

Mr Speaker, i pa pou apropiye si *PUC* i kontinyen agrandi sistenm *sewage* avan

adres defayans dan lenfrastruktir aktyel.

Mr Speaker an prenon kont sa bann faktor ki mon'n mansyonnen, *PUC* i osi rekonnet ki i annan en gran bezwen pou agrandi sistenm *sewage* dan Forêt Noire, ki i ava ede adres difikilte ki bann rezidans sirtou dan rezyon en pe pli lo plato pe fer fas avek.

Pou permet en tel ekstansyon, *PUC* pou bezwen antreprann en *survey* e fer en *detailed design*. *PUC* in komet son langazman pou demar en tel aktivite *survey* avek *design* pandan sa bann prosen mwan ki devan nou. Sa i ava permet *PUC* ganny en nide en pe pli kler, lo kou e kote pou kouver e lekel bann lakaz dan Forêt Noire ki kapab ganny konekte.

PUC i anvizaze ki si mwayen i permet, en premye faz ekstansyon pou kapab kouver parey mon'n dir pli boner 75 lakaz. E pour kapab komans ganny antreprann dan milye lannen prosenn.

Mr Speaker, permet mwan pou osi servi sa loportinite pou fer resorti en gran defi ki *PUC* pe fer fas avek. Apard ki resours finansyel, dezyenm pli gro baryer e problenm dan zot travay, dan devlopman bann *network* se *wayleave*.

Ziska prezan *PUC* pa ankor kapab komans son komitman pou agrandi sistenm *sewage* Beau Vallon pour rezon, zisteman pour rezon *wayleave*. Alors *PUC* in demann mwan pou lans en lapel avek piblik la ki mon dan Lasanble ozordi, pou nou en pe pli korperatif dan bann size *wayleave*.

PUC i angaze e nou'n vwar sa dan bann *meeting* piblik. *PUC* i angaze pou li pran en lapros pli respektab, pli respe bann lakour bann dimoun pou zot apros zot dan en fason pli, (ki mannyer ou kapab dir sa?) pli senpatik, pli amikal pour nou kapab ganny sa. Konmsi pa zis vin lo en later zis met en potò, oubyen en fouye, met en tiyo.

So *PUC* i annan sa komitman, i anvi fer sa komitman ki li i pou fer son bout. Me selman an retour i demande vi ki sa tipografi lakaz i pre avek kanmarad, pou annan landrwa kot pou bezwen lans en lapel avek piblik, pou zot osi korpere. So sa i en keksoz ki enportan.

E se zisteman dan sa bann sityasyon koumsa ki nou'n ganny retar pou konekte Copolia. Kekfwa Onorab i ava pe demann kestyon lo Copolia

avek Rochon. Be zisteman se sa bann difikilte ki nou'n gannyen.

Mr Speaker mon remersye ou pou ou letan e mon pare pou reponn en pe kestyon lo la. Mersi.

MR SPEAKER

Onorab Roucou, siplemanter?

HON MICHEL ROUCOU

Wi Mr Speaker Sir. Minis mersi pou ou larepons vreman kler. E mwan mon annan 2 kestyon e osi mon annan en sizesyon.

Mon sizesyon se ki nou'n vwar poudir *PMC* pe enplimant serten travay - in deza fer enn Kan Tobrouk la kot zot in enstal en nouvo sistenm *sewage* - si *PUC* osi pe mazin pou li al dan sa bann laliny koumsa?

Aprè osi sistenm *sewage* dan Forêt Noire, i pou ede an term lo kote devlopman e sa pou ede pou fer ki nou lalis lakaz petet pou kapab diminyen, akòz bann paran pou kapab donn permisyon zot zanfan pou fer en pti pe sa ou kapab dir konstriksyon.

Aprè osi si *PUC* i kapab dir nou, kan ki zot pe mazin pou zot vin lo teren, pou zwenn bann rezidan li menm li e osi petet annan en *meeting* konsiltatif avek bann zabitan pou konn en pti pe zot pwennvi

osi pou zabitan konn en pti pe zot plan.

E osi Mr Speaker lo kote Rochon parey Minis in fer sorti, i annan en vizit ki nou'n fer avek lenfrastruktir ansanm avek Onorab Labrosse lo kote sa proze *sewage*, ki sipoze demare 2024 ki sa pou ede lo la?

E si Minis i kapab dir nou en pti pe an term lo kote sa *sewage* la anba Forêt Noire, dan bann diskisyon ki zot pou annan ek bann zabitan, nou konnen in dir poudir pou kout 4milyon.

E osi i annan bann *maintenance work* ki pe ganny fer Roche Caiman, osi Providence, si i kapab dir nou en pti pe ki lespwar ki zabitan zot kapab gannyen ki pli vit posib ki sa louvraz i kapab terminen, ki sa i ava ede? Mersi.

MR SPEAKER

Mersi. Mersi Onorab, bokou kestyon la. Minis.

DESIGNATED MINISTER **JEAN-FRANCOIS FERRARI**

Ok. Mon ava reponn premye kestyon lo, ki ti fer referans avek Kan Tobrouk.

Mon ti a kontan dir ki tou bann *housing estates* zot konnen i annan bann difikilte *sewage*. E Gouvernman in fer li en komitman pou li adres sa

bann size *sewage*. E mon dakor avek ou Onorab si nou adres zot e nou kapab konekte zot avek en *network* nasyonal, i permet devlopman lakaz, aköz i pa pou annan sa kalite presyon pou sak lakaz annan en *soakaway*, en *septic tank*.

Donk i en langazman ki Gouvernman pe pran e *PUC* in eksplik mwan yer poudir depans dan *sewage* i probableman sanmenm sa depans ki pli lour pour *PUC*. I plis, i kout plis pou konekte bann dimoun lo sistenm *sewage* e pou met an plas bann *network sewage* ki pou met an plas en *network* elektrisite.

Akoz mannyer nou *topography* ete, mannyer semen i ete, ros mannyer i ete. Ou bezwen al - i vremen, vremen difisil. Me dan bann landrwa, nou pe priyoritiz bann landrwa kot i annan bann sityasyon ki merit en pe latansyon irzan, e avek lentansyon pou nou rezourd sa bann problem lo bann *housing estates*.

Mr Speaker mon - kekfwa mon ava demann avek ou permisyon pou sa 2 pti kestyon Onorab, *CEO PUC* pou li fer 2 pti komanter lo bann size en pe pli spesifik. Mersi.

MR SPEAKER

Mersi. *CEO* ou annan laparol.

CEO PUC**JOEL VALMONT**

Mersi Mr Speaker. Bonzour tou Manm Lasanble. Bonzour bann piblik.

Mr Speaker i annan 2 kestyon ki Manm Onorab Roucou in demande, i annan pou fer avek *meeting* konsiltatif, ki plan *PUC*, apre lo kote son, en *timeline* lo kan ki bann zabitan Forêt Noire i ekspekte vwar serten progre an term koneksyon *sewage*.

Mon krwar sa dezyenm kestyon Minis in kouver par an di-z-an ki pa avan milye 2024 ki *PUC* pou kapab antreprann serten louvraz dan Forêt Noire anver sa 75 lakaz ki nou'n nonmen. Sa i premye kestyon.

Sa dezyenm kestyon lo kote *meeting* konsiltatif, nou oule lans nou *survey* avan. Ler nou pe fer *survey* pou annan serten diskisyon avek bann manm kominote rezidansyel. Apre ki nou'n konplet nou *survey*, nou pou dan en pozisyon pou annan en *final design* en plan, la nou ava organiz en *meeting* konsiltativ kekfwa boner lannen prosenn. Mersi Mr Speaker.

MR SPEAKER

Mersi *CEO*. Mon a pran kestyon Onorab Loizeau.

HON NORBERT LOIZEAU

Mersi Mr Speaker. Bonzour tou dimoun. Mr Speaker vi ki kestyon pe koz lo Mont Fleuri e sirtou Forêt Noire i en landrwa ki baliz avek Sans Soucis, e parti distrik Mont Fleuri par en bon bout dan Sans Soucis i osi form parti Mont Fleuri.

E parey ou konnen Sans Soucis i dan distrik Bel Air menm i baliz laba, e Sans Soucis Bel Air i en distrik ki annan plis larivyer, plis larivyer lo Mahe.

Ki zot pe fer la vi ki mwan mon pe koz an term pou nou protez nou bann sours delo, larivyer pou nou kapab anmenn li en pti pe pli lwen en pandan Sans Soucis akoz tou larivyer i komans anler, e i annan bokou konstriksyon ki pe ganny fer anler.

Legzil i annan konstriksyon ki pe fer. En pti pe pli ba i annan laferm en pe anler. Pou nou kapab anmas sa delo desarz pou proteksyon nou bann larivyer. Ki zot plan zot annan pou sa? Mersi.

MR SPEAKER

Onorab kestyon i lo *sewage*. Minis eski ou'n pare pou ou reponn sa kestyon? Wi Minis.

DESIGNATED MINISTER
JEAN-FRANCOIS FERRARI

Mr Speaker. Mersi Onorab. Gouvernman i angaze dan protez bann sours delo, bann *watershed*.

Sans Soucis i annan en landrwa kot dan lepase in annan serten labi; in annan konstriksyon par lao larivyer, in annan laferm parey zot konnen Legzil *Farm* ti ganny fer par lao danm Rochon ki bann move pratik ki pour le moman in arete akoz i enportan pou nou protez sa bann sours delo. Mersi.

MR SPEAKER

Mersi. Onorab Labrosse ou kestyon.

HON RICHARD LABROSSE

Mersi Mr Speaker. Bonzour Mr Speaker. Bonzour tou dimoun.

Minis, dan larepons Minis Mr Speaker, Minis in fer resorti bann *challenging* zot ti pe gannyen lo koneksyon *sewage* ant Copolia/ Rochon. Vi ki *PUC* i la, mon ti a kontan, eski *PUC* i kapab donn nou en pti pe ki bann dernyen devlopman lo sa proze?

Akoz ou a krwar i en pti pe trankil napa tro gran lenformasyon ki'n sorti lo la. Mersi Mr Speaker.

MR SPEAKER

Mersi. Minis oubyen *CEO*? Minis.

DESIGNATED MINISTER
JEAN-FRANCOIS FERRARI

PMC ki ti pe fer. Mersi Onorab. Dapre *CEO*, *PMC* ki ti pe antreprann sa travay e problem *wayleave* in met lo defi progre dan sa demars pou konekte Estate Copolia avek sistenm *PUC* ki sitye pli ba Corgat Estate.

Donk in annan difikilte ankor la e i pa drol ki i en size *wayleave* e bokou tiyo in ganny mete Onorab mon krwar ou konnen. Me selman koneksyon pa ankor ganny fer akoz pli ba, pli ba - e parey mon'n eksplike pli boner - pli ou konekte anler e si ou pa regle kapasite pou *handle* sa *sewage* pli ba dan plato, i pou en difikilte.

Me sa i en program ki an mars. Mersi.

MR SPEAKER

Mersi. Mon'n vwar Onorab Georges in lev lanmen ki ase rar pou bann kestyon. Onorab Georges mon a donn ou laparol pou ou kestyon.

HON BERNARD GEORGES

Mersi Mr Speaker. Mr Speaker mon kestyon i senp. Mon realize ki kestyon i *focus* lo distrik

Mont Fleuri me mon ti anvi an vi repons ki Minis e *CEO* in donnen e an vi devlopman ki pou arive byento lo renovasyon bann lakaz dan distrik Les Mamelles.

Eski nou kapab ekspekte ki ler zot pe rebran travay pou Mont Fleuri zot a kapab osi regard *linkup* avek travay ki pe ganny fer, pour ki pe anvizaze ganny fer byento dan mon distrik? Mersi.

MR SPEAKER

Mersi.

**DESIGNATED MINISTER
JEAN-FRANCOIS FERRARI**

Mersi Onorab. Onorab parey mon'n dir pli boner i annan sa 2 *pumping station* ki esansyel pou sa rezyon Mont Fleuri, Plaisance, Les Mamelles.

E sa bann la pe ganny *upgraded* e ler kapasite i ava ogmante lo sa bann *permit station* otomatikman i pou benefisye bann distrik ki en pe dan balizaz. Mersi.

MR SPEAKER

Mersi. Mon a termin ek kekyon Onorab Larue.

HON FLORY LARUE

Bonzour Mr Speaker. Bonzour Minis ek ou delegasyon. Mr Speaker mon ti a kontan lefe ki

Minis in koz lo plan nasyonal pou konekte *sewage*, eski *PUC* ti kapab donn nou bann Manm en nide lo ki direksyon nou pe ale, lefe ki dan Sizyenm Lasanble bann Manm Onorab ti antre dan en diskisyon avek *PUC*; eski zot annan en mouvman lo sa plan pou *centralized sewage* pou pei antye? Mersi.

MR SPEAKER

Mersi. Minis, *CEO* lekel ki kapab pran? *Yes CEO*.

**CEO PUC
JOEL VALMONT**

Mersi Mr Speaker. Pou konfirman sa plan nasyonal pou *sewage* ti ganny konplete en pe letan pase. E ansanm avek Gouvernman nou ankor pe rod bann *financing agency* pou kapab *fund* bann *catchment* ki'n ganny delinyen dan sa *master plan*.

Pou Mahe i pou kout nou environ R2bilyon pou kapab etabli environ 10 *STP* avek zot *catchment* annan tye pou kouver Mahe ziska lo en nivo pre 50met oter koumsa.

Mr Speaker, nou pa ankor kapab arive fer en gran progre, an term ganny sa bann *bailleurs de fonds* pou agree lo bann kondisyon preferab pou kapab lans sa *master plan* an

son mazorite, dan son lanpler.
Mersi Mr Speaker.

MR SPEAKER

Mersi. Bon mon a pran lot kestyon, mon pou bezwen en sanzman delegasyon pou pran lot kestyon. *CEO PUC* avek son Deputy pou kit nou. Mon a dir zot mersi bokou e Madanm Raporter ou ava apel delegasyon pou kestyon 65 ek 66.

Bonzour e byenveni Mr Tony Imaduwa, Sekreter Prensipal pou Sanzman Klima. Kestyon 65 Onorab Woodcock.

HON WAVEL WOODCOCK

Mersi Mr Speaker. Bonzour Minis Dezinyen, ou lekip, tou Manm e tou dimoun a lekout. Mon kestyon i *comme* swivan;

An vi ki Prezidan ti deklare ki finansman pour proze *rock armouring* sorti Amitié vizavi *airport* ziska Roche Corbizeau pour ganny finanse anba lasistans *Travizory*:

(1) Ki pou arive avek sa *rock armouring* ki deza egziste e ki pe degrengole e dezyenmman kan eski sa proze pou komanse? Mersi.

MR SPEAKER

Mersi. Minis.

DESIGNATED MINISTER
JEAN-FRANCOIS FERRARI

Mersi Onorab. Mersi Mr Speaker. Mr Speaker travay pou aranz sa *rock armouring* ki deza la, ki deza egziste e ki pe degrengole, Onorab i annan rezon. In ganny azoute avek sa pli gran proze *rock armouring* ek konblaz sorti Amitié vizavi *airport* ziska Roche Corbizeau.

Onorab mon krwar ou ti la ler zot ti vizite avek Prezidan e nou ti deside ki sa landrwa i bezwen annan en travay ki konpreansiv. Alors nou ava-Prezidan ti'n deklare ki - ti'n deside ki nou ava pran li antye depi kot *airport* ziska kot lo Roche Corbizeau.

Alors kan eski sa proze pou komanse? Dat pou proze pa ankor etabli, dat pou li komanse. Sa i aköz sa proze prezan pe ganny konsidere koman en proze mazer dan sa landrwa ki pou anmenn plizyer lezot benefis an plis ki proteksyon lakot.

I pou anmenn lespas e later an plis pou kapab fer lezot pti biznes par egzanp. Alors i enportan ki bann diferan letid i ganny fer. Bann travay *survey* lo teren pou sa proze in fini ganny fer e *surveyor* in anvoy sa bann lenformasyon kot enzenyer ki an se moman pe travay lo *design* sa proze.

Nou pe estimen ki enzenyer pou pran apepre 3 a 4 semenn pou travay lo la e ankore en 2 semenn pou fer son *costing*.

So, nou pe get en 2 a 3 mwan, pou nou kapab annan devan nou en proze konpreansiv pou nou gete ki manyer nou pou lev bann fon pou sa.

E parey mon'n dir pli boner Onorab Woodcock, i en proze ki al en pe pli lwen ki proteksyon lakot. Akoz i pou anmenn en pe konblaz; i pou anmenn en pe plis lalimyer dan lespas piblik; i pou permet pou amelyor drenaz dan sa landrwa; i pou permet annan en devlopman en pti *waterfront*.

E osi enn bann proze ki pe ganny azoute avek kekfwa zot ava rapel, ti annan deza en *slipway* ki ti pe servi par SFRSA dan sa landrwa ki'n ganny abandonnen apre en pe letan, e ki pou ganny rehabilite, pou ganny rekonstrir. Donk vwala en pe *scope* sa proze Onorab. Mersi.

MR SPEAKER

Wi, ou siplemanter Onorab Woodcock.

HON WAVEL WOODCOCK

Wi Minis. Zis en pti klarifikasyon. Eski finansman

pou sa proze pou sorti anba *Travizory*, ouswa i pou sorti en lot landrwa dan Bidze Gouvernman ouswa atraver en lot *funding*? Mersi.

DESIGNATED MINISTER JEAN-FRANCOIS FERRARI

Mersi Onorab. Onorab dapre lenformasyon ki mon annan i pou omwen parsyelman sorti dan, kot *Travizory*. Akoz ler lanons ti ganny fer ti en proze ki miner e bann fon ki antre atraver *Travizory* i pa bann fon enorm.

Donk ler proze in ganny agrandi finansman osi i bezwen ganny agrandi. Alors parsyelman i pou ganny finanse par *Travizory*, me i tre probab ki pou bezwen annan en lot sours finansman konplemanter. Mersi.

MR SPEAKER

Mersi. Onorab Cosgrow.

HON WALLACE COSGROW

Mersi Mr Speaker. Bonzour Minis. Bonzour Mr Imaduwa. Mr Speaker an vi repons Minis bomaten la lo sa proze e Minis in fer nou remarke ki poudir sa proze i pou pran en pli gran lanpler e ki i pou petet annan nesosite annan konblaz e bann lezot *rock armouring*.

So eski Minis i kapab konfirm ek nou, si in annan bann diskisyon avek Departman Lanvironnman e si zot in komans inisyete petet en serten nivo *EIA*, pou kapab assess lenpak ki sa pou annan lo lanvironnman dan sa rezyon? E eski Minis i kapab dir nou si i annan travay? Eski travay in komanse ouswa ki pe ganny fer an sa ki konsern pou assess bann opsyon ki ti ganny propoze pou met dan sa ranze delo la, akoz zisteman sa kantite lentansite ki laroul i vin avek, ki bat lo lakot e ki afekte bann *rock armouring*.

So eski Minis i kapab dir nou si i annan sa bann demars?

MR SPEAKER

Mersi. Minis ou repons.

DESIGNATED MINISTER
JEAN-FRANCOIS FERRARI

Wi. Mon kapab donn laparol avek *PS Imaduwa silvouple* lo la? Mersi.

MR SPEAKER

Yes, wi.

PS TONY IMADUWA

Mersi Mr Speaker. Mersi *DM* pou donn mwan loportinite pou reponn Onorab Cosgrow.

Wi proze parey *DM* in mansyonnen avan larzan ki ti

ganny *allocate* ti pou protez sa lakot *Amitie*. Me apre vizit, Prezidan ti anonse ki i anvi en pli gro proze. E nou ti'n fer tou *survey*, nou ti vizit landrwa e nou'n vwar ki sa proze pou sorti lo sa baz ki nou ti a dir en pti proze pou vin en pli gro proze mazer.

E ler nou ti pe fer diskisyon avek bann diferan *stakeholders*, nou ti vwar i annan serten eleman ki kapab *still* ganny enkorpoze dan sa proze.

E sanmenm sa ki ler Minis in reponn in dir koumsa i en proze ki pa zis pe regard proteksyon lakot, me plizyer bann lezot sityasyon ki pe afekte sa landrwa.

So i annan *issue* lalimyer i enn; i annan en *issue* drenaz i en lot, semenn li menm. E osi ti annan serten *request* sorti from diferan group *within* Praslin menm; parey pou annan en landrwa pou kre en serten lespas pou bann aktivite pti biznes. Ti annan ti *issue* lwazir pou bann dimoun vin detann, en *boardwalk*.

So prezan nou pe vwar li koman en *major* proze ki nou kapab vin devan avek. So lo kote letid e sanmenm sa ki in dir i annan plizyer letid pe ganny fer. Premye letid ki'n ganny fer se sa *survey*, *topo*

survey pou regard sa landrwa *itself*, sa *design* ki nou pou vin avek. E apre la nou pou komans enkorpor tou bann lezot eleman;- parey *environmental*, *social impact* ki sa proze i kapab annan.

So, i pou vin parey mon dir en proze mazer. E an menm tan nou deza pe an diskisyon avek bann diferan partner enkli Lanvironnman, *SIA*, *Planning* tousala. Mersi.

MR SPEAKER

Mersi. Yes, klarifikasyon silvouple.

HON WALLACE COSGROW

Wi, Mr Speaker mersi. Mr Speaker sa sit la i enn bann parmi 5 sit si mon pa tronpe ki ti ganny idantifye anba en proze finanse par *World Bank* pou proteksyon lakot.

Ti annan serten keksoz ki ti bezwen ganny fer la sirtou bann letid kouran, bann letid *bathymetric studies* pou kapab etabli si sa landrwa, ki kalite *rock armouring*, kalite lentervansyon i devret kapab ganny fer pou protez sa lakot.

So se sa ki mon pe demande, eski sa pe *ongoing*, ouswa eski pa ankor komanse tousala? Mersi.

MR SPEAKER

Thank you. Minis. PS.

PS TONY IMADUWA

Mersi Mr Speaker. Wi sa letid i sa landrwa li *itself* in ganny idantifye anba sa proze *Coastal Management Plan* ki *World Bank* in fer.

So i deza annan sa letid preliminar. *So, that's why* ki inisyman ti annan sa protez sa lakot. E sa proze la prezan in devlop pou, in vin pli gran. I pa zis protez lakot, me osi *provide* lezot benefis ki sa landrwa i kapab donnen. So i vin en pti git pli gran ki zis protez lakot. Mersi.

MR SPEAKER

Mersi. Kestyon Onorab Herminie.

HON WILBERT HERMINIE

Mersi Mr Speaker. Mr Speaker avan tou mon ti anvi ganny li kler. Ou'n dir koumsa taler ki *LOTO* i mal, savedir i *ok* pou en Minis maltret mwan.

MR SPEAKER

Onorab si ou annan en kestyon ou poz li, mon pa pe al antre dan sa bann zafer. Mersi. Poz ou kestyon.

HON WILBERT HERMINIE

Mon kestyon i senp mwan. Vi ki sa proze ti'n ganny konsevwar

depi lontan, konbyen proporsyon larzan ki *Travizory* pe mete dan sa proze? Mersi.

MR SPEAKER

Thank you. Minis.

**DESIGNATED MINISTER
JEAN-FRANCOIS FERRARI**

Mon pa pou konnen mon napa sa repons Mr Speaker. Me mon *very willing* pou mwan rod sa lenformasyon, pou mwan fer ou gannyen Onorab. Mersi.

MR SPEAKER

Mersi. Bon mon pou termin sa sesyon kestryon la. Nou a pran poz e mou a rebran 11er. Mersi.

(BREAK)

MR SPEAKER

Nou a rebran lo kestryon e nou ankor annan Minis ek *PS* Imaduwa. Limero 66 Onorab Andy Labonte.

HON ANDY LABONTE

Mersi Mr Speaker. Bonzour Minis avek ou *panel*, bonzour tou koleg Onorab e tou dimoun ki a lekout. Kestyon 66 i lir koumsa;

Minis, eski i posib pou ganny en kontrandi lo dernyen devlopman proze drenaz Quincy kot Fondaumiere? Mersi.

MR SPEAKER

Mersi Onorab. Minis.?

**DESIGNATED MINISTER
JEAN-FRANCOIS FERRARI**

Mersi Mr Speaker. Mersi Onorab. Onorab sa proze ti ganny retar dan prosedir *tender*, kot in annan en pe konplikasyon avek bann *tender* ki'n antre. Nou ti bezwen travay avek bann lazans konsernen pou fer sir ki sa proze i ganny *awarded* avek sa kontrakter ki apropiye e ki merite.

Mon kontan pou enform zot ki sa in ganny rezourd, sa problem in ganny rezourd, *allocation of tender* e proze in fini ganny *awarded* e nou ekspekte ki travay lo sit i komanse tre byento.

So si sa i kapab satisfere ou, nou ti annan problem avek *tender*, akoz *tender* ti'n ganny mal fer e me la sa in ganny rezourd e travay i sipoze komanse tre byento. Savedir avan lafen lannen. Mersi.

MR SPEAKER

Mersi Onorab Labonte ou annan siplemanter?

HON ANDY LABONTE

Mersi Minis pou ou larepons. Sa i ava rekonfor bann dimoun

ki pou benefisye avek sa proze laba Quincy.

Zis petet Minis pou elabore, vi ki ti annan en bout finansman an 2022 ki ti la, e nou ti ganny dir ki sa bout finansman pou ganny azoute avek sa bout ki'n ganny mete pou sa lannen.

So eski i vedir ki tou lede pou met ansanm e nou pou vwar konpletman sa proze i ganny konplete enn fwa pour tou? Mersi.

MR SPEAKER

Mersi. Minis ou'n sinyal PS.

PS TONY IMADUWA

Mersi Mr Speaker. Mersi Onorab pou ou kestyon. Wi finansman i la pou konplet sa proze.

MR SPEAKER

Thank you. Nou termin la pou sa kestyon. E *ah*, wi nou bezwen fer sanzman delegasyon. Donk mon remersye PS Imaduwa pou son partisipasyon.

E Madanm Raporter ou ava apel delegasyon pou kestyon 67.

Program delegasyon i en pti pe konplike ozordi, nou annan plizyer sanzman.

Bon, bonzour e byenveni Mrs Jeanette Larue, Direkter

Zeneral pou *Public Education Community Outreach* dan Minister Lagrikiltir. I annan Sharon Gerry, *Senior Legal Officer* dan sa Minister. E kestyon i limero 67 Onorab Gervais Henrie.

HON GERVAIS HENRIE

Mersi Mr Speaker. Mon ava dir bonzour tou bann dimoun sirtou bann dimoun Mont Buxton. Kestyon 67 i lir koumsa;

Eski Minis pour Lanvironnman i kapab dir nou Lasanble ki progre son Minister in fer dan promosyon ledikasyon piblik e laplikasyon bann Lalwa avek regilasyon lanvironnman depi 2020? Mersi.

MR SPEAKER

Mersi Onorab. Minis ou repons, wi.

**DESIGNATED MINISTER
JEAN-FRANCOIS FERRARI**

Ok Mr Speaker. *Ok* mersi Mr Speaker. Mersi Onorab Henrie pou ou kestyon. Mon repons pou en pti pe long. Me i neser pou nou eksplik byen.

Minister Lanvironnman in deza angaze avek Minister Ledikasyon - parey ou konnen - pou promot ledikasyon lanvironnman dan ban lekol. Sa

i ganny fer dan program *eco school* kot lekòl i adopte bann pratik soutenab. Sa program pe ganny enplimante dan tou lekòl primer, segonder dan lekòl Gouvernman.

Pandan sa 3 lannen ki'n pase, nou'n reisir entrodwir sa program osi dan serten lekòl prive. Donk Minister lanvironnman pe fer son mye pou angaz tou lezot lekòl prive pou zwenn sa program.

Pou asire ki sa program i ganny enplimante byen korekteman, Minister Ledikasyon in fer sa program vin *compulsory* dan tou lekòl Gouvernman. Bann program i ganny enplimante pandan lannen e lekòl ki fer pli byen lafen lannen i ganny rekonpanse.

Pou asir soutenabilite e kontinite dan sa program, Minister Lanvironnman i osi antreprann ban *training* pou bann ansennyan, ensi ki bann zanfan. Plis ki 300 ansennyan ledikasyon lanvironnman in ganny *train* ziska prezan, ensi ki 500 zelev *youth group* pandan sa bann dernyen lannen.

Sa i montre lefikasite en tel program. Minister Lanvironnman i osi sipòrt bann lorganizasyon non-gouvernmental, ensi ki bann

diferan group ki apros li pou lasistans teknik ensi ki Lasistans finansyel. Par egzanp nou pe travay tre pros avek sa lorganizasyon ki apel *Parley for the Oceans* nou'n osi fasilite travay ek bann lorganizasyon, avek bann lekòl lo Mahe, Praslin e La Digue.

Nou'n osi agrandi nou bann program ledikasyon sa bann dernyen lannen pa selman pou target bann lekòl, me osi pou target bann biznes bann Departman Gouvernman e osi la kominote an zeneral.

Minister Lanvironnman pe esey anmenn lenplimantasyon bann program tel parey bann *sustainable development goals* pli pre dan distrik. Nou pe fer ledikasyon *door-to-door* pou asire ki tou dimoun i ganny enplike dan sa program e ki sa bann program i vin en sikse.

Minster lanvironnman in met an plas en program kot bann distrik, biznes e osi bann endividi, i kapab partisipe. Bann lorganizasyon in kapab servi bann diferan prodwi par egzanp lannen pase pou fer *l'arbre de Noel*. Sak fwa ki annan en lafet nou envit zot pou mazin lanvironnman.

Nou vwar ki en tel program i ede pou devlop bokou lentere dan distrik, e angaz bann marmay dan bann

programm proteksyon e rehabilitasyon lanvironnman.

Nou pou kontinyen edik bann manm piblik lo lenportans redwir, reservi e resikle parey ou konnen *the 3 Rs*.

Minister lanvironnman in osi angaze dan bann *roadshows* pou sey edik lamas. Pou komemor Lazournen Mondyal pou lanvironnman en *roadshow* ti ganny fer semenn pase, kot Minister in sey anmenn son bann travay pli pre avek la kominote.

In ganny fer e in ganny bann *feedback* vreman pozitiv e sa pou ed sa Minister pli byen planifye son bann programm ledikasyon lanvironnman pou le fitir.

Mr Speaker, bann Onorab in osi partisip dan bann tel sesyon ensi ki bann ladministrater distrik lo serten topik, tel parey sanzman klima e devlopman en lanvironnman soutenab. Nou pou kontinyen angaz avek bann politisyen dan bann tel programm.

Minister Lanvironnman pe osi antreprann 2 poze pilot pou demar *eco district award* pou demontre bann bon pratik ki kapab ganny fer par bann dimoun dan la kominote.

I enportan pou nou ki manm piblik i zve en rol kle dan

sa bann programm. Nou osi profite pou endik dimoun lo bann diferan problem ki afekte nou lanvironnman, pandan bann *theme days* ki nou selebre tou le-z-an.

Sa bann programm i ganny fer avek bann lekol, biznes, lasosyasyon, Gouvernman eksetera e lakominote an zeneral. Minister Lanvironnman pe osi antreprann en proze ansann avek tou bann lofis Gouvernman ensi ki bann lofis, ban konpanyen parastatal pou edik zot lo bann meyer fason pou promot bann pratik soutenab dan zot lorganizasyon.

Minister pe deza kominik avek bann zofisye kominikasyon, zofisye lenformasyon e relasyon piblik, vi ki zot ki senm sa mesaz dan zot landrwa travay respektif. Bi sa proze i pou edik zot lo lafason konserv delo par egzannp, separ salte, konserv lenerzi e osi envestir dan bann lekipman efikas e soutenab.

Mr Speaker ou pou agree ki konmela i annan plis bann *tv spots*, programm radyo e osi bann lartik lo medya sosyal konsernan bann diferan tenm parey zesyon salte, biodiversite; sanzman klima, lekonomi

sirkiler e osi proteksyon nou lanvironnman.

Sa i vin posib apre ki Minister Lanvironnman in zwenn avek bann *producers* dan bann program radyo e televizyon pou diskite lo bann tenm ki dan sa - ki anglob bann program lanvironnman.

An se moman i annan en program ki pas tou le mwan lo radyo e en lot lo televizyon. Bi sa bann program se pou promot ledikasyon lanvironnman. Pou azoute Mr Speaker boner sa lannen, apre en seri diskisyon Minister Lanvironnman in siny en kontra lan avek *SBC* pou bann *advert* lo radyo e televizyon, ki'n kout Minister Lanvironnman R118mil.

Sa seri *advert* pou ganny *broadcast* pou edik la popilasyon lo diferan lofans, e regilasyon lanvironnman parey Onorab in demande kot son kote legal, son bann konsekans ki ganny atase avek ler ou pa respekte lanvironnman.

Nou'n osi siny en kontra lan avek *Today* avek *NISA* pou en sonm R149mil. An se moman Minister pe travay lo en proze pou refer *website*, ki pou osi enkorpor Departman Lagrikiltir ki en partner kle e osi Departman Lapes e Departman Lekonomi Ble.

Dan sa dernyen 2an nou'n vwar serten defayans lo bann diferan laplikasyon, ki nou met dan laporte piblik e nou pe - Minister Lanvironnman avek son tim komunikasyon pe aranz sa.

Pou asire ki laplikasyon bann Lalwa avek regilasyon lanvironnman i osi ganny fer, Minister Lanvironnman i entansifye son zefor pou edik dimoun konsernen Lalwa lanvironnman ensi ki bann lofans e son bann konsekans.

Pou nou reste azour avek bann ka, Minister Lanvironnman i osi angaz avek Lakour pou konnen kan bann ka i ganny diskite e bann desizyon ki Lakour i pran. Sa i ede nou edik dimoun lo sa bann ka e lo bann seksyon ki ganny mete lo piblik.

I bon note ki Minister Lanvironnman in osi komans travay ek bann Ladministrasyon Distrik Onorab, lo bann ka ki ganny konsidere ilegal. Minister Lanvironnman i anvii ki bann ladministrater distrik i vin sa lizyer pou fer zot vin pli efektiv an vi ki lafors travay i pa tro gro dan Minister Lanvironnman alors nou pe *link up* avek bann ladministrasyon distrik pou zot osi fer zot bout.

Travay ek distrik pou kontinyen, travay avek bann reprezantan, bann Onorab e tou bann dimoun ki travay o nivo distrik sa lannen e osi bann lannen ki vini pou ganny entansifye. Mersi Mr Speaker.

MR SPEAKER

Mersi Minis pou sa repons. Siplemanter Onorab Henrie.

HON GERVAIS HENRIE

Mersi Mr Speaker. Dabor mon ti ava kontan remerci Minis pou larepons byen detaye. E lo sa not osi felisit tou bann dimoun ki pe fer en keksoz pou nou lanvironnman bann *eco warriors* nou kapab apel zot devan la nou vwar 2 dimoun a kote ou ki pe fer bokou. Mersi pou sa.

Mon kestyon Mr Speaker, premyerman mon ti ava kontan demann Minis pou dir nou baze lo la kantite zefor ki zot pe fer, solman ki defi ouswa febles zot santi i ankor annan dan tou sa ki zot pe fer ki kapab aziste? E ler la konmsi nou osi nou kapab swiv zot koman Lasanble pou vwar kwa ki nou kapab fer. Sa i premye.

Dezyenmman, in koz lo kestyon Lakour e mon krwar si ti annan en pe statistik lo bann *cases* ki Minister in anmennen pou montre *how serious we are*

e pour *deal* avek bann dimoun mon krwar sa ti ava en bon lenformasyon pou piblik Seselwa satisfte poudir vreman nou serye.

E trwazyenmman petet pa en kestyon me en sizesyon Minis in dir ki lafors travayer dan Minister Lanvironnman i pa tro gro, e alor apard ladministrasyon distrik mon krwar kekfwa en keksoz nou kapab konsidere pou travay avek bann *NGO* ki dan Sekter Lanvironnman, ki zot kapab ede avek sa bann *door-to-door* ki Minis in koz lo la.

Apros bann *NGO* lanvironnman, demann zot pou form koman en brigad. Al dan bann distrik, lot zour *PMC* in dir nou i annan 165 *housing estates* dan distrik Mont Buxton i annan 7 parmi sa 165.

Mon a donn zot en koudmen. Vin kot nou, koz ek bann dimoun, eksplik zot ki nou dwatet pe fer, pa pe fer e donn zot en pti larzan anba *Environment Trust Fund* pou ankouraz zot. En pti *t-shirt*, delo, *soft drink*. *I'm sure* nou kapab fer bokou pou Sesel ankor. Mersi.

MR SPEAKER

Mersi Onorab. Minis.

DESIGNATED MINISTER
JEAN-FRANCOIS FERRARI

Mr Speaker mersi e mersi Onorab. Mrs Larue i ava reponn en pe sa kestyon, me selman mon ti a kontan dir ki pou Minister Lanvironnman pli gro defi se ki nou popilasyon. E nou menm nou par ler nou mazine poudir proteksyon lanvironnman i pa nou zafer i zafer Gouvernman.

E i biznes bann lorganizasyon spesyalize e sa i en gro defi. Akoz ou konnen, en pti legzanp ki ler en dimoun i zet en boutey plastik dan bor semen ou demann li akoz i fer sa i dir ou, wi en dimoun pou anmase. Konmsi i pa son problem.

E si nou ti kapab - e sa i en lapel avek zot tou ki la bann reprezantan piblik, bann reprezantan bann distrik, pou pas sa mesaz ki lanvironnman si sakenn i fer son pti bout, si sakenn i anmas 2 e i dispoz son salte byen e pa depoz li lo lans oubyen dan bor semen, deza nou'n fini fer en gran pa dan proteksyon e amelyorasyon nou lanvironnman.

Donk lanvironnman, proteksyon lanvironnman i nou biznes koman en pep, i pa biznes Gouvernman. Me Mrs Larue i ava dir zot ki enn de bann moman pli difisil, bann

challenge en pe pli serye ki i gannyen kekfwa. Mersi.

MR SPEAKER

Mersi. Mrs Larue ou ava azoute.

DG JEANETTE LARUE

Mersi Mr Speaker. Enn nou *main challenges* i byensir *cost* finansye. Akoz par egzanp konmela nou bezwen profit lo SBC oubyen *TéléSesel* pou fer sa bann keksoz.

But ki nou fer *at the beginning of the year* nou meet sa bann *producers* nou. Me selman i annan keksoz ki zot pa, kekfwa pa ganny sans kouver. Kekfwa nou anvi prodwi nou prop program.

Mon pou donn ou en legzanp par egzanp pou prodwi en program 20minit nou pe pey, pli ba pri ki nou gannyen konmela i R35mil pou fer prodiksyon en bon program. Pou pas lo SBC sa program vi ki i pa'n prodwi par SBC, lot fwa mon'n negosye ti'n ariv mwan ziske R8mil pli ba ki mon ti gannyen.

Ti komans ek R16mil en program. Prezan mazin si ou pou get Bidze ledikasyon i sa pli pti Bidze dan Minister Lanvironnman. E nou lot se resours imen.

Nou Minister par egzanp in agrandi la, mon bezwen sey

balans en pe anmenn lagrikiltir. Kot lanmenm ler nou'n anmenn *sustainable homes*, lanmenm ler ki ou pe dir kot lakour se la ki nou ganny sans nou fer *home visit* nou, nou bezwen komans fer *home visit*.

Nou annan 3 nou ki sipoze lo *field*, me selman vi ki nou annan mon pran sekreter i ale nou *graphic officer* osi i al ek nou li. So nou travay koman en tim zis 5 nou lo *field*. Me selman mon bezwen dir parey lo kote ledikasyon, Minister Ledikasyon nou ganny *very good*, nou travay tre bon partnership avek Minister Ledikasyon. Nou ganny *very good support from* Minister Ledikasyon.

E dan distrik osi nou pe ganny bon sipor avek bann *DAs* konmela. Nou'n vwar nou annan en *good team*, kot *Community Development* ki ed nou bokou.

Lo sa bout ki ou'n koz lo *housing estate*. Nou'n sey komanse, *in fact* pa ti vin *housing estate*. Parey ou pou vwar lannen, semenn pase nou *handover en like a pilot project* lo Praslin, Grand Anse Praslin kot Tamatave in demann nou en kantite., en?

Akoz depi lannen pase nou'n travay lo la, parey mon pe

dir ou i annan zis 3 nou, nou bezwen monte Praslin. Nou'n bezwen fer *door-to-door* li osi. Kot tou sa bann dimoun, avan, olye koman anler nou'n komans anba nou. Fer sa bann dimoun konpran ki nou pe sey vin fer akoz nou pe met plis bin, akoz nou pe met ban.

Akoz ler nou ti al kot vizit *housing estates* pou nou swazir enn, bann manmay pe asiz lo *pavement*, ler loto i vini zot bezwen leve. So petet sanmenm savedir ki ban i fer dan lanvironnman. Pou nou met sa bout sosyal i enportan.

So sa proze i en proze ki'n lonterm, ki'n ganny en bon pe partisipasyon apre nou'n ganny en pe *sponsor*. In *successful* akoz nou'n bezwen tap laport bann *sponsor* partou, partou lo Praslin.

So, nou fer *door-to-door*, nou ti a kontan fer plis *door-to-door* pou edik dimoun parey ou pe dir dan *housing estate*. Me selman nou bezwen led akoz i annan zis 3 nou, nou pa pou kapab kouver tou sa *housing estates*. Mersi.

MR SPEAKER

Mersi madanm. Nou pou pas lo kestyon siplemanter lezot Manm. Mon annan move nouvel, mon annan 10 Manm. Mon pou sey limit li en kestyon

par Manm silvouple, en kestyon zis pou permet otan posib demann kestyon. Premye Onorab Michel Roucou.

HON MICHEL ROUCOU

Mersi Mr Speaker. Minis i annan bokou ledikasyon ki pe ganny fer.

Be selman si zot kapab dir nou ki lanfaz zot pe met plis an term bann dimoun ki reste en pri pe pli pre o bor larivyèr li menm li, pou fer sir poudir zot *dispose* zot salte kot i merite ki i pa demen i al fini dan delo sale? Mersi.

MR SPEAKER

Mersi Onorab. I en kestyon Minis larepons.

**DESIGNATED MINISTER
JEAN-FRANCOIS FERRARI**

Onorab mon krwar mon kapab reponn sa kestyon mwan menm mon.

Tou bann Lotorite piblik i konsern en kantite avek proteksyon bann larivyèr pou gard zot prop. E nou'n vwar poudir si nou pa fer li nou ganny bann *flooding* e i annan en lenpak sosyal ki pa dezirab.

Alors mwan mon kapab o non, Minister Lanvironnman dir ki i annan en kantite travay ki ganny fer pou sansibiliz piblik pou pa servi larivyèr

koman en *dustbin*. E fodre, nou bezwen kontinyen toultan fer sa akoz i en gro *challenge*.

E nou konnen poudir sa ki sorti dan montanny finalman kot i arive, i ariv dan delo sale i ariv lo nou lans e si nou pa komans dan en larivyèr, be nou pa pou kapab *deal* avek bann salte ki ariv bor lanmer. Mersi Onorab.

MR SPEAKER

Tre byen mersi. Onorab Pillay. En kestyon silvouple.

HON SEBASTIEN PILLAY

Mersi Mr Speaker. Mr Speaker mon ti a prefere pou annan Minis Lanvironnman pou reponn sa bann kestyon.

MR SPEAKER

Ok.

HON SEBASTIEN PILLAY

Mon pa konnen akoz i pa dan Lasanble ozordi, mon pa'n tann sa lenformasyon.

MR SPEAKER

Onorab mon'n anonse ki Minis in vwayaze lo en misyon, Minis Dezinyen in pran son plas, silvouple akseptè.

HON SEBASTIEN PILLAY

I vwayaze selman i konnen i ti annan kestyon.

Mr Speaker mon kestyon pour Minis premyerman mon oule felisit bann dimoun ki pran bokou letan pou zot fer zot travay avek *eco school* avek bann zanfan. E pandan plizyer lannen nou pei in *successful* par lefe ki ozordi dan bokou fanmir si zot zanfan i vwar zot paran pe menm kwi torti se zanfan ki pou telefonn lapolis. So nou'n ariv lo sa nivo.

Me selman mon konsernen avek en keksoz ki Mrs Larue in dir an sa ki konsern Bidze ki sa departman pou ledikasyon i gannyen. Lefe ki nou napa Minis pou Lanvironnman, ozordi nou ankor dan mwan Zen e Prezidan, Vis-Prezidan pa la e Minis Ferrari i la.

Petet li i kapab donn ou en *commitment* koman limero 3 dan Gouvernman, son Minister i en Minister ki *handle* en Bidze sibstansyel anba *-well*, i ganny sanz zer bann Bidze ki konsern avek Lekonomi Ble.

E lefe ki Lekonomi Ble i annan en konotasyon direk avek lanvironnman eski nou kapab ganny en *commitment* avek Minis Ferrari ozordi bomaten, ki Departman Lekonomi Ble pou vwar ki mannyer zot osi zot kapab siport Minister Lanvironnman

atraver rod bann *bailleurs de fonds*.

Pou ed sa program *eco school* osi ogmant son lanpler, akoz mon konnen i osi ed bann zanfan vizit bann zil elwanye, zot al fer bann travay anmas salte eksetera. So eski Minis Ferrari i kapab dir nou keksoz lo la Mr Speaker?

MR SPEAKER

Mersi. Minis ou repons.

DESIGNATED MINISTER
JEAN-FRANCOIS FERRARI

Mersi Mr Speaker. Mersi Onorab. Onorab mon pa tro krwar nou kapab diskite Bidze dan *Question Time* akoz si non nou pou, mon pa pou tro responsab, me selman mon ti a zis kontan dir ou ki nou deza - Departman Lekonomi Ble pe deza partner avek Minister Lanvironnman pou zisteman fer ledikasyon lanvironnman. Mersi.

MR SPEAKER

Mersi. Onorab Arissol.

HON SANDY ARISSOL

Mersi Mr Speaker. Bonzour Minis. Bonzour Mrs Larue avek Ms Gerry.

Mr Speaker mon kestyon mon ti a kontan demann avek *panel*, toudmenm mon ti a

kontan dir Mrs Larue mersi bann led ki ou donn distrik Bel Ombre an relasyon avek lanvironnman, bann program ki ou fer.

Mon vwar zot met lanfaz lo, mon'n tann koz torti, kantite lanfaz i ganny mete pou pa manz torti e protez nou torti e i annan Lalwa pour sa e i ganny pase lo medya lo nasyonal poudir en dimoun i ganny atrape son santans.

Be keston ki mon anvi demande an relasyon avek bann dimoun ki annan bann propriyete, kot i annan son pye dibwa ki afekte en lot vwazen, oubyen ki afekte propriyete Gouvernman dan lanvironnman, eski i annan en Lalwa sa?

La nou dan vandswet, bann dimoun pou komans *call MNA, call DA, call* tou Reveran, pou *call* Vatikan pou dir i annan pye dibwa ki afekte li parske sa-. Eski i annan menn lentansite parey zot met lo torti, i an lo pye dibwa, i annan lo lezot Lalwa Lanvironnman? Mersi bokou Mr Speaker.

MR SPEAKER

Mersi. Minis. Tre byen. Madanm *Legal Counsel* pou reponn.

SENIOR LEGAL OFFICER SHARON GERRY

Ok, mersi *Designated* Minister. Mersi Onorab pou ou keston. Lo sa size pye dibwa danzere i enn ki en pti pe sansib. Kot Minister lanvironnman nou annan en Lalwa ki apel *Breadfruit and other Trees Protection Act* ki protez, ki donn proteksyon serten pye dibwa.

E se sa ki nou kot Minister Lanvironnman i ki sel Lalwa ki relye ek pye dibwa ki nou, nou zere, ki dimoun ki bezwen koup sa bann pye dibwa lo sa lalis pye dibwa proteze la wi kot nou entervenir.

Me i annan bokou lenstans dan bann ka parey ou'n mansyonnen ki sa bann pye dibwa pa neserman bann pye dibwa proteze. Kot la i vin en pti pe difisil kot nou, nou antre ladan pou petet ede. Nou *advise*, nou pran sa rol *advisory* kot nou *advise* vwazen poudir pye dibwa i en danze e nou *advise* zot pou koupe.

Me selman i annan bann ka kot zot pa koupe; kot la nou dezyenm rekour nou vin dan distrik, nou sey angaz distrik pou sey ede. Me la resaman i annan en program ki'n fek inisye ki enkli bann Zofisye *DRDM*, zofisye dan Departman Lanvironnman osi pou get en pe

sa bann *issue* pye dibwa danzere osi.

E zis mon azoute poudir nou Lalwa ki protez sa bann pye dibwa ki relye avek lamenzman pye dibwa pe ganny amande e byento nou pou annan plis mezir; nou pou annan plis, nou pou annan sa Lalwa ki pou kapab permet nou pran plis bann mezir lo sa kote pye dibwa danzere. Mersi.

MR SPEAKER

Mersi *Legal Counsel*. Onorab William kestyon.

HON WAVEN WILLIAM

Mersi Mr Speaker. Mon anv demann avek *panel* si zot santi poudir lapros ki zot pe pran vizavi ledikasyon e an menn tan laplikasyon Lalwa, eski sa lapros ozordi zot santi i ase konpreansiv ouswa i annan defayans avek? Mersi.

MR SPEAKER

Mersi. Minis.

**DESIGNATED MINISTER
JEAN-FRANCOIS FERRARI**

Mersi Onorab pour *et ase* bref. Mon krwar ki nou tou nou rekonnèt ki in plito en sikse, in plito en sikse e lemonn antye i rekonnèt poudir mannyer Lepep Seselwa i konsider lanvironnman i vremen en

sikse; en kantite progre sa bann dernyen lannen.

Donk be sa pa vedir ki nou devret zis asize e pa fer naryen. Nou kontinyen ankouraz bann program inovatif. Nou kontinyen sey rod komans avek bann zanfan ankor pli zenn. E la mon vwar poudir Minister Lanvironnman pe angaz menm avek lakres, aköz zot pe fer en program avek *Trotters* ki en pe pli ba.

Donk komans rod - al lo premye nivo menm pou nou kapab sansibiliz nou bann popilasyon depi ler zot ankor zenn. So mon krwar i en sikse e nou devret kontinyen. Mersi.

MR SPEAKER

Mersi. Onorab Samynadin.

HON KELLY SAMYNADIN

Mersi Mr Speaker. Bonzour Minis ek ou delegasyon. Minis mon kestyon lo sa parti laplikasyon bann Lalwa avek regilasyon lo kestyon orizinal; nou konnen ki i dan plan Departman Lanvironnman pou etablir en seksyon lo Lalwa *compliance* ek *enforcement*.

Ki zistans oubyen ki travay ki'n ganny fer dan sa direksyon ziska prezan? Mersi.

MR SPEAKER

Mersi. Minis. *Legal Counsel* pou reponn wi.

SENIOR LEGAL OFFICER
SHARON GERRY

Mersi pou kestyon Onorab. *With regards* pou sa seksyon nou'n ganny en pe difikilte aköz pou sa lannen nou pa ganny sa *funding* pou kapab etabli sa seksyon dan li menm.

Me selman nou, sa 3 *PS* dan sa Minister zot an konsiltasyon pou gete lekel bann *post* petet ki nou kapab pran pou kapab tanporerman rod *minimum* petet 1 a 2 *staff* pou kapab met sa seksyon an plas.

So pour le moman sa 3 *PS* i ankor an diskisyon pou gete ki *post* ki *available right now* ki zot kapab servi antretan ki nou ganny Bidze, petet 2024 nou a ganny Bidze pou vreman etabli sa seksyon? *Thank you*.

MR SPEAKER

Mersi. Onorab Aglae kestyon.

HON EGBERT AGLAE

Mersi Mr Speaker. Bonzour Minis ek *panel*. Minis dan sa lespri promosyon ledikasyon piblik kot i konsern lamenzman nou lanvironnman. Bokou distrik i annan li en klib lanvironnman.

E Port Glaud osi i annan enn ki aktiv.

Petet mon pe demann Minis ki Gouvernman pe mazin fer aköz zot annan en program aktivite tou le lannen, me selman resours pou zot kapab enplimant bann aktivite ki vize ver ledikasyon lanvironnman ek piblik, zot vwar zot dan difikilte.

Eski petet pe mazine petet pou annan bann resours osi ki ava kapab soutenir tou sa bann klib lanvironnman ki pe ne, ki'n ne, ki la ki pe pou zot kapab enplimant bann aktivite? Mersi.

MR SPEAKER

Mersi. Minis. *Panel*, Mrs Larue annou kontinyen gard bann repons bref *please*. Madanm Larue ou annan laparol.

DG JEANETTE LARUE

Mersi Onorab pou ou kestyon. Pou komanse se ki nou konnen i annan bokou bann distrik ki pe komans ek parey ou pe dir mwan Port Glaud in etabli. Be Port Glaud in ase etabli aköz i konn ki bor i pou al tap, pou al rod sa larzan. Aköz parey i annan *GEF Small Grant* i enn i siport bokou sa bann e mon konnen poudir Port Glaud. Aköz mon lo komite ki *approve* bann *funding*.

Port Glaud in deza ganny souvandfwa larzan e menm konmela i annan *Environment Trust Fund* ki pe al rod en fason ler ou vin *through* nou, nou kapab ed zot.

Me selman nou annan osi malerezman zot pa ti la lannen pase dan *training* ki nou ti demande pou bann *MNAs*, nou ti fer sanzman klima apre nou ti fer *district award*. Zis *District Award* i pou *gear towards* en pe parey sa model *eco school*, kot ou bezwen anmenn biznes akoz lotel par egzanp zot osi zot bezwen kontribye dan *sustainable label*.

So, zot pou anmenn tou dimoun ansanm pou zot kapab dan distrik pou zot kapab travay pou devlopman e Port Glaud mon'n fek ganny lalis sa 10 pilot. Port Glaud i lo sa lalis li, Port Glaud in aksepte pou *join* sa group, sa *pilot project* pou lan.

So *Eco District Award* pou sey aranz sa e nou ti a anmenn bann dimoun ki annan *funding*; sours *funding* fer prezantasyon sa zour. Me parye mon pe dir malerezman ti annan zis Onorab Sanders ki ti *attend* sa 2 zour *training*, i ti atann zis en bout.

So kekfw mesaz pa'n ariv kot zot lo sa bann keksoz. *Next time* ler zot vwar bann keksoz

partisipe zot a konnen kot pou ale. Mersi.

MR SPEAKER

Mersi. Mon sipoze oule dir Onorab Vidot. Dapre sa ki mon'n konpran. Mersi.

DG JEANETTE LARUE

Onorab Vidot ti atann en bout li.

MR SPEAKER

Mersi. Onorab Labonte.

HON ANDY LABONTE

Mersi Mr Speaker. Bonzour ankor enn fwa Minis avek ou *panel*.

Mon kestyon i al plizoumwenn lo laplikasyon bann Lalwa e regilasyon an konsernan lanvironnman. Ki Minister pe fer sa ki konsern polisyon an term loder kot *IOT*, par egzanp lafimen kot *PUC* e tapaz Stad Lanmizik? So ki zot pe fer pou adres sa bann sityasyon? Mersi.

MR SPEAKER

Ok ou'n met 2 size la silvouple *panel*. Bref.

DESIGNATED MINISTER JEAN-FRANCOIS FERRARI

Mersi. Onorab sa bann kestyon sa bann size definitivman i bann size konsern ki Minister

Lanvironnman in reflesir lo la, e i ankor pe reflesir lo la.

Me selman avek permisyon Speaker mon ti ava dir ki nou pa'n prepar larepons pou sa bann lenkonvenyans ki ou'n leve nou'n prepar nou larepons lo ledikasyon.

So avek ou permisyon nou ava reponn li en lot zour, *ok*. Mersi bokou.

MR SPEAKER

Ou a reponn pli long en lot zour. Mersi. Onorab Mondon.

HON TERENCE MONDON

Mersi Mr Speaker. Mon kestyon i lo statistik lanvironnman. Mon anvi demann *panel* si zot annan en sistenm database ki permet zot prodwi bann *statistics* lo lanvironnman ki kapab, diferan laspe lanvironnman e ki permet zot kapab mezir progre dan bann travay ki zot pe fer? Mersi.

MR SPEAKER

Mersi. *Panel*. Mrs Larue.

DG JEANETTE LARUE

Mwan mon a koz lo mon bout. Wi, nou annan statistik akouz nou fer bann evalyasyon parey pou *eco school* lafen lannen e parey bann *green line* osi i annan sa statistik ki reste la, ki aksyon ki'n ganny pran, kot in ale.

Apré nou annan nou *email*, *webmail* ki vin direk kot mon. Ki le mon ganny okenn *issue* mon fer *follow up*, so nou konnen kot i ale. So, tousala in ganny detaye.

Me selman bann lezot departman, divizyon, i annan detrwa divizyon parey konservasyon; i annan pour kote kot lafore, zot annan zot prop statistik ki zot anmase e sa i antre dan nou *quarterly report* ki apre nou anmase nou fer *annual*.

MR SPEAKER

Mersi. Onorab Georges ou kestyon. En kestyon *please*.

HON BERNARD GEORGES

Mersi Mr Speaker. Bonzour Minis avek ou delegasyon. Mr Speaker mon kestyon i tre bref mon oule remersye travay ki pe ganny fer sirtou par sa Minister lo ledikasyon dan matyer konservasyon ek lanvironnman.

Be mon kestyon i spesifik, eski i annan keksoz ki bann *NGO* ki deza egziste. Mon pe koz an partikilye *SIF*, *ICF*, *Nature Seychelles* bann *NGO* koumsa, ki nou kapab fer en pe plis pou asiste sa travay ki zot pe ganny fer. Mersi.

MR SPEAKER

Mersi. *Panel?* Madanm Larue?

DG JEANETTE LARUE

Lo kote *NGO* nou travay *very closely* avek- *SIF* i enn bann *NGO* ki nou travay *closely* avek e mon osi mon annan, *personally* mon annan en leker pou Aldabra ek Vallée De Mai. So i enn.

Me selman nou annan bann lezot *NGO*, parey ler nou fer bann *roadshows*, tou *NGOs* i *join* nou'n. Nou bezwen koz menm keksoz nou tou.

So nou travay *very closely* ansanm, me selman mon donn en bon pe pti latansyon lo bann pti nouvo *NGOs*. Mon annan en bon pe nou bann zenn, nou bann *youth* parey nou dir, bann *eco warriors* ki nou vwar pe fer zot prop bann *NGOs*. Zot nou donn zot bokou latansyon tou dilon pou ed zot pou ariv sa nivo.

I annan *NGOs* ki *very* - nou pe bezwen vreman al donn zot sa led pou al rod bann finansyel enternasyonal. So nou les zot debat. Me selman nou bezwen montre sa bann ptipti ki fek leve kote zot pou ale, ki mannyer zot pou ganny *funding*.

So nou travay bokou ek bann *youth* sanmenm. Mwan mon pou dir bann *youth NGOs* lo kote lanvironnman, i parmi

bann *youth NGOs* ki pli *successful so far* ki mon'n obzerve dan pei. Zot kontinyen, zot ede, zot fer en kantite keksoz.

So, wi nou pe travay *very closely*. Tou nou bann *roadshows* nou envit zot. Nou fek fer Komite Lanvironnman, en bon pe ti lo la. Apre konmela ek Minister Ledikasyon nou annan sa *UN UNESCO ... Day forum* kot nou annan bann *NGOs* e osi bann lezot Lazans menm medya i lo sa Komite ki nou *meet quarterly*. Mersi.

MR SPEAKER

Mersi. Onorab Gabriel.

HON CONRAD GABRIEL

Mersi Mr Speaker. *Welcome* Minis ek ou delegasyon. Bonzour tou dimoun a lekout. Tre bref spesifik Mrs Laure petet i a ed mwan.

I annan bann manrmay ki ganny problem dan lekol kot zot pa doue akademikman. So petet sa bann program ledikasyon parey *school organic garden*, mon krwar ti ava en bon nide pou enkorpor li, mon konnen zot resours Bidze.

Be solman zot ti a kapab fer en zefor. Si ou kapab donn nou en *commitment*. Ed sa bann manrmay silvouple. Mersi.

MR SPEAKER

Mersi. *Ok*, i annan en lyen avek ledikasyon la. *Yes Mrs Larue?*

DG JEANETTE LARUE

Yes, mersi Mr Speaker. Mersi pou ou kestyon Onorab. Wi nou travay *very closely* sirtou ek *TVET*. Konmela nou pe komans, en pe letan nou pe travay ek *TVET* en e i annan ki vin parey zot baze dan Zarden Botanik, i annan ki kot nou biro.

E nou menm dan vakans pran zanfan nou. Nou aranze ki, nou pran osi bann zanfan ki annan en lentere dan lanvironnman, ki pa ankor konnen par egzansp kote zot pou ale. So nou fer zot parey pas en semenn oubyen 3 zour dan en departman, dan en divizyon, nou bouz zot.

Me parey sa proze Grand Anse Praslin, kot zot in vwar sa ban in mete, basen delo. Be sa zis en tim *TVET* sa. Zot pa doue akademikman, me zot ti travay dir e zot *very skillful* e nou'n ed zot pou devlope.

Kekfwa i annan dimoun i dir nou'n ganny en pti pe koze par ler, ki dimoun i dir ou pe servi zanfan. Me selman nou'n vwar bann manrmay i prodwi bon keksoz.

E wi nou lentansyon se kontinyen travay ek zot. *In fact*, nou bann travay delo lapli ki

nou met dan lekol se bann zanfan ki koumsa. Me selman nou annan en lot *issue* la akoz, nou lot *issue* akoz sa parey nou annan bann proze zarden dan lekol, kot nou pran bann zanfan ki en pti pe parey ou pe dir pa kapab asize, nou fer zot fer lagrikiltir, donn zot zannimo *and all*.

Me apre nou'n ganny bann set akademikman ki o ki'n *complain* ki zis sa pe manrmay ki nou pe gete dan lagrikiltir. Ki nou realize, akoz si nou kontinyen koumsa, nou bezwen bann akademik dimoun osi ki kapab fer resers dan lagrikiltir.

So sanmenm sa prezan nou bezwen balans en pti pe nou bann program koumsa. Mersi.

MR SPEAKER

Mersi. Bon mon kontan dir mon'n ariv a lafen kestyon. Fotespere nou pa ganny problem ek letan pli tar. *Next*. Eskiz mwan mon a tyek delegasyon pou kestyon 68.

Wi nou pou dir orevwar Mrs Larue e Mrs Gerry e mersi pou zot partisipasyon e bonn kontinyasyon. E madanm raporter ou apel delegasyon pou kestyon 68. Mersi. Orevwar.

MR SPEAKER

Byen, pou kestyon 68 nou annan Mr Denis Matatiken, Sekreter Prensipal pou Lanvironnman. Mr John Quilindo, *Principal Forestry Officer* dan sa departman. Onorab Gervais Henrie, 68.

HON GERVAIS HENRIE

Mersi Mr Speaker. Kestyon 68 i lir koumsa, e dabor mon ava dir bonzour 2 dimoun ki fek zwenn nou, *welcome to the National Assembly*.

Eski Minis pour Lanvironnman i kapab dir nou Lasanble ki aksyon spesifik son Minister in pran lo size plant anvaisan dan pei depi 2020? Mersi.

MR SPEAKER

Mersi Onorab. Minis?

DESIGNATED MINISTER

JEAN-FRANCOIS FERRARI

Mersi Onorab e mersi Mr Speaker. Mr Speaker, Minister pou Lanvironnman in touzour reste angaze dan bann aktivite pou kontrol bann nespes anvaisan ki annan lenpak direk lo bann labita, lo bann nespes andemik ensi ki fonksyonnan leko sistenm.

Sa bann lespes i annan serten karakteristik ki fer zot pli konpetitiv, tel parey zot grandi pli vit, zot reprodwi pli vit, zot

dispers pli vitman e pli lwen dan lanvironnman. Depi 2020, Minister Lanvironnman in antreprann bann letid e aksyon spesifik lo Mahe e Praslin. Malerezman COVID-19 in retard en pe nou progres.

Avek finansman \$6.4milyon ki Minister Lanvironnman ti resevwar anba *Adaptation Fund* pou enplimant proze *Ecosystem Based Adaptation*, ou proze *EBA* parey nou konnen. Plant anvaisan ti ganny retire dan plizyer landrwa sirtou dan bann *catchment areas* ki enportan pou delo.

Sa bann aktivite ti ganny fer dan Caiman *watershed*, dan distrik Grand Anse Mahe, Anse Boileau e osi dan zanmerant Gran Bwa dan leo Anse Boileau menm.

E menm legzersis ti ganny fer pou retir bann lalyann ek bann plant anvaisan dan rezyon dan sours Val Dan D'Or, Baie Lazare. Resaman avek finansman anba proze *ridge to reef* ki pe ganny finanse par Fon Global pou Lanvironnman, bann lespes anvaisan ki ganny trouve anba kanopi in osi ganny retire.

Bann plant in bezwen ganny aste pou re bwaz landrwa kot bann lespes in ganny retire. Sa bann aktivite in kout

anviron \$350mil Ameriken. Sa sif i montre ki i kout ser, i kout vremen ser pou retir, re bwaz bann landrwa kot bann plant anvaisan in ganny retire.

Minister Lanvironnman ti osi resaman angaz 2 konsiltan lokal pou fer en letid detaye lo diferan lespes anvaisan. Bann ki nou merit konsider koman en priorite, kote zot ganny vwar e ki metod nou kapab servi pou retir zot.

Travay ti ganny fer an konsiltasyon avek bann partner, kle ki enkli bann parastatal e osi bann lorganizasyon non-gouvernmental. Sa bann konsiltan in prodwi en plan stratezik, en plandaksyon pour ede kontrol bann plant anvaisan.

Sa plan ti ganny finalize lannen pase e anba sa plan lanfaz ti sipoze ganny mete lo anpes nouvo lespes anvaisan antre dan pei.

Anpes lespes ki deza la pou propaze, redwir lenpak ki zot kapab annan lo bann labita e osi trouv fason pou entansifye kordinasyon ek nou bann diferan partner.

Mr Speaker, an vi ki nou ti mank resours imen dan Minister, mwan pase nou'n reisir anploy en nouvo *staff*

senior pou ede *oversee* kordinasyon en tel aktivite.

I enportan osi pou note Mr Speaker ki pandan lannen 2022 in annan bokou travay ki'n ganny fer par bann lezot partner tel parey Minister Gouvernman Lokal, Minister Ledikasyon e servis prizon lo Mahe, Praslin e La Digue kot bann plant anvaisan in osi ganny retire.

In osi annan bann *MNA* ki'n *lead* sa prosedir e Minister Lanvironnman i pare pou kontinyen donn zot sipor teknik e menm finansman ler i annan.

Enn bann *NGOs* ki mon krwar zot rekonnnet ki vremen aktif se *TRASS* Praslin ki vremen pe fer en, pe donn en komitman enkrwayab e nou remersye zot.

Sa plan stratezik e plandaksyon ki'n fini ganny fer pou ed Minister angaz ek nou bann diferan partner pou gid li dan sa lalis nasyonal kont bann plant anvaisan. Minister Lanvironnman pou travay tre pros avek ladministrasyon distrik e bann *MNA* pou fer sa.

Mr Speaker, kekfwa bokou dimoun pe panse ki ler i annan bann plant anvaisan nou zis mont lo sit e retir zot. I enportan pou dir ki ler tel aktivite i ganny fer, i bezwen ganny fer dan en fason byen.

Nou bezwen asire ki ler nou'n retir sa bann plant, zot ganny detri pou asire ki nou pa ede pou propaz zot pli lwen. I osi enportan pou amenaz sa landrwa pou asire ki sa bann lespes pa retournen. Alors fason ki sa later i ganny zere i sitan enportan.

Sa later i kapab ganny servi pou fer proze ekonomik ki nou ankouraze, tel parey pou lagrikiltir, pou ede anmenn en serten reveni pou sa propriyeter, ouswa en sit *eco* touristik e menm kapab ganny servi pou plant serten laspe parey vakwa ek banbou, ki ganny servi pou fer bann keksoz artizanal.

Dan lenstans kot sa bann plant i ganny retire, i enportan pou asire ki serten lezot plant i ganny plante rapidman, pou anpes lerozyon e lezot lespes pou koloniz sa landrwa. Mr Speaker lanvironnman, Minister Lanvironnman i anvi entansifye son bann zefor lo bann plant anvaisan.

I en gro problem, i en problem nasyonal ki demann sipor tou bann Lazans e tou sitwayen. Plis sansibilizasyon pou ganny fer dan bann mwan ki pe vini, e dan bann lannen ki pe vini pou ki tou dimoun i servi bann plant natif dan plas bann

plan egzotik ki zot anmennen dan pei.

Minster Lanvironnman i osi annan plan retir bann plant anvaisan dan 7 lezot sit dan bann distrik dan bann mwan ki pe vini. Sa bann sit pou ganny fer an konsiltasyon avek bann *DA*, e si bann *MNA* i enterese e i annan en konesans ek en kontribisyon pou fer, Minister Lanvironnman i *welcome* zot partisipasyon.

An vi ki sa bann lespes lalyann e lezot plant anvaisan pa ganny vwar zis lo later Gouvernman, mon lans en lapel ozordi pou osi angaz bann propriyeter prive. Akoz zot osi zot annan en responsabilite.

Mon ti a voudre pran sa lokazyon pou osi lans en lapel ek tou dimoun pou donn en koudmen, pou konbat sa lespes o nivo nasyonal. Zis Gouvernman tousel parey mon'n dir pli boner, nou pou perdi sa batay.

Minister Lanvironnman pou touzour reste angaze pou kontrol bann lespes anvaisan pou asire ki nou bann lespes andemik e nou diversite ki ekstraordiner pa ganny menase. Mersi Mr Speaker.

MR SPEAKER

Mersi Minis. Siplemanter Onorab Henrie.

HON GERVAIS HENRIE

Mersi Mr Speaker. Mersi Minis pou larepons byen detaye. Premyerman mon'n note ki dan larepons Minis in donn 2 konponan bidzeter an Dolar Ameriken ki son sours finansman i sorti an deor Sesel.

Sa ki mon anvi konnen se ki eski li Minister i annan en konponan bidzeter ki met dan Bidze pei pou li kapab fer en pe sa travay lo li menm? Sa i mon premye kestyon.

E dezyenmman mon'n osi note ki bann travay i fer en pe partou, partou e la par egzanp Minis in dir i annan dan 7 distrik e zot pou rod en landrwa. Eski i ava annan posibilite pou zot kapab par egzanp konsantre, annou pran en distrik koman en *pilot project*, nou *deal* avek. E nou vwar poudir nou kapab fer swa nou pa kapab fer.

Eski i enposib pou zot pran sa lapros, akoz mon pe mazin ki mannyer *SIF* ti fer dan Vallée De Mai an 2013 e in *take care of it*. So si nou ti kapab olye ki fer dan 7 landrwa otour Mahe, nou pran en distrik pran li koman en *pilot project* Mont Buxton par egzanp. Mersi.

MR SPEAKER

Mersi. Minis. *PS* pou reponn.

PS TONY IMADUWA

Mersi Mr Speaker. Mersi Onorab. Mersi tou dimoun ki pe ekoute. Onorab mon krwar ou kestyon in demann lo kote Bidze. Mon krwar parey Minis in fer sorti ti pe entrodwir, i en keksoz ki kout vremen ser.

Mon krwar letan nou pe koz retire wi, parey nou kapab ale met zefor, retire e mon krwar kestyon ki kle se ki nou fer apre? E bokou fwa letan nou ale nou met zefor, nou vwar wi i netwaye apre pli tar nou vwar li tourn parey i ti ete.

Parey ou'n koz ek nou, parey ou'n dir ou'n fer referans lo kote parey lo kote *SIF*, mon krwar sa ki enportan menm parey letan si mon pou pran *SIF* dan en legzanp; son landrwa kot li i pe *manage* i vremen limite e i konnen i zis la.

E letan ou pe koz lo lape plan anvaisan Sesel i gran. I annan bann lorganizasyon parey *SIF* kot i pe fer *management* sirtou lo kote Vallée De Mai ouswa Aldabra, parey ou annan *SPGA Plants and Gardens Authority* li i pe *deal* plis dan *park*, e sak lorganizasyon i annan kot li.

Me mon krwar problemm mazer ki nou annan se ki bokou sa bann lespes i ganny vwar an

deor, e parfwa parey letan nou pase nou vwar kote i ete.

Mon krwar kekfwa ki enportan se ki, ki mannyer nou kapab angaz ek distrik. E mon krwar kekfwa mon kapab dir en *success stories* parey Minis in dir avek TRASS, kwa ki pe fer TRASS vin *successful*?

I annan bokou volonter dimoun ki pare pou fer li, e mon krwar sa i en keksoz kle aköz bokou fwa letan ou annan travay pou ou fer si ou napa dimoun premye keksoz zot pou demann ou, ou bezwen en Bidze. E Bidze kekfwa ki nou, nou gannyen an term lo kote Minister, Bidze ki nou kapab, met antre dan nou Bidze pou nou, nou ganny limite. E sa i partou mon krwar depandan lo priyorite ki pei i annan.

E parey lo kote kot nou, lo kote Minister menm nou kapab rod fon en pe an deor pou nou kapab konplimante. E se pour sa kwa nou tant pou servi bokou bann Bidze anba bann proze pou nou kapab fer li lo pli gran lanpler.

E mon krwar parey en pwen osi ki ou'n fer resorti ki mon krwar i enportan, i annan en kantite travay ki'n deza ganny fer e i annan en ta *success stories* letan nou pe gete an term plan anvaisan.

Kekfwa mon pou donn en legzanp, mon krwar parey mon a donn en legzanp parey i annan sa agave ki zot ti servi, ki zot ti pe retire Aldabra. Ki zot ti vwar, si ou pe fer li *manual it's a very labour intensive*. Apre ki zot ti ganny finansman avek Linyon Eropeen, zot ti vwar poudir zot ti enplik en kemikal, zot problemm ti ganny *solved*.

Parey ou pe dir mon pou totalman agree e nou lo kote Minister nou pare pou travay ek bann distrik pou nou vwar kekfwa, ki lespe ki annan e ki pli bon metod nou kapab fer.

E en fason ki nou kapab fer sa vi ki i en proze pilot parey ou'n sizere ki nou, *maybe* nou pran Mont Buxton koman en legzanp. Kekfwa si Mont Buxton i en, kekfwa i annan en lot distrik ki vini nou lot, ki nou kapab fer nou kapab fer 2 oubyen 3 kalite diferan metod kot nou kapab aplike.

Me mon krwar sa ki pou enportan e pou mwan sa i en keksoz kekfwa ki mwan mon pou voudre vwar, i zis parey letan nou annan bann problemm ki nou annan lo kote lanvironnman. Kekfwa plan anvaisan i enn, salte i lot.

Kekfwa parey mon'n tann nonmen *earlier on* ki tou distrik i annan en *sort of* en *environmental group*. E nou,

nou ti ava kontan angaz nou avek sa bann *environmental group* e si i posib mon krwar i ti pou bon kekfwa parey nou dir *ok* en fwa tou le mwan i annan en aktivite ki nou fer volonter tou le mwan. E koumsa nou pou vwar poudir i kapab anmenn rezilta.

E an plis kekfwa, mon krwar en pwen osi ki Minis in fer sorti ki mon krwar i enportan, se ki si ou kapab servi sa landrwa parey mete si ou pe plant banbou, en landrwa kot ou annan bokou peser.

Konmela kekfwa nou pe dir dimoun koumsa *ok*, annou promot plis kazye banbou dan plas feray *and so forth*. E mon krwar sa i a ede, akoz pli ale serten resours i vin pli rar. E menm i annan bann dimoun parey ki fer sak vakwa parfwa. I dir ou be matyer nepli annan, rafya nepli annan.

E mwan mon krwar i en fason ki nou kapab angaz ek bann distrik parey si ou annan bann dimoun ki fer sa bann keksoz, pou nou angaz ek zot pou nou kapab travay pli byen lo kote sa. Mersi.

MR SPEAKER

Ok PS mersi bokou. Mon a pran kestyon Onorab William.

HON WAVEN WILLIAM

Meris Mr Speaker mon anvi demann Minis par lefe ki in nonm 7 distrik, eski i posib, ou annan sa lenformasyon avek ou lekel sa 7 distrik? Epi dezyenmman eski zot fer swivi letan zot fini fer defrisaz sa bann lalyann anvaisan, eski i annan en swivi apre?

MR SPEAKER

Permet mwan Onorab lo sa dezyenm pwen mon krwar Minis in met en kantite lanfaz. Minis si nou kapab zis ganny lalis sa 7 kestyon mon pe *run out of time*.

DESIGNATED MINISTER
JEAN-FRANCOIS FERRARI

Wi e non Onorab. Non, nou pa ankor fini aret sa lalis 7 kestyon. Nou konnen poudir nou pou fer li lo Praslin, lo Mahe.

Me sa i vedir ki i annan posibilite pour Grand Anse Mahe ki ou reprezante met son kandidatir devan e gete si nou kapab travay lo en plan pour ki ou distrik i benefisye. Mersi.

MR SPEAKER

Mersi mon a pran kestyon Onorab Uranie. Silvouple en kestyon.

HON ROCKY URANIE

Mersi Mr Speaker. Nouvo delegasyon osi byenveni. Minis in abord en pti morso mon kestyon ler in dir poudir i pe angaz prive osi pou vin zwenn, akoz mon kestyon ti zisteman baze lo ki zistans nou ale sirtou parey mon vwar La Digue, i annan bann propriyete prive ki zot bann *owner* i *nowhere to be found*.

Enn ler i dir i *Australie*, nou'n sey rod zot. Me zot napa personn ki okipe zot propriyete e ki nou vwar sa bann lalyann anvaisan oubyen bann lezot plant pe anvair partou e vwazen pe konplent pe *call MNA* e *DA* pou lasistans ki zot fer?

MR SPEAKER

Mersi. Mersi Onorab. Minis oubyen *panel*. Later prive.

DESIGNATED MINISTER **JEAN-FRANCOIS FERRARI**

Mersi Onorab. Mersi. Definitivman i en *channel* Onorab, i en *challenge* Onorab pa zis bann dimoun ki ou pa konnen lekel ki propriyeter, me osi bann dimoun ki ou konnen poudir se zot ki propriyeter, me selman zot pa santi zot pou zot fer sa komitman pour zot vin netway zot propriyete.

Alors sa i en size ki pe ganny gete par Ms Sheryl *Legal Counsel* dan pe refer Lalwa pou

enforcement lo tou sa ki pase dan lanvironnman, si i en size ki pe ganny pran. Akoz i pa akseptab ki en dimoun i annan en propriyete, me selman i pa pran son responsabilite. Mersi.

MR SPEAKER

Mersi bann Manm. Eskiz mwan mon bezwen termin sa kestyon la. Mon remersye Mr Matatiken, Mr Quilindo ki a kit nou. Bonn kontinyasyon e madanm raporter i ava apel delegasyon pou kestyon 69 ek 70.

Mon a dir bonzour e byenveni Mr Keven Nancy, Sekreter Prensipal pou Departman Lagrikiltir. Mrs Linetta Joubert, mon pe byen ale la? E Mr Randy Stravens. Byen sa 3. Nou ariv lo kestyon 69 Onorab Arissol.

HON SANDY ARISSOL

Mersi Mr Speaker. Bonzour nouvo lekip ki fek zwenn nou e tou dimoun Bel Ombre ki pe ekoute. Mon kestyon 69 Mr Speaker i lir.

An vi la kantite demann pou later lagrikiltir, eski Minis i kapab eksplik Lasanble si i annan okenn morso later Gouvernman dan distrik Bel Ombre ki'n ganny idantifye koman later potansyel pou lagrikiltir oubyen pou elevaz zannimo? Mersi.

MR SPEAKER

Minis wi. Nou a gard kestyon lo distrik Bel Ombre silvouple pou kestyon letan.

DESIGNATED MINISTER
JEAN-FRANCOIS FERRARI

Wi, mersi Mr Speaker. Mr Speaker pour le moman, nou annan zis 3 fermye anrezistre ki pou fer lagrikiltir dan distrik Bel Ombre. Enn lo later prive e 2 lo later Leta.

Sa 2 fermye lo later Leta ti idantifye later zot menm e lagrikiltir ti negosye avek Minister responsab pou Later, pou transfer sa bann later avek Minister Lagrikiltir.

Sel fermye ki pe fer elevaz dan distrik Bel Ombre se sa enn ki lo later prive e i pe fer elevaz poul ponn. So i byen pou note ki laplipar later Leta dan distrik Bel Ombre i ganny klasifye koman *P1 national parks* oubyen *F1 forest reserve*.

Pou lenformasyon adisyonnèl, Departman Lagrikiltir in deza ganny aplikasyon pou serten later dan sa distrik ki pa later Leta me ki tonm anba later Lanmisyon. E sa bann bout later i annan serten potansyel pou prodiksyon fri e legim.

Me sa bann klarifikasyon later Mr Speaker ki mon'n

mansyonnen, i endike ki Bel Ombre pa vreman en distrik lagrikiltir.

Me sa pa anpese ki si Lotorite Distrik Bel Ombre ou lezot endividi ki enterese i idantifye serten later ki i annan potansyel, la departman i kapab fer vizit avek zot pou zot evalye potansyel sa bann later.

E parey mon'n dir pli boner pou devlopman lagrikiltir, me plito pou bann devlopman fri, bann keksoz koumsa ki konplimant laspe touristik; akoz Bel Ombre i prensipalman en distrik touristik e ki nou pa pe anmenn dan Bel Ombre bann lefe lagrikiltir ki kapab konfli avek aktivite touristik.

Donk si i annan bann later Minister Lagrikiltir i pare pou zot konsidere. Mersi.

MR SPEAKER

Mersi. Ou siplèmanter Onorab Arissol.

HON SANDY ARISSOL

Mersi Mr Speaker. Mersi Minis pou larepons. Mon ti a kontan demann Minis en kestyon an relasyon avek larepons ki in donnen Mr Speaker;

Eski i annan okenn zabitan ki'n vin devan zisteman Minis an relasyon avek agrandi son *scope* pou lagrikiltir an

term later Gouvernman ki ou'n koz lo la, eski i annan okenn keksoz ofisyel?

E dezyenmman, eski i annan sipor pou bann dimoun dan distrik Bel Ombre an relasyon avek sa ki ou'n mansyonnen, an relasyon avek elevaz zannimo oubyen lagrikiltir ki zot pe fer - eski annan okenn sipor ki zot gannyen oubyen ki zot in demande? Mersi bokou Mr Speaker.

MR SPEAKER

Mersi Onorab. Minis. Ou a pas laparol Mrs Joubert *Chief Officer*.

CO AGRICULTURE
LINETTA JOUBERT

Bonzour Mr Speaker. Kot i konsern later lagrikiltir Bel Ombre bann laplikasyon, nou napa vreman dimoun ki'n demande pou *extend* zot aktivite an se moman. Be solman nou bezwen *note* ki nou annan 4 dimoun sorti dan distrik Bel Ombre ki lo nou *waiting list*, pe esper later lagrikiltir.

MR SPEAKER

Lo size sipor, ou'n satisfé?

DESIGNATED MINISTER
JEAN-FRANCOIS FERRARI

Mersi. Wi Onorab sipor i toultan la, Minister Lagrikiltir atraver son bann servis delokalize dan distrik, i pare pou asiste avek sirtou avek bann sipor teknik. E menm par ler sipor dan *management* pou zot kapab devlop *the proper management* zot laferm, lo *management* finansyel. Donk i annan, i annan sa sipor. E mon ti ava ankouraz okenn dimoun pou vin devan, pou fer sir ki zot benefisye avek sa bann sipor. Mersi.

MR SPEAKER

Mersi. Onorab Cosgrow ou kestyon?

HON WALLACE COSGROW

Mersi Mr Speaker. Mon kestyon an relasyon avek distrik Bel Ombre, mon ti a kontan vi ki Minis in dir nou mazorite bann later i klas koman *P1*. Si mon konpran byen.

Eski Minis i kapab dir nou ki zistans zot ete avek zot legzersis pou revwar *land use* Bel Ombre, pou idantifye bann *areas* kot i annan potansyel pou fer lagrikiltir, pou zisteman kapab ed sa 4 dimoun ki lo lalis *waiting list*? Mersi.

MR SPEAKER

Mersi Onorab. Minis ou repons?

DESIGNATED MINISTER
JEAN-FRANCOIS FERRARI

Mersi Mr Speaker. Mr Speaker mon pa anv di dir en keksoz ki mon pa asire 100poursan.

Legzersis pou revwar *land use* i nasyonal; tou distrik pe ganny pe ganny fer en travay lo la. Me selman mon napa lenformasyon lo kote nou'n arive pou Bel Ombre. Me selman i annan kestyon ki'n ganny leve dan lefase lo relasyon ant lagrikiltir Bel Ombre e bann *Marine Park*-bann *National Parks* dan leo Le Nirole.

E sa i en kestyon ki lo latab ki plizyer dimoun in met lo latab e sa mon mazine i ava ganny adrese o moman kot *land use plan* i ganny finalize. Mersi.

MR SPEAKER

Mersi Minis. Nou a pas lo prosen kestyon 70, egalman pou Onorab Sandy Arissol.

HON SANDY ARISSOL

Mersi Mr Speaker. Kestyon 70 i lir, eski Minis atraver SAA i kapab eksplik Lasanble ki plan an term lekipman demarkasyon e planifikasyon i annan pour Bazar *Sir Selwyn Selwyn-Clarke* an ka i ariv en lensidan dife? Mersi.

MR SPEAKER

Mersi. Minis?

DESIGNATED MINISTER
JEAN-FRANCOIS FERRARI

Mersi Mr Speaker. Mr Speaker avan mon donn larepons, kekfw mon ti a kontan zis dir avek Onorab ki lo sa lalis 4 dimoun ki pe espere Minister Lagrikiltir avek Lanvironnman, napa lentansyon donn permisyon pou fer *livestock* dan Bel Ombre.

Donk si i annan dimoun ki pe esper pou sa kalite aktivite, zot pou bezwen konsider lezot distrik; i pa en non me selman zot pou bezwen konsider en lot distrik.

Donk larepons pou ou kestyon Onorab Arissol zis *PS* in dir mwan fer en klarifikasyon ki SAA i nepli egziste e ki in ganny restriktire anba Departman Lagrikiltir, koman en departman dan Minister Lagrikiltir.

Alors mon pe enform Lasanble ki an sa ki konsern Bazar *Selwyn Selwyn-Clarke*, *servicing* fek ganny fer lo tou lekipman dife dan bazar Victoria an Avril 2023.

Donk 2mwan pase. E sa i ganny fer tou le an par *fire safety services*. Mon oule osi enform Lasanble ki dan menm peryod letan bann zofisye Servis

Tenny Dife, SFRSA ti vin fer en lenspeksyon zeneral dan bazar antye e ti konfirman ki *fire safety measures* e tou lekipman i dapre standar SFRSA.

An sa ki konsern pli spesifikman lekipman, an total lo premye letaz bazar batiman bazar kot annan 2 lofis ek 23 laboutik souvenir e 1 restoran, i annan en *manual alarm gong*. Sa ki zot apel en *manual alarm gong* e 3 *dry powder fire extinguisher* ki'n ganny santralize, enstale partou dan koridor dapre rekomandasyon SFRSA.

Pou sa restoran pli spesifikman li osi i annan en *dry powder extinguisher* ek en *fire blanket*. E sa i an konformite avek standar *licensing, Public Health Authority* e SFRSA. Lo *ground floor* i annan en *fire hose reel* ek en *fire extinguisher*.

So, dapre diskisyon avek SFRSA, i annan serten rekomandasyon ki'n ganny fer. Par egzanp prenon kont ki bazar i ouver e en landrwa piblik, i pa fasil pou met en *assembly point* akoz napa kont kantite manm piblik ki antre e sorti dan bazar. Donk i kapab en kantite dimoun e en *assembly* dan bazar li menm li i kapab pa en bon desizyon.

Departman i oule alor anvizaze pou reviz plan evakyasyon avek sipor SFRSA, pou enkli en *assembly point* pou bann vander ek *staff* bazar posibleman an deor *perimeter* bazar.

Donk sa se en demann ki'n ganny fer par bann bazardye zot menm, me osi en konstatacion ki'n ganny fer par *Management Bazar*. Donk sa i en proze ki *ongoing*. E sa i pou (ki mannyer mon kapab dir) i pou manifeste dan probableman en nouvo peron e en *exit* adisyonnal an deor bazar.

En lot demarkasyon apropiye in ganny enkli dan plan renovasyon bazar pou sa lannen. Donk mon mazine poudir i annan dan sa R7.5milyon ki annan pou *maintenance* regilye bazar, i annan osi larzan ki'n ganny mete pour konklir sa *new exit point*.

E SIA, (*Seychelles Infrastructure Agency*) pe travay lo bann plan final pou kapab egzekit sa. Me selman koman en Minister mon kapab dir ou Onorab, nou plito satisfè - nou plito satisfè ki tou bann rekomandasyon SFRSA in ganny pran.

Me selman landrwa i *tight*, si nou ti kapab fer li e pe pli

ouver e rod bann fason pou tir bann dimoun en pe pli vitman dan bazar, nou ti ava ankor pli satisfè. Me pour le moman nou pe travay dan sa direksyon. Mersi.

MR SPEAKER

Mersi Minis. Siplemanter Onorab Arissol.

HON SANDY ARISSOL

Mersi Mr Speaker. Mersi Minis pou ou bann larepons byen detaye. Mr Speaker, mon ava annan zis en siplemanter avek larepons ki Minis in donner.

Mon ti a kontan demann Minis letan ou'n koz an relasyon avek lenspeksyon ki'n ganny fer lo bazar an relasyon avek evakyasyon bann lekipman ki annan;

Eski Lotorite Bazar in pran an kont bann dimoun sa 23 lokater ki annan laboutik anler ki ou'n koz lo la, eski zot in pran an kont i annan lokater ki bar koridor? Ki met tou son bann prodwir dan koridor pou vann, oubyen i bare avek plans, pour ki en lot dimoun pa kapab traverse pou al lot kote ou bezwen fer letour e tousala i en danze.

Eski zot in pran kont sa e zot in koz avek bann lokater ki pe fer sa bann kalite desizyon en pe danzere? Mersi bokou.

MR SPEAKER

Mersi. Nou pas kestyon pour PS? Tre byen, PS.

PS TONY IMADUWA

Ok. Bonzour Onorab. Mersi pou ou kestyon. Mr Speaker nou'n pran kont bann lokater anler, akoz i annan serten konsern ki i annan bann lenz ki ganny mete dan koridor e nou *manager* bazar nou an kominikasyon konstaman avek sa bann lokater.

E la nou pe dir zot ki sa bann lenz pa sipoze dan koridor, akoz si i pou ariv par egzantp nou pe mansyonnen en dife, i pou en gro lenkonvenyans e i pou difisil pou ou kapab evakye. Akoz non konnen ki nou annan sa kantite dimoun dan bazar e vwala nou pozisyon. Mersi.

MR SPEAKER

Mersi PS. Bon nou a sey enn de siplemanter vitman. Onorab Romain.

HON GEORGES ROMAIN

Mersi Mr Speaker. Bonn apre midi Minis ek ou delegasyon. Minis ler mon'n ekout ou larepons kestyon ki Onorab *Chief Whip* in anmennen, Onorab Arissol. I montre ki vremen dan bazar li menm i

ankonbre akoz mon krwar nou tou nou'n antre dan bazar, nou vwar i ankonbre ek dimoun osi ki vin aste keksoz.

Eski Minis i kapab dir si i annan en plan a lavenir pou re *locate* bazar? Mersi Mr Speaker.

MR SPEAKER

Mersi. Minis.

DESIGNATED MINISTER
JEAN-FRANCOIS FERRARI

Mersi Onorab. Onorab mon krwar ou'n, plizyer Manm isi in okouran ki detrwa mwan pase nou ti fer vizit dan bazar, Minister Lapes avek Minister Lagrikiltir.

E nou ti konstate sa ki ou pe dir e pa zis ou, tou dimoun ki servi Bazar Selwyn Selwyn-Clarke i konstate poudir i ankonbre e nou pe rod bann solisyon pou sa. E i pa fasil akoz, bazar i en sit kiltirel an li menm e i en bann aktivite ki dimoun in abitye avek; me nou krwar ki nou pou bezwen sanze, nou pou bezwen adapte.

E eski bazar pwason pou la, oubyen eski i pou bezwen bouze, sa i en kestyon ki lo latap pou fer plis lespas pou lezot dimoun ki dan bazar. Eski nou pou fer bann *exit* peron? sa i bann keksoz ki devan.

Eski nou pou sanz konfigerasyon, eski nou pou les

dimoun *store* zot keksoz dan bazar? Akoz en bazar i en landrwa kot ou vann, i pa en landrwa kot ou *store*.

Donk sa se bann keksoz, se bann kestyon serye, ki afekte lavi bann dimoun ki pe ganny zot lavi la e ki pa en bann desizyon ki kapab ganny pran dan en bann fason leze zis la koumsa.

Me selman mon ti a kontan reasir tou Manm, ki sa i bann size ki lo latap e ki nou pou, okenn desizyon ki pou ganny konsidere pou ganny konsidere avek bann dimoun ki annan zot aktivite dan bazar, e bann dimoun ki servi bazar e osi bann rezidan ki reste otour.

Akoz zot osi zot annan en drwa pou zot kapab viv e sirkile dan lape e dan meyer kondisyon. Donk fotespere mon'n kapab reasir ou lo la. Mersi.

MR SPEAKER

Tre byen. Onorab Bastienne.

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou koleg Onorab.

Minis ler nou pe koz an ka nou pe nonm an ka dife, byensir nou bezwen lasirans osi i zwe son rol la, e vi ki i en norm ki

tou bann dimoun ki fer biznes i bezwen ganny kouver anba en lasirans;

Eski bann vander dan bazar *Sir Selwyn Clarke* zot annan zot prop lasirans oubyen i annan en lasirans ki zot ganny kouver anba la, vi ki laplipar bann vander i pe vann bann prodwi ki fasilman ganny atrakte avek dife? Mersi.

MR SPEAKER

Mersi Onorab. Minis.

DESIGNATED MINISTER
JEAN-FRANCOIS FERRARI

Mon pe ganny dir la poudir lasirans i kouver *building* avek *staff* Minister Lagrikiltir, *is that ok?* Me selman i pa kouver bann bazardye zot menm. E kekfwa sa i en febles - kekfwa sa i en febles, kekfwa bann bazardye i devret annan zot lasirans *personnel*, *public liability insurance*, kekfwa.

Me i enportan osi dan sa kestyon ki ou'n dir Onorab Bastienne ki kot i annan bann lekipman ki kapab pran dife. En *fridge* oubyen en keksoz koumsa ki pa sipoze dan bazar, me selman ki la aköz in ganny tolere. Sa se bann keksoz ki *fire safety*, *SFRSA* pe get vreman de tre pre.

E mon ti a kontan dir osi avek bann bazardye ki la,

Minister Lasante pou vin vreman tre strik aköz zot in dir zot in donn en pe *guidelines* pou respekte bann prosedir sekirite, bann prosedir lasante, si sa i pa ganny respekte i pou annan bann konsekans a lavenir. Mersi.

MR SPEAKER

Mersi. Bon mon regrete mon bezwen termin sa kestyon la. *Sorry*. Mon a remersye *panel* ki la. Mon a remersye *panel* ki la e mon a swet zot bon depar e bonn kontinyasyon. Mon annan en mersi.

Ah non. Wi, mersi Madanm Clerk. Mr Nancy i reste, Madanm Joubert i reste me selman nou apel, Mr Palit i deza la e Mr Stravens. So, nou tou nou la. Mersi *ok*. Nou a pran kestyon 71, me selman kestyon 71 apre nou annan en *Private Notice Question* ki lo, preski lo menm size.

Tou lede i konsern lenportasyon manze zannimo, so Minis in propoze ki i a pran sa kestyon ansanm, ki mon krwar i fer sans e nou a sov en pti gin letan. Donk nou a pran kestyon Onorab Aglae, i a lir son kestyon apre nou a lir *Private Notice Question* e Minis a fer repons. Onorab Aglae.

HON EGBERT AGLAE

Mersi Mr Speaker. Bonn apre midi panel. Swivan lanons ki *STC* pe al komans enport manze zannimo, eski Minis i kapab dir nou Lasanble si son Minister in fer konsiltasyon avek sa 2 a 3 biznes prensipal ki ti pe ofer sa servis, pour ki zot pa vwar zot pe al ferm zot biznes? Mersi.

MR SPEAKER

Mersi. Onorab Cosgrow nou a pran ou *Private Notice Question*. Savedir ou *Question Without Notice* Onorab.

HON WALLACE COSGROW

Mersi Mr Speaker. Mr Speaker mon kestasyon i lir koumsa. Eski Minis pour Lagrikiltir i kapab enform nou Lasanble, ki lefe in annan lo bann fermye ki fer elevaz zannimo, apre ki Gouvernman in pran desizyon pour retir sa sibvansyon ki sa bann fermye ti pe benefisyè avek? Mersi.

MR SPEAKER

Mersi. Minis ou repons silvouple.

DESIGNATED MINISTER

JEAN-FRANCOIS FERRARI

Mersi Mr Speaker. Mr Speaker mon annan 2 repons e mon ava, fotespere i pa repetitif. I enportan Mr Speaker pou note ki Gouvernman i reste touzour

angaze pou siport prodiksyon lokal, sirtou dan domenn lagrikiltir, dan domenn lavyann.

Pou lemoman Sekter Lagrikiltir pe kontinyen benefisyè avek plizyer servis ki'n ganny met an plas pou asire tou bann prodikter. E osi bann konsesyon lo lenportasyon materyo; *loan* a en lenterè tre ba. Kontinyasyon *subsidy* lo karkas, lo *day old chicks* e transportasyon ant bann zil.

An se moman i annan, non pa 2 me - Onorab in korize - me 3 biznes prensipal ki pe furni manze zannimo lokalman. Kot 2 i fer vin manze zannimo sorti Moris e lot i prodwi lokalman.

Pou Minister Lagrikiltir, enn son premye demars sete pou angaz konsiltasyon avek sa 3 furniser pou diskite e sey fer pri manze zannimo vin pli abordab. Me malerezman sa bann diskisyon pa'n vreman abouti.

Nou ti ekspekte ki apre *COVID*, apre ki bann pri o nivo enternasyonal, bann pri transportasyon par lanmer i ava bese me malerezman nou pa'n ganny bann rezilta ki nou'n swete e nou pa'n kapab reisir fer, convince sa bann enportater pou fer bese zot pri.

Resaman avek nouvo mezir ki'n ganny anonse lo subsidy, rankont in ganny fer avek 2 fournisseur prensipal e lot in ganny planifye pour bann zour ki pe vini.

Diskisyon ki'n ganny fer se pour re negosye ankor avek bi prensipal pou sey fer pri manze zannimo vin pli abordab. E pou enform lo bann nouvo demars ki pe ganny enplimante an relasyon avek manze zannimo.

Mr Speaker, i bon note ki sa demars avek *STC* se pour kre en lanvironnman pli konpetitiv, ki pou benefisye fermye e konsonmater. Nou pe ganny aprobe par lezot konpanyen e endividi ki pe monte lentere pou furni manze zannimo dan Sesel anba sa bann nouvo kondisyon.

Me sa i ankor an bann diskisyon. Dan bann konsiltasyon ki nou pe fer, pour le moman napa okenn lendikasyon ki monte ki sa bann biznes pe al fermen, o kontrer serten in eksprim (nou remersye zot), in eksprim gran posibilite pou fer pri manze zannimo vin pli abordab.

Donk Mr Speaker, mon ti a kontan osi fer resorti ki rezondet pou tir sa sibvansyon lo bann manze zannimo, i aköz i pa soutenab. Ant R80milyon a R85milyon larzan *taxpayers*

sak lannen, ki al dan sibvansyon zis pou sa prodwi, zis pou sa prodwi (setadir manze zannimo) i en sonm ki Gouvernman pa kapab abzorbe. Menm si i ti anvi fer li, i pa posib pou abzorb R85milyon.

Me mwan mon oule fer kler ki Gouvernman pa'n zis retir en sibvansyon, san ki in ranplas li par en nouvo metod sipor. Annefe Gouvernman i annan konfyans ki plis konpetisyon dan *supply* en manze zannimo lokalman - e se la kot *STC* i antre - pou fer ki pri manze zannimo pou neserman desann e fermye pa pou trouv en logmantasyon dan son kou prodiksyon.

Me byensir i ankor tro boner pou nou vwar si i annan en lefe pozitiv, negatif ouswa si napa okenn lefe.

Sa ki enteresan par kont, se ki deza Gouvernman dan son bann konversasyon avek enportater ek prodikter lokal bann manze zannimo, Gouvernman pe deza ganny dir ki pri manze i sertenman kapab desann en pe e ki i annan gran sans ki nou pou reisir ranplas sa *subsidy* avek pri manze meyer marse.

Departman Lagrikiltir antretan, pe kontinyen avek son program konsiltasyon

avek bann fermye ki fer elevaz pou fer sir ki nou pran kont zot bann konsern apre ki sa bann mezir in ganny anonse.

I bon note Mr Speaker ki apre sa lanons lo sanzman dan sistenm sibvansyon, sa bann konsiltasyon in vin pli entans, pou asire ki tou bann akter dan sa biznes i konpran e i angaze dan bann rezon pou sa desizyon.

Dan sa bann konsiltasyon, sa bann fermye in fer sorti serten konsern; par egzantp posibilite en *loan* spesyal pou soutenir zot prodiksyon pou en serten peryod letan. E osi pou Gouvernman negosye avek *STC* pou pran plis lavyann lokal. E sa se bann propozisyon ki Minister Finans ek Minister Lagrikiltir e mon kapab dir ofisyelman i pare pou zot ekoute e soutenir.

Bann prodikter in osi fer resorti ki ti a bon si zot ganny sipor pou lev standar bann labatwar. E sa osi i en keksoz ki ava ede pou zot optimiz lavant lavyann pou letablisman touristik ek lezot enportater.

Ou konnen mon krwar bann Onorab zot ava dakor, ki zot tou zot in tande ki par egzantp sa ki vann pli byen dan pei konmela *se parts*. E nou bezwen deblok bann sistenm ki

kapab fer sa bann *parts*, lotel i ava aste pli fasilman plito ki sorti deor e piblik an zeneral i ava aste nou ekspekte.

Donk ansanm avek bann lezot Lotorite konsernen tel ki Departman Komers, Departman Finans parey mon'n mansyonnen Departman Lasante Piblik, pe evalye sa bann konsern ki ganny met devan pou evite ki sa bann mezir i annan en lefe negatif lo biznes elevaz zannimo.

Nou, nou krwar ki Gouvernman i tre atantif pou gete ki mannyer sa bann sityasyon pe evolye pou li kapab entervenir dan sipor pou bann dimoun ki dan sa lendistri. Akoz sertennman Gouvernman i realize ki mannyer i enportan ki lendistri prodiksyon lavyann, i kontinyen dan en fason soutenab.

Akoz sa i en lasenn. I en lasenn ki enportan pou tou keksoz, pou evantyelman prodiksyon legim, fri eksetera. Si en mayon dan sa lasenn i kase i pa pou bon pou person. Alor Gouvernman i tre atantif.

E mon ti a kontan si zot annan bann kestyon prezan mon ava reponn zot, espekte pou reasir zot. Mersi Mr Speaker.

MR SPEAKER

Mersi Minis. Wi nou annan, nou a pran siplemanter sa 2 Manm. Apre mon annan 2 Manm ki'n lev lanmen pou siplemanter, nou pou pran sa 2 e nou pou bezwen termin la. Onorab Aglae ou siplemanter premye.

HON EGBERT AGLAE

Mersi Minis pou ou larepons. Minis dan ou larepons ou'n nonmen poudir nou'n fer konsiltasyon ek en lakonpanyen - mon mazine sa i sa lakonpanyen lokal *Ferox*.

Petet si ou kapab dir nou petet kan eski negosyasyon pou ganny fer avek sa 2 lezot, sa *Meaders* ek *LFL* pou vwar? E ki pou arive si an ka zot pa agree avek kondisyon ki ou pe met devan zot?

Dezyenm Minis, i annan konsern avek bann fermye kot i konsern *STC* e rol ki *STC* i zwe dan sa ki ou'n dir Minis. Baze lo sa Minis, eski baze lo konsern fermye ki zot osi zot ti a kontan ganny en *input* konsiltasyon, ki dan sa desizyon ki'n ganny pran. Eski ou kapab dir nou poudir ou pou konsilte ek son bann fermye? E eski osi, konsern kot i konsern *supply and demand* dan kontinite avek rol *STC*, pou garanti ki napa okenn mankman ki pou afekte

sa bann fermye a lavenir? Mersi.

MR SPEAKER

Mersi Onorab. Minis.

DESIGNATED MINISTER JEAN-FRANCOIS FERRARI

Mon ava pran zis sa dezyenm bout, dernyen bout kestyon apre *PS* i ava reponn.

Pou nou i - parey mon'n dir - i esansyel ki napa okenn kase dan sa lasenn. E mon kontan pou dir ki bann konsiltasyon preliminar ki'n ganny fer, i montre ki napa okenn sa bann dimoun ki pe *supply animal feed* dan pei ki pe dir ki zot pou arete.

Zot pare pou zot konsider sa konpetisyon ki *STC* pe anmennen pou fer bes bann pri. Donk sa i deza en keksoz pozitiv e mon santi poudir pour le moman *at least in short to medium term, supply* i garanti. Me selman lo konsiltasyon *PS* i ava...

MR SPEAKER

Mersi. *PS* ou a pran laparol.

PS TONY IMADUWA

Mersi Onorab. Mersi Mr Speaker. Mr Speaker, konsiltasyon in ganny fer avek, lo 2 *main supplier* lokal. Par egzantp *Meaders*; *Meaders* nou

pou al fer avek li sa Sanmdi la ki pe vini. Akoz nou ti annan en *meeting* avek *Meaders* le 20, be nou'n dir nou ava fer li vin pli vit akoz konversasyon ki nou'n fer avek zot *initially*, i annan serten diskisyon ki zot oule fer avek nou pou nou kapab fer desann manze zannimo.

E menm diskisyon in ganny fer avek *LFL*, setadir *Mahe Distributors*, pour ki i annan sa konsiltasyon pou fer desann manze zannimo. Akoz ki arive ti annan bann diskisyon *initial* ki ti ganny fer avan, pou nou gete ki mannyer nou kapab fer desann.

Be parey in ganny dir ti annan serten fason ki pe dir ki nou kapab fer li dan en lot fason pou fer desann manze zannimo. Be nou, nou anvi fer desann pour ki fermye i benefisyè. E vwala apre serten konsiltasyon avek *STC* pou nou kapab fer antre manze zannimo a en pri meyer marse.

E laport in reouver ankor - in reouver ankor pou dir ki zot kapab negosye e fer desann pli ba. E nou pe pran sa tre pozitiv. E kontrè nou dir zot mersi pou sa bann negosyasyon pou nou kapab fer manze zannimo desann e pour ki fermye i kapab benefisyè.

E menm nou kapab *manage* sa bann *subsidy* parey

in ganny mansyonnen 85milyon ki *unsustainable* e ki tou dimoun i benefisyè prensipalman. Mersi.

MR SPEAKER

Mersi. Onorab Cosgrow ou annan siplemanter?

Onorab Aglae mon krwar, eski i.

HON EGBERT AGLAE

I annan sa bout konsiltasyon avek bann fermye, lopinyon bann fermye osi lo sa ki pe pase.

MR SPEAKER

Wi, *PS* ou annan keksoz pou azoute lo la?

PS TONY IMADUWA

Wi Mr Speaker. Mersi Mr Speaker. Nou annan en *meeting* nou'n fer apre 2 semenn pase avek bann *main* fermye, sirtou *broiler producers* e *meeting* ek zot e zot in met serten pwen e in pozitiv.

E apre zisteman yer i annan en lot *meeting* ki'n ganny fer pou nou met bann diferan lezot pwen devan, pou nou kapab. Akoz ki arive, nou bezwen travay ansanm nou tou pou nou kapab fer sa sekter vin pli profitab.

Savedir i annan diskisyon ki'n ganny fer e nou pe antisipe

fer bann lezot diskisyon ankor avek lamas fermye sirtou *broiler producers* pour ki nou kapab fer, fer zot travay avek sa pri manze zannimo ki'n desann. Mersi.

MR SPEAKER

Thank you PS. Onorab Cosgrow.

HON WALLACE COSGROW

Mersi Mr Speaker. Mr Speaker wi mon annan en siplemanter. Mr Speaker i etabli ozordi ki apepre 60poursan kou prodiksyon bann fermye sirtou elevaz poul, apepre *on average* 60poursan zot kou se *feed*, manze en?

Now, ler ou tir sa sibvansyon lo manze, natirelman i pou *increase*, i pou ogmant sa kou ki sa fermye li menm sa prodikter i bezwen mete an term kou manze pou zannimo e i enpakte lo son pli gro kou loperasyon par lao.

So eski Gouvernman in pran kont ler zot in fer sa desizyon, zot in pran kont lefe ki sa i kapab annan lo prodwi sa prodikter lokal, e ki i kapab *price* li *out of the market* konpare avek bann lenportasyon ki pe antre?

E si ou'n pran kont sa, e ki lefe sa i kapab annan lo Sekter *Livestock* ek lagrikiltir parey Minis in dir pli boner kot sa i

afekte, i *cascade down the line* kot i afekte *the whole* sekter?

Epi dezyenm eski zot in asize petet mazine, akoz menm si petet pri i desann avek sa ki fermye pe peye ozordi par bal *on average* mon krwar apepre R350, i annan - si mon pa tronpe apepre sa pri - zot ava koriz mwan.

Me toudmenm i pou annan en lekar kot menm si sa pri *STC* i fer vini dizon i vann en pe pli bon marse ki i ete ozordi, pou *still* annan en lekar ki sa fermye pou bezwen azoute e i pou *still* azout lo son *cost of production* finalman.

Now eski zot in mazine sorti-

MR SPEAKER

Mersi.

HON WALLACE COSGROW

Mr speaker i vreman teknik sa nou bezwen kapab eksplik li byen.

Eski zot in mazin sorti lo sa *subsidy* 85milyon, lefe ki prezan sa lekar ant pri avek sa ki fermye pe peye pou bokou pli pti git, eski zot in mazine revwar lakantite *subsidy* ki zot kapab donnen, ki i pa pou neserman 85milyon, me i bokou, bokou mwens e pas sa avek fermye? So eski zot in fer sa dan zot analiz? Mersi

MR SPEAKER

Mersi. Minis ou pou adrese oubyen *panel*?

DESIGNATED MINISTER
JEAN-FRANCOIS FERRARI

Mon ava pran son repons zeneral lo *subsidy*. Onorab mon krwar ou ek mwan e nou dakor ki *subsidy* i pa meyer fason pou nou progresse. Akoz mon pe lir en *statement* ki ou ti fer le 18 Me 2015, mon al en pe lwen mwan.

E la mon vwar poudir ou ti dir *subsidize* manze zannimo i kapab en opsyon, me mon krwar ki fermye pa devret pe tro get sa *subsidy*, me fermye pe plito travay e rod lezot semen pli vyab. *Ok?* Parey ou ti dir donn *subsidy* en solisyon fasil me mon krwar ki dimoun i bezwen travay dir.

Donk nou dakor ki *subsidy* i pa *the* meyer laport pou nou fer, sa ki nou pe dir se ki nou pou akonpany sa mouvman.

E sa in annan bann diskisyon yer e Minister Finans atraver Mr Palit mon krwar ti la dan sa *meeting*, ki'n dir ki nou pou akonpany sa mouvman e nou pou aziste o firamezir. Nou pa pe pran bann zafer ferm laport e personn pa antre

oubyen ferm laport, sa ki deor i reste deor. Non, non.

Si Gouvernman pa pe depans 80milyon dan *subsidy* savedir, 85 - savedir kekfw i annan kapasite finansman pou li *stretch* li *out* lo en peryod e redwir sa bann sibsidi lo en serten peryod. Donk tousala se bann keksoz ki pe ganny konsidere.

Akoz i enportan parey mon'n dir ki nou pa kas sa lasenn. Nou pa redi tro bokou lo la akoz si non i pou kase. Me selman mon ti a kontan pas laparol la avek *PS* ankor, ki ava dir ou zisteman ki yer nou'n diskite sa bann keksoz in ganny diskite parey ou pe sizere la. Mersi.

MR SPEAKER

PS wi. Ou annan laparol.

PS TONY IMADUWA

Mersi Mr Speaker. Wi, bann diskisyon ki nou'n fer parey Onorab in fer resorti, laplipar ou poursantaz kou prodiksyon i lo kote manze zannimo - *in fact* i *65percent*.

E ler ou pe fer desann ou *subsidy* lo manze zannimo e nou tre responsab, nou'n vwar ki nou pe met bann lezot opsyon an plas. Par egzantp ou fer *STC* fer antre a en pli meyer marse, ou negosye avek bann

supplier lokal pou fer desann ki zot pe agree. E menm yer nou'n *meet* avek Finans avek bann ferme tou, nou apel sa nou *focus group*. E i annan bann opsyon ki bann ferme i met devan nou ki Minister in koz lo la.

Par egzanp zot in dir ki nou kapab ed zot avek en *bridging loan*, ki i enn zot bann opsyon e nou an diskisyon avek zot. E standar abatwar i enn ankor, akoz i pou ed zot kapab vann zot bann prodwi avek bann lezot sekter par egzanp touris.

Akoz ki arive si ou donn ferme sa *working space* akoz zot an konpetisyon zot, si ou *subsidy* i desann, ou donn zot sa *working space*. Akoz en ferme pe prodwi, i pe prodwi pou li vann. Be ler i kapab vann *subsidy* i vin en keksoz ki ou pa pou koz lo la. Mersi Mr Speaker.

MR SPEAKER

Mersi. Onorab nou bezwen terminen. Ale.

HON WALLACE COSGROW

Ya, Mr Speaker mersi bokou. Mon kontan Minis in al fer sitan resers. Ou tap *google* Wallace Cosgrow avek *subsidy* ou pou ganny bann lartik ki Wallace in koz lo la.

MR SPEAKER

Ale Onorab!

HON WALLACE COSGROW

Me Mr Speaker sa ki mon anvi dir se i ler mon ekout *PS Nancy*, mon ekout Minis i montre mwan poudir ki zot konnen ki i annan en konsern ladan e zot konnen pou annan en lefe se sa ki zot pe fer tou sa bann lezot zafer pou sey ferm en pe sa lefe.

Me se sa ki nou pe sey demande nou, ki nou pe sey demande se ki Gouvernman i eksplor tou bann posibilite. Akoz ki pou arive, si ozordi sa bann ferme i dan problem nou pou annan en gro problem ogmantasyon lavyann dan pei. Nou annan ferme ki pou perdi zot biznes.

E mon pe senpleman demann Minis ki zot konsider tou sa bann zafer. Mersi.

(Interruption)

MR SPEAKER

Bon. Mersi, ou pwen in ganny note.

HON WALLACE COSGROW

Mon pa'n demann en kestyon mwan.

MR SPEAKER

Onorab Hoareau ou annan en?

(Interruption)

HON JOHN HOAREAU

Mersi Mr Speaker. Bonzour Mr Speaker. Bonzour Minis ek ou bann dimoun.

Mr Speaker, mon ti a kontan ki Minis i dir nou ki bor ki STC pe vann sa bann manze an vi ki mon'n ganny plizyer *phone call* avek bann dimoun ki pe demande, pou eklersi pou zot kapab konnen ki bor STC pou vann bann manze zannimo?

E dezyenmman, mon ti a kontan konnen si i annan serten sipor lo kote Minister Lagrikiltir, dizon pou ed bann ferme pou konpran ki fason pou koup zot kou prodiksyon, san neserman pe koup prodiksyon koup prodiksyon li menm?

E osi si zot pe angaz zot pou anmenn bann varyete zannimo isi Sesel i fer pli byen ki *convert plis food into mass*?

MR SPEAKER

Bon Onorab ou'n poz 3 pwen la les Minis reponn silvouple.

HON JOHN HOAREAU

Ok, mersi.

MR SPEAKER

Ok, Minis ou adres son kestyon silvouple.

**DESIGNATED MINISTER
JEAN-FRANCOIS FERRARI**

Mersi Mr Speaker. Mr Speaker mon ti a kontan dir ki sa langazman ki nou annan otour sa desizyon pou redwir sa bann *subsidy*, i en langazman nasyonan e tou bann partner pe sey kontribye.

E lo kote Minister Lapes nou, nou pe pret STC en *warehouse*, en bout en *warehouse* pou li kapab osi kit son bann pri dan en fason rezonnab.

Akoz sa i pa en laliny biznes ki STC pe fer. I en sipor pou sa sekter. E alors, e sa i pou probableman Providence, kot i pou ganny stoke e mon mazin en i pou osi ganny annan Providence. Me sa i reste pou konfirman.

Mon zis anvi Mr Speaker, avan mon terminen la pou mwan dir ki, enn bann keksoz ki nou'n bezwen mazin byen zis sa *subsidy* la, mon'n rode partou anba ki Polisi i tonbe oubyen anba ki Lalwa. I pa tonm anba okenn Polisi oubyen okenn Lalwa sa.

Sa *subsidy* la ti ganny mete aköz ti annan en dimoun ki ti en Minis ki ti annan en laferm poul e pou li gete konmsi ki mannyer i kapab debourye. Se sa ki'n arive dan lepase. Ti

napa okenn lozik, ti napa okenn lozik otour sa.

Alors ozordi ler nou pe *deal* avek sa, annou konpran ki se pa fermye ki pe ganny afekte, se bann dimoun ki ti pe tranpe o bor pe ganny en keksoz. Donk sa.

(Interruption)

DESIGNATED MINISTER
JEAN-FRANCOIS FERRARI

Ei, wi. Non, non pa Onorab Cosgrow, en lot. Mersi.

(Interruption)

MR SPEAKER

Silvouple! Mersi. Gard en pe lord.

(APPLAUSE)

MR SPEAKER

I annan enn 2 pwen Onorab Hoareau, mon pa konnen si Minis i kapab adres briyevman oubyen panel. Lo redwir kou prodiksyon e lezot *breed* zannimo.

DESIGNATED MINISTER
JEAN-FRANCOIS FERRARI

Wi. Eskiz mwan Mr Speaker. Onorab ou'n koz lo linovasyon, si mon kapab met li anba sa parasol, linovasyon dan nouvo

kalite zannimo, pli efektif eksetera.

Mon ti a kontan dir ki Minister Lagrikiltir i vremen *on top of it* pou toultan rod bann meyer *breed*, bann meyer kalite lagrenn oubyen *whatever* bann keksoz ki bezwen, bann diferan langre bann keksoz koumsa ki ogmant produktivite.

Akoz sa i esansyel aköz nou later i limite, nou pa kapab fer *extensive farming* dan Sesel, nou bezwen fer *intensive* e maksimiz lespas ki nou annan.

Donk an menm tan ki sa i pran plas nou pe osi *tackle* sa kestyon *subsidy*. So mersi pou sa. Mersi.

MR SPEAKER

Mersi. Onorab Pillay mon'n rekonnèt ou kantmenm nou pe *run out of time*. Bref-bref silvouple.

HON SEBASTIEN PILLAY

Mersi Mr Speaker. *Straight to the point*. Premye pwen ki mon ti a kontan klarifye, ou pa'n klarifye en kestyon ki Onorab Hoareau i demann ou.

STC pa ankor komans fer vini sa bann manze zannimo, si in komanse Onorab Hoareau ti pe rode kote ti pe vann oubyen si pe komans vann?

Kestyon ki mon oule klarifye avek ou, lefe ki sa pa en

mainstay rol *STC* dan nou lekonomi, akoz ki Gouvèrnman in pran sa desizyon e ki manner *STC* pou ganny larzan pou li soutenir sa aktivite ki i pe al fer pou li fer vini manze zannimo, kan i deza pe ganny difikilte pou *anchor* bann pri bann kominote esansyel?

Mon dezyenm kestyon ki mon anvi klarifye avek ou; prenon kont ki 65poursan *input* i lo manze zannimo e *subsidy* ti pe kouver apepre 40poursan, 40 a 50poursan sa *input*.

Savedir poudir si ou regard 85milyon, ler ou fer kalkil *then* si sa pri i desann pou vin R450 pou manze zannimo, nou pe vwar poudir fermye pou riske bezwen ankor *at least* en 25 ou 20 a 25 poursan *subsidy*. *Around* 20poursan *subsidy* apepre.

So going forward tou sa ki ou'n dir nou, ou'n dir nou zot ankor pe diskite. So, eski i annan okenn *commitment firm* ki zot pou kapab donn bann fermye lo *bridging* sa *gap on the percentage of* sa *subsidy*, si nou pran *rudimentarily*, apepre R100milyon lo *subsidy* nou pe koz 20 poursan, nou pe koz R20milyon.

Baze lo sa kantite larzan ki nou'n anmase lo *levy* ki *around* 15milyon apepre, so mon krwar i pou pli pre pou nou

kapab kouver. So eski i annan okenn *commitment firm* ki ou kapab donn bann fermye *regarding* sa? Mersi Mr Speaker.

MR SPEAKER

Mersi. Nou a pran sa 2 kestyon Minis.

DESIGNATED MINISTER
JEAN-FRANCOIS FERRARI

Mr Speaker komitman ferm ki mon kapab donn bann fermye se ki, Gouvèrnman i determinen pou li *deal* avek sa zafer *subsidy* enn fwa pour tou. E ki manner i pou *deal* avek sa se atraver konpetisyon e fer desann pri manze zannimo.

Pri manze zannimo, e mwan koman en Minis dan sa Gouvèrnman mon kapab dir donn en komitman ki wi nou pou fer desann sa manze zannimo

(APPLAUSE)

DESIGNATED MINISTER
JEAN-FRANCOIS FERRARI

Atraver en konpetisyon. E parey Gouvèrnman in *step in* Onorab, ler ti annan bann ekse par egzantp tou dimoun ti oule konnen akfer Gouvèrnman i al dan farmasi, akoz ti annan en ekse.

E ler i annan, Gouvernman i antre dan en lekonomi en pti lekonomi parey Sesel i antre, pou li kapab re balans sityasyon e fer sir ki konsonmater i ganny *the best deal*. Donk sa se en keksoz ki nou pou fer. Me selman mon'n dir avek ou toultan nou pou kit en lizye ouver pou nou aziste o firamezir.

Akoz nou keksoz ki pli enportan la se ki napa riptir dan sa sit prodiksyon. Donk nou pou atantiv a tou bann lefe ki kapab arive. Nou pa krwar poudir i pou annan okenn lefe negatif me nou pou atantif e Gouvernman pou entervenir si i bezwen entervenir. Mersi.

MR SPEAKER

Onorab nou bezwen terminen.

HON SEBASTIEN PILLAY

Mr Speaker i annan en-

MR SPEAKER

Zis en pwen silvouple.

HON SEBASTIEN PILLAY

I annan en pwen enportan. Sa ki nou, nou pe rode se ki Gouvernman i ankor *still* pe dir nou tou keksoz i an diskisyon. Menm sa *bridging loan* ki bann fermye in demande, ki bann fermye in eksprim bokou konsern lo la ou pa ti dan sa

meeting ou, Minis Flavien Joubert.

Ou realize ki kantite konplent ki bann fermye in met devan vizavi sa *bridging loan*. *Now* le pwen i pa zis pou donn larzan fermye. Le pwen se ki nou bezwen konnen ki Gouvernman i oule fer.

Akoz mon osi mon kapab vire dir ek li koumsa pou dir be rezon *STC* pe al aste manze zannimo, i se ki oule ed ou bann pli gro *sponsors* ki'n *sponsor* ou, ki osi dan lagrikiltir. Mon osi mon kapab vire pou dir ou sa.

(Interruption)

MR SPEAKER

Bon. Ou vwar problem? *Order please!* Ou war mon problem Onorab! Mon donn ou posibilite demann en kestyon e ou al dan bann size ki ou pa devret ale. Laprosenn fwa-

(Interruption)

MR SPEAKER

Order please! Laprosenn fwa ou a konpran mwan si mon pa donn ou posibilite kestyon. Mersi.

Bon nou'n terminen avek sa sesyon. Mon remersye Minis e son delegasyon. Mon remersye Minis ek son delegasyon pou zot

partisipasyon. E mon swet zot bon depar e bonn kontinyasyon. Nou seryezman an retar pou Lasanble, nou a pran *lunch break* e nou a re pran 2er edmi, 2er 30. Mersi.

(BREAK)

MR SPEAKER

Bonn apre midi tou Manm Onorab. Bonn apre midi nou *staff* ki avek nou, e byensir piblik ankor enn fwa. Pou apre midi nou annan Minis pour Lapes ek Lekonomi Ble ki pou avek nou, pou en prezantasyon lo size pou annan pou fer avek *Mascarene Plateau* ki size en *Bill*. Nou pa lo *Bill* me nou pou pran en prezantasyon. Alor mon ava apel Minis e son delegasyon pou nou komans sa prosedir.

Wi, Onorab Georges, ou... Mon ti pe al entrodwi prosedir ki nou a pran en Mosyon pour *Committee* pou nou pas dan Komite, ki a permet Minis fer son prezantasyon e i a osi permet bann zofisye reponn kestyon. Nou ava annan prezantasyon, apre peryod kestyon avek sa. Onorab Georges, ou ti lo prosedir ou?

HON BERNARD GEORGES

Wi, Mr Speaker, mon ti lo sa prosedir. Me kekfw eski ou

anvi nou esper Minis arive avan ki nou fer Mosyon, oubyen mon kapab fer Mosyon la?

MR SPEAKER

Nou a fer Mosyon avan? Nou a les Minis antre, in fini dan laport la.

Wi, parey mon'n eksplike, Minis i la avek nou ek son delegasyon pou nou pran en prezantasyon lo *Mascarene Plateau* ki size en Lalwa ki pou vin devan nou pli tar. Premye avan mon entrodwi Minis, nou a pran Mosyon pou nou pas dan *Committee Stage*, apre mon ava entrodwi bann zofisye. Onorab Georges, ou ti a kontan pran laparol?

HON BERNARD GEORGES

Yes, mersi Mr Speaker. Bonn apre midi Minis. Bonn apre midi *panel*. Bonn apre midi tou bann Manm Lasanble e dimoun pe swiv nou. Mr Speaker, efektifman etandonnen ki apre midi pou annan en prezantasyon, e ki *panel* dapre sa ki mon konpran, pour angaz avek bann Manm lo sa prezantasyon. Nou bezwen konstitye nou lekor dan en Komite Lasanble pou permet sa arive.

I annan 2 fason fer sa, enn se anba *Order* 84. E lot se anba *Order* 38(2). E mon pe propoze

anba *Order* 38(2) ki Lasanble i konstitye son lekor e *resolve* pou konstitye son lekor dan en Komite Lasanble, pou permet ki Minis e osi son *panel* i fer en prezantasyon e angaz avek bann Manm Lasanble apre midi. Mersi.

MR SPEAKER

Mersi, mon a ganny segonnman pou sa Mosyon. Onorab Arissol?

HON SANDY ARISSOL

Mersi Mr Speaker. Bonn apre midi Minis avek ou nouvo lekip. Bonn apre midi tou dimoun ki a lekout. Mosyon i ganny segonde. Mersi.

MR SPEAKER

San deba, nou a ganny vot lo sa Mosyon. Manm ki aprouve lev lanmen silvouple? Tou dimoun in vot pour. Alor mon pa bezwen apel pou vot non.

Lo Mosyon pou Lasanble antre dan *Committee Stage*, pou en prezantasyon, 29 Manm in vot pour, 0 kont e 1 in *abstain*. Donk sa Mosyon in aprouve par Lasanble.

An se moman, permet mwan dir bonzour e byenveni ankor Minis Jean-Francois Ferrari. Me osi avek li pou sa prezantasyon, Anbasader Kenneth Racombo, Mrs

Phillianne Albert, Sekreter Prensipal pour *Blue Economy*. Mr Chrissant Barbe, *Principal Policy Analyst* dan *Blue Economy*. E akote nou annan osi Mr Victor Pool ki *Senior Legal Draftsperson* dan Biro AG.

Alor Minis, mon pou donn ou laparol premye pou komans prezantasyon e *panel* i a kapab angaz avek nou apre. Nou a pas dan *Committee Stage* pour sa silvouple. Minis, ou kapab komanse, ou annan laparol.

DESIGNATED MINISTER
JEAN-FRANCOIS FERRARI

Mersi Mr Speaker. Mersi tou bann Manm. Mon remersye...Mon note ki i annan 29 Manm ki'n vot an faver. Mon vwar keksoz pe amelyore dan Lasanble. Mersi bokou Mr Speaker, mon felisit zot.

(laughter)

DESIGNATED MINISTER
JEAN-FRANCOIS FERRARI

Bonn apre midi Mr Speaker. E bonn apre midi tou bann Manm Lasanble Nasyonal. Bonn apre midi tou dimoun ki a lekout.

Avan komanse mon ti a kontan remersye Mr Speaker pou prezant Departman Lekonomi Ble avek sa loportinite, pou fer en prezantasyon zeneral lo sa

plateau kontinantal ki trouve dan *Plateau Mascarene*. Mye konnen koman *Joint Management Area*, oubyen *JMA* parey nou apel li dan Departman Lekonomi Ble. En landrwa kot Sesel e Moris i partaz ziridiksyon.

Nou prezantasyon Mr Speaker, ozordi pou baze lo bann lenformasyon zeneral lo *JMA*. E i pou plizoumwens tous lo kwa ki *JMA*, ki son *claiming processes*, ki son bann benefis pou nou pei. E osi ki bann defi ki'n ganny rankontre pou devlop sa *plateau* kontinantal.

Sa *plateau* i en kontinyasyon nou later e nou ziridiksyon ki prolouze anba lanmer. E ki ganny trouve an deor nou *Zone Eksklizif Ekonomik*. I annan en sipersifi 396mil met kare. Kilomet kare. 396mil kilomet kare.

E i enportan pou fer resorti ki an sa ki konsern drwa legal anver sa losean e sa lespas navigasyon ki egziste par lao *JMA*, e ki pe ganny servi par lezot pei, ki Sesel ek Moris i partaz drwa souveran zis lo sa *plateau JMA*. E non pa lo sa lanmer, oubyen losean ki egziste par lao sa *plateau JMA*.

Donk nou ziridiksyon i lo son *seabed*. E se pour sa ki dernyerman ler sa Lekspedisyon *Monaco* ti la, zot

ti fer en, sa ki zot apel en resers *on the benthic species*. Sa bann ki lo *seabed*. E drwa Sesel ek Moris lo *JMA* pa afekte drwa legal okenn lezot pei pou servi sa losean, pou servi sa lanmer e lespas navigasyon ki par lao *JMA*. Sa i reste en teritwar enternasyonal avek drwa pasaz pou nenport bato sorti dan nenport pei.

Bann lezot pei i ankor annan drwa pou navige. Zot ankor annan drwa pou lapas dan sa losean. E menm servi avyon ki pas dan lespas sa *plateau JMA*. Me zot ganny restrikte pou pa pratik okenn aktivite ki pou afekte, e ki pou ganny kontak avek okenn resours ki egziste lo *seabed*. Lo sa *plateau* kontinantal.

Alors, demars pou annan ziridiksyon lo sa *plateau*, ti komans dan bann lannen 2007. E nou ti kapab reklanm sa *plateau* aköz dapre Lalwa enternasyonal. Presizeman anba *UNCLOS 76*, i annan provizyon ki en pei i kapab reklanm en *extended continental shelf up to 350 nautical miles from its base lines by proving that this area is a natural prolongation of the state's land territory*.

Donk, dan en fason en pe pli senp; nou zil e sa *plateau* ki nou zil i asiz lo la, i kontinyen

koman en *plateau* e i al an deor sa *zone 200mil limit Zone Eksklizif Ekonomik*. E nou, nou pe *claim*, nou pe reklanm sa bout ki an deor sa *zone*. E Lalwa enternasyonal i permet nou pou nou fer sa.

Donk ti komans an 2007. E an Desanm 2008, Sesel ek Moris ti fer zot premye *joint submission* anver Komisyon Nasyon-z Ini lo *limit* e bann - or plito ann Angle, *The UN Commission on the Limits of the Continental Shelf*. E nek an 2011 ki sa Komisyon lo *Limit Continental Shelf* ti fer rekomandasyon e konfirman, *joint jurisdiction* pour Sesel e Moris lo sa 396mil kilomet kare an deor nou *zone* eksklizif ekonomik. Donk sa ti an 2011. Rekomandasyon ti ganny fer e nou ziridiksyon zwen ti ganny konfirman.

Demars ti ganny konklir an 2012, kot 2 Trete ti ganny sinyen. Premye Trete ti etabli bann *limit* sa *JMA*, ki fer provizyon pou li ganny rekonnèt dan Lalwa nasyonal, e osi enternasyonal. Donk ti bezwen ganny fer atraver en Trete. Sa i permet Sesel ek Moris pou annan drwa pou eksplor, e osi eksplwat bann resours natirel ki lo sa *plateau JMA*. Sa ti premye Trete ki donn

drwa leksplwatasyon bann resours.

Dezyenm Trete ti etabli lenstitisyon e dokiman legal ki pou siport zesyon *JMA*. Donk son *management plan* si zot le. E pou siport sa zesyon, dan son laspe konservasyon, son laspe devlopman, son laspe resers, e osi son laspe eksplwatasyon. E sa pou dir pou en peryod 30an.

Donk, li i fikse dan letan e i pou ganny revwar, re aktyalize dan 30an. Apre 30an, apre ki in ganny sinyen. E parey mon dir zot i ti ganny sinyen an 2012. Donk i reste 19an.

Dapre sa Trete, gouvènanans ek zesyon *JMA* i ganny fer atraver 3 striktir. Mon ti a kontan dir zot toudswit ki mwan, mon personnelman mon war sa bann striktir en pe lour. Me selman se sa ki'n ganny adopte pou son striktir zesyon, pou fer sir ki tou lede pei, Moris e Sesel i ganny, i kolabor e i ganny sa kozesyon egal lo sa *plateau* kontinantal.

Premye, i en *Ministerial Council* ki enkli egalman bann manm apwente lo kote Sesel e osi Moris. E ki konsider bann konsern ki ganny propoze par *the Joint Commission*. Donk ki ganny apwente egalman. Menm kantite manm, menm kantite Minis ki ganny...E zot, zot

ganny propoze *by the Joint Commission*.

Sa *Joint Commission* ki dezyenm striktir pli ba. Li i responsab pou bann regilasyon e i osi responsab pou etabli bann Polisi ki adres bann aktivite dan *JMA*. Donk nenport keksoz ki ganny fer, ki ganny propoze, i bezwen ganny adopte e propoze par *the Joint Commission*. I osi revwar travay sa trwazyenm nivo ki *the Designated Authority*.

Designated Authority, li i pou responsab pou zesyon, *day-to-day* zesyon bann loperasyon dan *JMA*. Donk bann loperasyon kotidyen e i fonksyonn koman en repozistwar pou tou bann lenformasyon syantifik pou *JMA*.

Si mon kapab prezan retourn an montan. Sa i nivo en *CEO* dizon, i al lo nivo en, lekivalan en *Board of Directors*. E apre par lao sa *Board of Directors* i annan donk bann Lotorite Politik, e sa *is the Ministerial Council*.

Donk, se sa 3 nivo ki mwan mon vwar en pe lour. Me selman se sa 3 nivo ki pratik, ki nou menm nou, nou pratik li dan fason ki nou *manage* bann Lotorite e bann lantrepriz piblik dan nou pei.

Apart sa 2 Trete, Sesel ek Moris in osi etabli 3 kod legal ki pou fasilite zesyon *JMA*. E sa i

1) *Marine Scientific Research Code*

2) *Joint Fiscal and Taxation Code*. E

3) *Environmental Code of Practice*.

Akoz i enportan ki sa 3 *Code* i ganny, i ganny met an plas, i ganny etabli, se ki dan nou diferan pei, Moris e Sesel, nou annan en diferan lapresyasyon lo resers syantifik, lo koleksyon *tax*, lo bann *Code tax*, lo bann zesyon lanvironnman.

Nou annan bann diferans. Ki pa bann gran diferans, be nou annan bann diferans. E pou nou kapab elimin sa bann diferans nou'n bezwen agree dan sa 3 Departman. Resers, *Tax* e Lanvironnman. Nou'n agree ki mannyer keksoz pou ganny regarde.

I vremen esansyel pou note ki i annan nesesite pou *domesticate* sa 3 kod legal. E entegre zot ansanm avek sa 2 Lagreman enternasyonal ki ava kree en sel dokiman legal e adres tou konsern ki annan pou fer avek *JMA*, atraver en sel dokiman. Se pou sa ki mon bann ser Manm Lasanble Nasyonal, Onorab, kekfwa se la

ki reponn sa kestyon akfer nou, akoz nou bezwen en Lalwa?

Nou bezwen en Lalwa akoz nou bezwen *domesticate* sa bann kod legal. I bezwen antre anba nou Lalwa e antre anba osi anba Lalwa Moris. E pou nou kapab fer sa, nou pou bezwen sipor, zot sipor Lasanble Nasyonal pou fasilite e konplet sa proses. Si non, i reste bann *Code* ki pa, ki napa *force de loi*.

Prezan, pou Sesel annan en *plateau* kontinantal ki prolouze an deor nou *Zone Eksklizif Ekonomik*, i definitivman en gran lavantaz. I en gran lavantaz pou nou pei, akoz sa i kree en nouvo sours pou kontribye dan diversifikasyon nou lekonomi evantyelman. E i osi prezant e ofer plizyer loportinite pour ki pei i kapab rekolte serten benefis lo bann resours adisyonel; si i annan parey nou pe sey, nou'n lanse la, en resers lo banbara. Lo *Saya de Malha*, lo sa *extended continental shelf*.

Si sa, si sa i- nou trouv sa, oubyen nou trouv en lot resours, i ogmant nou lespas pou nou kapab eksplwat sa bann resours dan en bit ekonomik.

Parey in deza ganny mansyonnen, Lalwa

enternasyonal i permet nou eksplwat sa bann resours ki ganny dekouver lo *plateau*. Presizeman bann resours ki ganny dekouver, ki egziste lo sa *plateau* selman, pa anler. E i en pe difikilte akoz plizyer dimoun i dir ou be sa *water column*? Sa en lot zafer.

Mon krwar ki bann Avoka dan lasal i konn pli byen *UNCLOS* ki nou, e nou napa ziridiksyon *on the water column*. Bann resours ki ganny dekouver, ki egziste lo sa *plateau*, selman i ganny eksplwate.

Setadir bann resours ki vivan parey banbara, krab, *mollusc*. E bann ki pa vivan, bann ki pa vivan - parey bann mineral, *gas* e bokou plis ankor. Be selman i pa osi senp ki sa. I annan par egzanp, serten zannimo, serten resours ki reste an prensip, lo disab be tanzantan i sote. Ler i sote kot i ete? I dan *water column* li. Ou pa ganny drwa eksplwat li akoz i anler dan delo e i pa anba lo disab.

Donk i annan sa bann pti difikilte ki fer li en pe, ki fer li en pe konplike. Me selman sa i bann keksoz ki Sesel ek Moris, nou konfidan ki nou kapab sot sa bar e avanse, san ki nou les sa, sa bann keksoz fatig nou.

I annan osi loportinite letid e lanplwa pou bann sitwayen dan bann domenn parey lasyans maritim, zesyon losean, zeoloji. E menm bann kordinater proze ki annan pou fer avek devlopman losean.

I annan osi potansyel pou bann investiser ki enteresan dan bann proze parey *marine biotechnology*, *marine bioprospecting*. E pa oubliy bann spesyalis dan konservasyon *la marine*, ki zot osi zot benefisyè a travè bann proze lekspedisyon e leksplostasyon ki ganny pratik dan fon lanmer; parey mon ti pe dir pli boner, *The Monaco Expedition* ki ti ganny fer lannen pase.

I osi enportan pou fer resorti ki en tel Lagreman enternasyonal ant 2 pei, Sesel e Moris, i istorik e inik dan lemonn. E mon ti pe partaz avek mon bann koleg isi lo latib ki, ler nou siny en Lagreman koumsa, i pa donn nou zis benefis la pou la ant Moris ek Sesel. I donn nou en serten kredibilite o nivo enternasyonal ki nou, nou bann partner serye, e nou kapab antre dan bann Trete Enternasyonal dan en fason respektab e respektè a tou bann lareg.

Donk, sa Lagreman *JMA* i premye *Transboundary*

Management Agreement pou zesyon pli gran *plateau* kontinantal dan lemonn, ki ganny zere par 2 pei. Sa i ogmant nou vizibilite e fer nou ganny rekonnèt lo nivo rezyonal e osi enternasyonal. Deplis, i permet sa 2 pei pou benefisyè avek bokou sipor teknik, ki kominote enternasyonal tel ki *GEF Global Environment Facility*, a travè *UNDP* i met a nou dispozisyon. Sa bann sipor i ed Sesel devlop son kapasite dan diferan laspe teknik, ki relye avek devlopman *plateau* kontinantal, e menm losean.

I enportan Onorab pou note, ki sa *plateau* kontinantal i pozisyonnen dan en landrwa stratejik pou bokou devlopman ekonomik, e osi devlopman sosyal. I sitan izole avek tou bann aktivite imen ki deroul lo bann bor lakot e sa i fer li ideal pou pratik bann letid syantifik ki annan pou fer avek prezervasyon nou leko sistenm maren.

An se moman, i bon note ki i nesese pou travay lo en *Marine Special Plan Framework* ki pou gid bann aktivite ki ganny pratik, e pou ranforsi bann pratik prezervasyon, konservasyon e devlopman dan *JMA*. Sa i pou konplimant sa plan stratejik ki le 2 pei pe travay lo la, ki pou ganny

akonpanyen par en plan ki mannyer nou pou mobiliz bann resours.

Pou nou bouze e ki aktivite dan sa rezyon i bon, nou agree ki aktivite i ganny permet dan sa rezyon, e le 2 pei i dakor pou osi konsider leksplwatasyon delwil.

Definitivman, pou devlop en *plateau* kontinantal parey, i annan bokou defi ki vin avek. Malgre i annan resers syantifik ki'n ganny pratike dan *JMA*, bokou plis lenformasyon i an bezwen an se moman, pou gid desizyon stratezik e devlop bann proze dan *JMA*.

I annan en gran mank pou bann spesyalis dan bann domenn spesifik, pou devlop sa *management area*. E menm si Departman Lekonomi Ble i Sekretarya, nou bezwen bann lezot eksper dan pei pou kapab siport nou dan sa demars. *JMA* i osi vreman lwen e izole ant Sesel e Moris. E sa i fer, i fer ki i konplike pou ganny akse avek e menm pratik bann aktivite sirveyans. Se pou sa ki sak loportinite ki nou gannyan pou nou *partner* avek en lorganizasyon syantifik enternasyonal, nou pou fer li.

I annan potansyel ki i kapab annan konfli avek lezot pei ki lapes dan sa lanmer par lao *JMA*. Sa potansyel i la aköz

nou konnen ki i annan en bon pe labi ki pe deroule dan sa landrwa. Me pour le moman, nou napa okenn konfli avek okenn dimoun ki pe servi sa *area*. Apart bann ki tranpe, zis an deor nou *EEZ* e tanzantan zot sot anndan pou zot lapes ilegal.

Fodre pran kont ki Sesel i annan lezot *plateau* kontinantal ki pe ganny *managed* par Departman Lekonomi Ble. I annan 2 lezot. Nou annan *northern plateau* ki sitye dan nor Sesel, e ki agrandi teritwar Sesel par 14mil840 kilomet kare. Sa i ganny zere inikman par Sesel. Aköz i pa ganny partaze avek okenn lot pei.

An plis, Sesel i annan en lot *plateau* kontinantal ki ganny vwar dan rezyon Aldabra e ki an se moman dan *claiming process*. Li i kapab annan serten dispit balizaz avek *La Tanzanie*. E, se sa non? E ki sa *claiming process* i an mars avek Nasyon-z-Ini.

Pou konklir Mr Speaker, mon mazine ki bokou i kapab ganny en pli gran leklersisman lo kwa sa *JMA*, e ki son benefis pou nou bann sitwayen. E pou nou...E pou pli presize pou nou bann zenn e zanfan demen, ki bann benefis? Nou Minister pou vreman apresye sipor bann Manm Lasanble, e zwenn nou

dan nou demars pou akonpli bann proze ki nou anvizaze enplimante pou devlopman ekonomik nou pei.

Sa i en travay ser Manm Onorab ki'n komanse avan -pandan plizyer lannen avan, parey mon'n dir 2007, se sa. Avek bann ladministrasyon oparavan. E ki nou, nou pe kontinyen anmenn li devan pou anmenn lo son konklizyon.

Nou, nou'n konklir, nou'n sinyen, e la prezan i pou lo zot bann Manm sa Lasanble pou zot formaliz li anba en Lalwa. E nou anvizaze enplimante sa Lalwa pou devlopman ekonomik nou pei e pou siport nou dan nou demars, nou pe demann zot pou fer revi lo sa 2 lagreman enternasyonal. E osi pou finaliz domestikasyon sa 2 Lagreman lo nivo nasyonal.

Avek mwan ozordi, mon annan bann dimoun ki annan plizyer lannen leksperyans dan negosyasyon e diskisyon lo sa size. E mon asire ki nenport kestyon ki zot annan i ava ganny reponn.

Mon santi ki i en moman enportan pou nou kapab *convince* zot ki sa i en travay ki pran letan, ki kout en pe, me selman ki anmenn en kantite benefis. Donk pou le moman mon ava aret la. E mon a dir ou mersi Mr Speaker. E ki nou

panel i pare pou pran nenport ki leklersisman. Mersi.

MR SPEAKER

Mersi Minis, pou ou prezantasyon. Mon aprezan envit bann Manm Onorab pou zot kestyon. Byensir piblik a konpran. Nou pa pe diskit Lalwa ki Lasanble pou pran pli tar. Nou pe zis rod leklersisman lo sityasyon *Plateau Mascarene* e bann Trete ki relye avek sa. Manm ki anvi poz kestyon? Onorab Pillay, ou kapab komanse.

HON SEBASTIEN PILLAY

Mersi Mr Chairman. Mr Chairman, mon ti a kontan ganny en klarifikasyon vizavi rol, fonksyon e finansman pou sa Lotorite. Premyerman, Minis in mansyonn sa Komisyon ki apre i kree en *Designated Authority*.

Prezan, sa *Designated Authority* se li ki pou *manage* sa landrwa. E enn bann *clause* ki mon pe lir la i koz lo *cost* pou sa Lotorite. Eski Minis i kapab klarifye ki mannyer sa bann kou pou ganny *borne* par bann Gouvernman respektif?

Apre dezyenmman. An sa ki konsern *sharing of revenue* Seksyon 12, i dir poudir sa 2 *Contracting Parties* pou *share* bann reveni ki ganny resevwar

in respect of bann natural resource activities dan sa landrwa.

Eski Minis i kapab klarifye pou nou, ler sa lagreman i dir 50/50. Me si se par egzanp enn ant le 2 pei ki pe inisyé sa bann aktivite? Par egzanp nou'n vwar poudir Sesel in bokou pli proaktiv dan inisyé serten aktivite resaman ki Moris. E ki Moris pou li son prosesis prezan, sa prosesis ki nou pe fer, prezan ki li i pe al fer. I pa garanti poudir i pou, i riske *as smooth as* pou nou.

Eksplik nou ki pou arive dan sirkonstans si nou ki'n deplway resours, ki'n deplway bann fasilite, e sa leksplorasyon i anmenn reveni pou nou pei. E sa kontra pe dir nou lobligasyon se ki nou pou *share* sa reveni 50/50, malgre si nou ki'n *bear all the cost*. Me pou le moman se nou ki pe montre plis lentere dan sa domenn. So eski ou kapab klarifye ki mannyer sa i pou ganny negosye. Mersi.

MR SPEAKER

Mersi. Minis, ou a adrese?

DESIGNATED MINISTER
JEAN-FRANCOIS FERRARI

Mersi. Mersi Mr Speaker. Mersi Onorab. Onorab premyerman mon ti a kontan dir ki i pa toutafe korek ki zis, ki se nou ki

pe montre plis lentere. Moris i, dan en sans, nou'n bezwen dan sa detrwa lannen *play* en pe *catch up* avek zot aköz zot in vremen tre aktiv pou zot, pou zot met an plas zot bann striktir Moris.

E zot annan en striktir ki pe regard sa *JMA* bokou pli solid ki pou nou. E zot annan bann... Zot in eksprim bann lentere pou fer bann travay resers dan *JMA*, menm avan ki nou nou'n, avan ki nou nou'n fer. Me sa ti zis lekspresyon.

Nou, nou'n kekfwa fer premye lentervansyon fizikman dan *JMA* atraver *Monaco Expedition* kot nou ti *partner* avek sa lorganizasyon. Me selman tou bann keksoz i ganny - tou bann *cost* e tou bann profi i ganny partaze 50/50. E mon ava les, mon ava les *PS* Anbasader donn en pe detay lo ki mannyer sa bann *cost* i ganny partaze.

MR SPEAKER

Thank you. PS?

AMBASSADOR KENNETH RACOMBO

Bonn apre midi Mr Speaker. Bonn apre midi tou Onorab. Mersi Minis. Pou reponn premye kestyon Onorab Pillay. Annefe Departman *Blue Economy* i fer provizyon pou

partisipasyon son bann *commissioners* pou *attend meeting* ansanm avek ler i *meet* avek Moris. E nou osi fer provizyon ki ler Moris i vin Sesel pou nou *cater* pou fer konferans oubyen *workshop*.

Me, *Designated Authority* i pa ankor ganny *setup*. Me selman lannen pase dan Bidze zot ti aprouv en *rental space* pou nou kapab si *Designated Authority* i *kick-off in 2023*. Akoz deza nou'n resevwar detrwa lekipman ki sipoze vin ladan. So, i annan sa lofis ki baze Providence. E pour le moman dan en labsans en *Designated Authority*, tou lede pei i apwent en *focal point*. E *focal point* pou Sesel i lo mon kote gos, Mr Chrissant Barbe.

So *basically* zot, zot *deal* avek tou bann *first site* ki vini pou *matters* ki *related to the JMA*. Me selman, osi dan Bidze i annan provizyon pour dan le sans ki nou ganny en *CEO* nenport ler. E *Designated Authority* i ouver, sa i ganny *cater*, i deza dan Bidze Departman *Blue Economy*. E lo kote partaz reveni, pour le moman laranzman i ki bezwen partaz li 50/50. Mersi.

MR SPEAKER

Ou kestyon i en *follow up*? Ou krwar i pli bon pran li la

konmela, avan mon pas lo lezot Manm, Onorab Pillay?

HON SEBASTIEN PILLAY

Mon kapab espere si i annan Manm ki annan lezot kestyon.

MR SPEAKER

I annan lezot Manm, wi.

HON SEBASTIEN PILLAY

Me selman i baze lo sa seksyon ki konsern sa Lotorite menm.

MR SPEAKER

Ok, be annou pas en pe lo lezot Manm. Onorab Georges, ou kapab komans touzour.

HON BERNARD GEORGES

Mersi Mr Chair. Mr Chair, mon annan plizyer. Mon annan 2 ou 3 kestyon. Me avan sa, eski mon konpran byen Minis e *panel*, ki annefe nou napa en gran swa la ozordi pou nou fer. Akoz Trete in fini ganny sinyen, in ganny ratifye. Tou sa ki nou pe fer ozordi se nou pe *domesticate* li.

E depar mon lektir sa Lalwa, *basically*, sa ki nou pe fer se, nou pe pas en Lalwa avek en pti git Seksyon, apre zis nou pe *reproduce* sa 2 Trete avek tou son bann *Annex*. *Basically, that's what we're doing*.

Mon kestyon alor lo prosedir se, eski i toutafe korek

pou nou dir dan *long title* ki ‘*This is an Act to establish a three-tiered joint administrative structure consisting of a Ministerial Council* eksetera, eksetera’.

Oubyen, ‘*This is an Act simply to domesticate the JMA and the other one*’. Akoz *the Act itself* i pa etabli sa 3 fonksyon. Se Trete ki, se Trete ki etabli sa. E dan lafason ki nou'n drafte nou Lalwa, i paret mwan ki son lentansyon avek son larealite i diferan. E mon ti a kontan ki nou eksplor sa en pti pe.

MR SPEAKER

Ou ti a kontan poz la en pti moman Onorab Georges? Akoz mon annan en kestyon. Mon en pti pe *uncertain* lo ki degre nou pou al lo sa *Bill*, konpare avek ki degre nou pou eklersi prezantasyon ki'n ganny fer. E mon...Petet bann ki annan plis leksperyans lo sa i kapab gid nou lo prosedir.

Eski nou pou pran bann *clause* dan *Bill*? Par egzamp, ki ou pe fer referans avek. Oubyen nou pou les sa pou ler nou konsider *Bill*? Silvouple, les mon a les Onorab Georges adrese apre...

HON BERNARD GEORGES

Mon konpran sa parfetman, Mr...Mon pe zis, dan en serten fason. Mon pa pe demann *panel* reponn. Mon pe zis eksprim en santiman pou permet mwan demann avek *panel* kestyon ki mon anvi demann zot.

MR SPEAKER

Wi, i ava osi depan...Non mon pe demann sa pou gid en pe lezot Manm osi lo ki mannyer nou pran sa sesyon la. Onorab Pillay, ou ti le fer en pwen lo la?

HON SEBASTIEN PILLAY

Efektivman Mr Speaker. Mon krwar kestyon Onorab Georges i pertinan li. Me selman nou pou bezwen adres li ler nou antre dan prosedir pe *deal* avek sa dokiman *as a Bill*.

Kestyon ki nou bezwen pe demande la se i bezwen baze lo bann prezantasyon ki Minis in fer. Akoz Minis menm dan son prezantasyon in eksprim serten konsern lo groser sa Lotorite ki, enn bann konsern en groser Lotorite se i annan son finansman ki ou bezwen *manage* li. E mon konnen se sa ki Minis ti pe al ver.

So, annou *limit* nou lekor pou nou konsantre lo sa prezantasyon e nou bann konsern vizavi sa prezantasyon. Lo sa ki lo *seabed* e bann keksoz ki *involve* ek sa. Akoz

nou pou *still* annan en deba lo merit sa Prozedlwa.

E en keksoz ki mon mon'n sey regarde, ki fer ki nou kapab fer en prosedir diferan osi, se ki. Malgre ki nou'n ratifye sa Trete, sa Lalwa i prezant devan nou koman en Lalwa, e ki vedir nou *still* kapab propoz lamannman. Me son ralifikasyon ki sa lamannman pou annan, nou pou bezwen retournen e al re diskite.

So mon ti ava, mon ti ava propoze ki kestyon Onorab i pertinan. Ki nou kapab petet pran sa kestyon ler nou konsider Lalwa lo son *Third Reading*, nou dan *Committee Stage*, e nou ava kouver sa eleman laba. Pou le moman nou konsantre lo prezantasyon ki'n ganny fer lo sa size *Mascarene Plateau*. Sa ki mon santi.

MR SPEAKER

Wi, selman letan zot pe koze la, mon'n realize ki mannyer i pou difisil fer en deba lo prezantasyon san fer referans avek *Bill*. Me selman Onorab Georges, prosede.

HON BERNARD GEORGES

Wi, Mr Chair, mon konpran egzaktaman sa ki pe arive la. Sa ki mwan mon pe sey evite se ki nou ariv dan *Second Reading* taler, e ki nou pa'n eksplor sa

bann nide. I pou tro tar. Akoz ler nou pou ariv dan *Second Reading*, si, bann kestyon ki mon pe demande la i fer sans, nou pa pou annan nou en *Bill* ki nou pou pase. Se pou sa rezon ki mon pe *alert panel* a sa moman.

Sa parey mon ti'n dir ti en pefas en pwen prosedir. Akoz set en pwen ki pe enkyet mwan en pe dan lafason ki depi ler mon'n lir sa *Bill*. Me i resorti dan deklarasyon ki Minis in fer, ki annan sa 3 Lotorite ki'n ganny propoze dan Trete. E ki sa *Bill* pe anterinen ozordi dan en fason ki i pa pe neseserman anterin li.

Mon pa al pli lwen ki sa a sa moman, e nou ava pran sa en pe pli tar. Me mon ti ava swete ki *panel* i *focus* en pti pe lo la akoz, i en pwen en pe, i en pwen en pe fondamantal pou mwan ki *basically the driver of the Bill*, dan sa sez kot mon asize la ozordi.

Me les mon poz en kestyon ki napa naryen pou fer avek striktir *Bill*. E ki kekfwa pa ganny kouver par sa, ou kekfwa i an deor sa size, me mon bezwen demann li kantmenm; Eski, vi deba Minis ki pe arive konmela dan plizyer parti lemonn lo en moratwar lo *deep seabed mining*, eski Sesel in pran en pozisyon lo la?

Eski sa ki nou pe koze la, i antre dan *deep seabed mining*. Oubyen eski *deep seabed mining* i an deor bann ziridiksyon nasyonal e teritoryal. *Basically, deep seabed on the high seas rather than* lo en landrwa kot nou annan en *joint management*? Mersi.

MR SPEAKER

Mersi. Mon a pas laparol avek Minis ek *panel*.

DESIGNATED MINISTER
JEAN-FRANCOIS FERRARI

Ok. Onorab. Premyerman mon ti a kontan, mon retourn en pa ann aryer pou mon dir ki. I enportan ki si zot vwar keksoz ki trouble zot; oubyen ki zot santi i pa apropiye pou nou pei, ki zot sinyal li, *ok?* E nou pou gannyen, zot pou gannyen dan prosedir pou deba lo *Bill*. Dan *Third Reading*, zot pou gannyen pou sa posibilite. So, donk sa i en keksoz ki vreman enportan.

Pou reponn ou kestyon, i en size ki reste ouver. *Oil and gas research* i posibil, *ok?* I posibil dan sa *area* aköz sa se en keksoz ki Moris napa problemm avek. Tandis ki nou, nou annan serten rezervasyon lo la. Me selman sa ki mon anvi ki nou tou nou konpran isi se ki,

nenport ki desizyon, nenport ki desizyon ki ganny pran pou nenport ki aktivite, i bezwen lagreman tou lede kote a 100poursan.

Donk, sa i en *clause*, ki mannyer ou kapab dir. I en lareg ki permet nou gard nou ziridiksyon e gard nou Lotorite a sak fwa ki nou pran en desizyon, *ok?* Mwan personnelman mon ti ava dir ki mwan, mon pa an faver *deep sea bed mining*. Mon pa dakor avek *trawling* par egzanp, lo ki bann kalite lapès ki bann Sinwan i fer. Bann keksoz koumsa, *seabed trawling*. Pa dakor avek sa, *ok*.

Me selman sa Lalwa, sa Trete i permet nou konsider sa. Me selman i permet nou osi obzekte, aköz nou pa pou permet Moris. Oubyen Moris pa pou permet nou fer okenn keksoz ki zot, zot pa dakor avek, ki nou, nou pa dakor avek. So mon ti anvi fer sa pwen, sa pwen kler. Ale, *PS?*

AMBASSADOR KENNETH RACOMBO

Mersi Minis. Onorab zis pou reponn ou kestyon spesifik. Dernyen fwa nou ti diskrit bann *allowable activities* dan *JMA*. *Both* Sesel ek Moris ti annan rezervasyon lo *deep seabed mining* e nou ti *agree* pou nou al

fer en *further* refleksyon. Savedir pour le moman i pa lo latab. Mersi.

MR SPEAKER

Ou pe *follow-up* lo sa pwen?

HON BERNARD GEORGES

Wi, Mr Chair, mon pe *follow-up*. E ankor enn fwa mon pa konnen si, me kekfwa *panel* ava eksplik nou, Minis in dir ki nou pou annan posibilite pou amann sa Lalwa. Be si nou amann en porsyon sa Lalwa ki *is the Treaty*, nou pa kapab.

Akoz sa Trete in fini ganny sinyen, *that's my problem*. Ki kantite sa Lalwa ki nou kapab amande? Par egzanp, si nou tir en keksoz ki'n fini ganny tonm dakor ant sa de pei e ki ladan? Akoz tou sa ki nou'n fer, nou'n reprodwi sa Trete.

Sa mon kestyon, akoz si...Oubyen si mon oule *insert* en keksoz pou dir *deep seabed mining will not happen*. Moris kekfwa pa pou dakor. Problem se ki kantite anmare ki nou lanmen in anmare? Oubyen ki kantite laliberte ki nou annan avek sa *Bill*? Mersi.

MR SPEAKER

Panel?

AMBASSADOR KENNETH RACOMBO

Onorab, nou bi i ki nou annan en Lalwa, *well* en *Act* ki *govern JMA*. *Meaning, merge* sa de *Treaty* avek sa 3 *Codes*.

Now. Dan en senaryo kot nou annan rezervasyon oubyen lamannman dan sa 2 *Treaty* avek dan sa 3 *Codes*, i pou *prudent* pou nou ler nou *meet* ek Moris, rediskite. Pou dir, *look from our side* nou anvi *review* tel seksyon dan Trete. Oubyen tel seksyon anba *Code*, *rather than* nou *move forward* avek en dokiman ki i annan *challenges* ladan. Sa i nou pwennvi. Mersi.

MR SPEAKER

Mersi, wi. Avan...Ou le *follow-up* la? Wi. Selman les mwan propoz avek le 2 *Leaders*, ki ler nou fini *settle* sa pwen, si nou arive *settle* li. Ler nou fini avek sa pwen, annou pran kestyon lezot Manm. E nou a rezerv posibilite pou zot a lafen kapab retourn lo okenn pwen ki bann Manm in manke, si i ankor ouver. Onorab Pillay, wi?

HON SEBASTIEN PILLAY

Ok, Mr Speaker, mon ava swiv ou konsey akoz lo sa size nou tou lede...

MR SPEAKER

Wi, sansan nou pou gard zis deba antre zot de.

HON SEBASTIEN PILLAY

Deba pou reste ant nou de, mon konpran ou. So, nou ava donn lezot Manm loportinite pou kapab koze.

MR SPEAKER

Ok, dan sa ka mon a pas kestyon Onorab Gill. Onorab Mondon?

HON TERENCE MONDON

Mersi Mr Speaker. Mr Speaker mon kestyon in *partly* ganny aborde. Akoz mon ti anvi konnen si vreman i annan bann resers ki'n fer dan sa *area*, pou nou konnen zisteman ki bann potansyel i annan.

E an menm tan mon anvi konnen si i annan bann lezot par dan lemonn kot nou, kot i annan sa *joint management* ki an plas?

E petet ki bann *challenges* ki annan ler ou pe konpare avek bann lezot *similar* laranzman ki'n annan e ki nou, nou kapab fer sir ki nou kapab *avoid*, si oule? Mersi Mr Speaker.

MR SPEAKER

Thank you, Onorab. PS? PS, wi. Minis pe envit ou pou pran laparol.

AMBASSADOR KENNETH RACOMBO

Mersi Onorab pou ou kestyon. Onorab pour le moman i sel *joint management* lo en *extended continental shelf* ki 2 pei pe fer *bilaterally*. Parey Minis ti fer en *briefing* avan. Nou pe *initiate the same process* kot *the Aldabra Region* avek *Tanzania*. Me selman *Tanzania* pa tro pe montre lenterere pou fer sa laranzman avek nou.

Annefe, zot, zot in deza...Akoz pou ou *claim*, ou bezwen *submit* ou bann *data* kot lenstitisyon UN e zot, zot in fer sa *way in advance* akoz pa anvi fer li *bilaterally* avek pou nou. Me ki nou nou'n fer vi ki nou osi nou annan lenterere laba, i annan en prosedir ki ou apel *Stop the Clock* ki nou'n *initiate*.

Savedir ler UN pou *revise* zot *submission*, zot pou bezwen konsilte nou pou gete si nou nou'n pare avek pou nou. Ki pou le moman i pa tro *look promising*. Akoz parey ou pou agree ek mwan, pou rod *seismic data* i en legzersis ki koute. E nou'n inisye demann avek 2 *partner* pou asiste nou avek sa, me selman i pa *look* tro *promising*.

So, pou reponn ou kestyon, i sel laranzman ki annan dan lemonn lo en *joint management* lo en *extended*

continental shelf. E, wi i annan detrwa lekspedisyon ki'n fer dan sa landrwa, dan JMA. E i *compulsory* pou ler *third party* i vin fer resers zot donn nou *data* pou nou analize.

E nou annan bann *data*. Pe ganny analize bann potansyel. E sanmenm sa ki parey Minis ti *brief* ou, nou pe al lans dan en prosedir *Marine Spatial Planning*, kot ou servi sa bann *data* pou gete ki aktivite ou kapab fer, dan ki parti *zone* dan JMA. Mersi.

MR SPEAKER

Les Minis. Ou le azoute?

DESIGNATED MINISTER **JEAN-FRANCOIS FERRARI**

Wi, mon ti a kontan zis azout en keksoz an term resers. Kekfwa zot in tandé, zot in deza tandé poudir lo Ban *Saya de Malha*, donk lo *Plateau Mascarene* ki menm zafer, i annan posibleman enn bann pli gran *seagrass meadows* dan lemonn, ki annan bann gomon gran fey ki esansyel pour *carbon sequestration*.

Donk, i annan en potansyel a lavenir pou nou *claim* sa *area* koman nou par dan ki mannyer nou pe elimin *carbon* dan lemonn. Donk sa i en potansyel. Nou napa tou

bann *data*. Me selman nou'n komanse ganny en pe *data* lo la.

E sa avek lezot aktivite, lezot lenformasyon ki *Monaco Expedition* par egzanp in anmase, nou pe met ansanm. Nou pa ankor fini ganny tou bann lenformasyon. Me nou annan en lakor ki tou, tou keksoz ki ganny vwar dan sa bann resers pou ganny kominik avek Sesel e avek Moris. Mersi.

MR SPEAKER

Wi, Onorab Hoareau?

HON JOHN HOAREAU

Mr Speaker, mon annan en pti *point of order* ki *arise* lo kestyon ki Onorab Georges in fer resorti. Lo kote prosedir plito. An vi ki in fer resorti ki nou kapab fer lamannman *at the Third Reading of the Bill*. Me si sa lamannman ki nou, nou pe propoze. Apre zot lo kote *the Bill itself* si i pase, i vin Lalwa pou nou pei.

Me selman si *the panel itself* zot al sey diskit sa bann lamannman avek Moris, e Moris i annan en *stalemate* lo la zot pa pe dakor. Ki prosedir konmsi nou pou pran la? Ki kalite desizyon? Mersi.

MR SPEAKER

Mon pa'n tro sezi, selman eski mon konpran ki ou pe

demande. Eski i pou vreman annan posibilite pou fer amannman apre. Oubyen parey Onorab Georges in dir, nou lanmen pou fini anmare? Eski sa? *Panel*, ou kapab adrese?

AMBASSADOR KENNETH RACOMBO

Mersi Onorab pou ou kestyon. Onorab, dan en senaryo kot nou annan bokou amannman pou fer dan Trete avek dan sa bann *Code*, mon pou krwar *way forward* i ki nou pa *approve* sa *Bill*. Ou les *the Seychelles team* al diskrit ek Moris. Met *new proposal on the table*, prezan nou, nou fer desizyon lo *the new proposal at a later stage*. Mersi.

MR SPEAKER

Ok, sa i ava en manner. Les mwan prosede avek lalis kestyon. Onorab Gill, ou'n re pran ou plas?

HON CHURCHILL GILL

Mersi Mr Speaker. Mon premye kestyon i lo *sharing of revenue*. La manner in mete se zis in dir nou poudir sa *2 parties* i 50/50. Me selman nou konnen sa *2 parties* zot menm zot pa kapab fer eksplorasyon.

En lot *parties* ki bezwen vin fer sa leksplorasyon. E i pa kler ki bann diferan kalite

kondisyon ki sa *2 parties* pou pare, ki zot in tonm dakor pou fer lo la avek sa *third party* ki li i fer leksplorasyon. En klarifikasyon lo la.

Apre, mon lot klarifikasyon lo lenterpretasyon. Mon konnen Onorab Georges in dir nou lanmen i deza anmare, selman pou klarifikasyon mon krwar ti a bon si nou kapab gannnen pou nou kler ki manner zot, zot pe enterpret sa *clause 17(1)*. Pou gete si nou tou nou pe konpran li dan menm direksyon.

E mon dernyen pwen. Mon'n gete 19(1) kot...Akoz mon ti pe mazine ki manner *waste management* pou ganny *manage*, si i arive ki leksplorasyon i vreman *take off*? Dan *clause 19* tou bann keksoz ki'n mete se sa *parties* pou *co-operate* ek sa lot.

Be *to what extent* ki *co-operate*? Sa pa kler. Si petet zot ti kapab zis donn nou en nide ki zot, zot *understanding* ki zot pe koz ek Moris dan sa direksyon? Mersi.

MR SPEAKER

Mersi. *Panel* i pare pou adres sa?

DESIGNATED MINISTER JEAN-FRANCOIS FERRARI

Mr Speaker, san donn lenpresyon ki pe evit deba. Mon krwar ki si nou al dan bann detay spesifik lo *clause, by clause*, nou pa pou kapab, nou pa pou kapab avanse. Akoz nou, nou la isi pou nou koz lo *general merits of the Bill*.

En prezantasyon, e sa ki nou pe rode nou koman en Minister se. Eski Lasanble Nasyonal i dakor pou siport en *venture* parey? En Lagreman Bilateral ant 2 pei pou nou kapab eksplwat sa *zone*? Si nou dakor lo la.

E ler nou al dan bann detay, si i annan bann bout ki pe ganny propoze, ki nou, nou'n negosye. Akoz, zis pou reasir zot, Morisyen pa'n met sa devan nou, pou nou aksepte. Sa se en travay ki nou nou'n fer avek zot *jointly, ok?*

E si i annan keksoz ki bezwen sanze, zot ava sanze. Me selman sa ki enportan la se ki nou ganny en lagreman lo pou nou formaliz sa *joint management*. E mon pa konnen ki manner mon kapab eksplik li diferaman. Me *that's the point* ki nou pe sey rode.

MR SPEAKER

Wi, mersi. Mon krwar sa size, sa size separ *Bill* avek sa prezantasyon i en soz ase difisil.

Eski *PS* in lev lanmen? Wi, pou azoute?

AMBASSADOR KENNETH RACOMBO

Mersi Mr Speaker. Si mon pou reponn ou kestyon lo eksplorasyon avek *sharing of revenue*, Onorab, annou get *Petro Seychelles* konmela manner i *operate*, leksplorasyon i ganny fer *by* en *third party*. *Petro Seychelles* li i kolekte larzan *through* bann *licenses* ki sa *third party* i donn zot. Oubyen ki *stipulate* dan zot Lalwa.

So, model anba *JMA* i pou *more or less* parey. So si en *third party* i vini, i pey son bann *licenses* epi bann lezot *fees* ki annan. Sa reveni i pou al kot *the Designated Authority* si in fini etabli. Si non sa 2 *focal point* zot pou ansarz, *manage* sa. *And then*, wi, i pou ganny divize 50/50. Mersi.

MR SPEAKER

Mersi. Wi, Onorab Gill?

HON CHURCHILL GILL

Se egzaktman ki mon pe demann ou. Akoz *licences*, i pou zot *operate*, be selman zot pe *operate* la pou tir *resources*. Ou konpran? Sanmenm mon dir. *Anyway*, i ava eklersi sa. Me selman sa ki mon ti pe rode.

Akoz *licences* se ou donn zot lotorizasyon pou zot fonksyonnen. Mon mazine i koumsa. Me selman zot, zot travay pe tir *resources*.

Aprè Mr Speaker, nou diskisyon, i pa pe deborde li, zis klarifikasyon. Akoz parey i pe dir, i pe gete si Lasanble i dakor ek en *venture*.

Be pou nou dakor ek en *venture* nou bezwen si nou, i annan keksoz pa kler, nou bezwen demande. I pa vedir nou pe, nou pe *cross boundaries*. Zis li donn nou i dir nou be sa i koumsa, oubyen sa nou pa konseye.

MR SPEAKER

Wi, wi. Wi, wi. Be selman sa ki nou pe dir se, posibilite pou klarifye bann pwen dan *Bill*, i pou vini li ler nou konsider *Bill*. Onorab Aglae?

HON EGBERT AGLAE

Mersi Mr Speaker. Bonn aprè midi. Ou a gid mwan si mon pa pe al dan *Bill* ouswa an deor *Bill*. Mr Speaker, Minis dan prezantasyon in dir poudir Moris i en pti pe pli avanse. Sirtou dan bann demars i fer, baze lo en larepons ki'n donner.

Mwan, mon ti anvì konnen si demen i arive ki i annan okenn dezakor, *ok*? Petet i

kapab Sesel ouswa Moris, i deside fer en aksyon ki pa anlany, *ok*. Premyerman kot i konsern *dispute resolution*, lo ki nivo ki sa i ganny entermedyer dan en fason? Pou si annan, ariv okenn dezakor ki 2 parti pa'n dakor avek serten aksyon ki'n ganny fer anba sa?

Aprè dezyenmman, par egzantp si Sesel li menm li in deside *partner up* avek enn nou bann *partner* bilateral. Dizon parey ek *UAE*. Ouswa Moris li menm, i kapab dir be *ok*, mwan mon annan en relasyon avek Langleter, *UK*, pou fer serten travay ki egziste anba sa *management area* menm, e lo sa Lagreman *also*.

So, ki mannyer ki prezan bann negosyasyon i fer pou ki tou lede kote prezan i dakor. Akoz la nou'n anvoy en lot pei dan nou ziridiksyon. So ki mannyer zot etal sa?

MR SPEAKER

Tre byen. Minis?

DESIGNATED MINISTER JEAN-FRANCOIS FERRARI

Wi, mersi Onorab. Onorab, i menm parey sa sityasyon ki ti arive ler nou ti pe esper permisyon pou nou donn *Monaco Exploration* sa posibilite pou li pran bann *live samples* lo

Ban *Saya de Malha*, donk lo *Plateau Mascarene*.

Moris ti'n ezite, akoz zot ti annan en konsern lo kote sa bann *samples* pou ale. E ki garanti i annan ki sa bann resers, bann *data* pou ganny retournen a Sesel, a Moris? A sa moman la, Moris pa ti donnen permisyon. E ziska 3 zour avan Moris pa'n donnen permisyon ziske ler i ti satisfè.

Si Moris pa ti'n donn permisyon, napa naryen ki ti pou arive. Napa naryen ki ti pou arive. Sel keksoz ki sa resers pou kapab fer, se pas lo sa delo. Akoz ou pa kapab anpes li pase dan sa delo. Me i pa ti pou, i pa ti pou kapab al pran bann *samples* kont lagreman enn bann parti.

Donk, tou bann desizyon i *joint decisions*. E si nou Sesel, nou decide kas sa e ale al fer keksoz, al lapes banbara san permisyon Moris, nou pe, nou pe kas en Trete Enternasyonal, e Moris i kapab *challenge* nou devan en Lakour enternasyonal.

Donk, ler nou sinyen, *we are bound to accept the fact that* tou aktivite i *jointly managed and jointly decided*, ok? Napa okenn diskresyon pou fer okenn keksoz *unilaterally*, ok? Mersi.

MR SPEAKER

Mersi. Onorab Uranie?

HON ROCKY URANIE

Mersi Mr Speaker. Bonn apre midi delegasyon, e tou koleg Onorab. Mon kestyon in ganny *partly answered*. Me selman mon parey mon dir, dan maryaz i annan divors. So, ki mon pe gete mwan, ki kantite konpromi nou bezwen konpromi?

Par egzanp, ou'n dir la ki si i pa ti dakor, zanmen nou ti pou kapab fer zot tir sa bann *sample*. Be konmsi, si nou vremen nou vwar poudir, be ok, nou dan en sityasyon ekonomik, problemm kot nou vwar poudir serten keksoz i bezwen ed nou, nou bezwen fer. Ki nou fer, ki mannyer, kote sa Lalwa i antre ki obliz Moris pou dir, be gete ou bezwen larg nou lanmen la?

Oubyen si ariv en sanzman laba Moris kot i annan, mon pa konnen mwan, problemm politik, eleksyon, sanzman sepa ki arive, apre bannla i dir non, nou pe al anmar Sesel la nou, ou konpran mon, i annan serten dezakor? Kote, kwa ki nou konpromi ladan? Mersi.

MR SPEAKER

PS?

AMBASSADOR KENNETH RACOMBO

Mersi Onorab. Mon pou sey reponn ou par ilistre en legzanp en. Ler Minis in fer son prezantasyon, in dir ou koumsa i annan 3 *level*, en. Lo *Joint Commission* i annan son *technical committee*, epi i annan kot zis bann *commissioners* i *meet*.

In arive plizyer fwa kot *at the technical level*, zot pa *agree* lo en desizyon, so sa aktivite pa *move forward*. Me selman *most of the time* in ganny *resolved at the commissioners' level*, ki i en *level* pli o. *Now let's say* i annan en blokaz *at the commissioners' level*. I *always* mon *believe* ki keksoz i kapab ganny *resolved through* diplomasi.

I annan en lot *level* ankor. I *the ministerial segment*. Si i annan en blokaz, i annan en aktivite ki *very* stratezik pou Sesel, e Moris pa dakor, *then* nou kapab *call* li in sa *Ministerial Meeting*, zot a diskite. *And* zot *main agenda* i a diskite sa aktivite *and* pran en desizyon lo la. Mersi.

MR SPEAKER

Mersi PS. Onorab Henrie?

HON GERVAIS HENRIE

Mersi Mr Speaker. Bonn apre midi tou dimoun. Dabor Mr

Speaker, *Designated Minister* in dir zot in vin isi avek lentansyon pou vwar si Lasanble Nasyonal pou siport en *venture* parey. Mon pa krwar poudir ou pa pou gannyen sa sipor.

Anfet nou bann Manm Lasanble ozordi nou dwatet santi nou privilezye, aköz nou pe form parti en levennman istorik dan lemonn kot premye fwa sa i arive. E lefet ki Lalwa i bezwen ganny *domesticated* pou kapab byen *manage* sa *area*. *This is historical and I am personally very proud to be part of this process*.

E an dizan sa, zisteman mon ti ava kontan remerisi e felisit tou dimoun ki'n enplike dan sa demars depi 2012. E sa ki mon kontan mon'n vwar bokou bann zenn dimoun. Anbasader Racombo parmi. Wi, sa msye ki la.

I annan sa msye ki ansarz GIS la - *Coeur de Lion*. Bokou dimoun. E alor felisitasyon. *Keep up the good work* e nou, nou pou siport kot nou kapab avek konprenezon ki nou, nou annan. *It's also a learning curve* pou nou.

E dan menm laliny. Aköz zot in mansyonnen difikilte ki nou pe gannyen avek *La Tanzanie*. E i annan en parol ki Anbasader Koonjul, si mon'n byen dir son non, ti dir an 2019.

Ki sa prose i pa fasil li. Akoz ou bezwen *go back and forth* pou nou kapab...

E kekwfa nou avek Moris, nou koz menm langaz. Nou 2 kouzen. Nou kreol, nou zil ser. I bokou pli fasil. *La Tanzanie* zot sorti lo en kontinan e zot get bann zil avek en pe mefyan, parfwa dan Lafrik. Be selman servi Lasanble en pe. Akoz Lasanble nou zwenn zot dan *PAP*, dan *SADC*, dan *CPA*.

Ki mannyer nou kapab ed zot pou koz ek nou bann konfrer Tannzanyen, pou ed zot kapab konvenk zot Parlman e zot Gouvernman, pou nou annan... Si nou'n fer enn, prezan ant 2 pei Afriken. *Well*, Moris osi pei Afriken.

Me selman pou nou kontinyen sa prosesis pou ki lemonn i vin en meyer landrwa kot nou kapab annan sa? *So*, sa 2 pwen ki mon ti anvi fer.

Vitman Mr Speaker, 3 pti kestyon ki mon swete mon pa pe tro al dan detay *Bill*. Be solman mon anvi konn, enn *Ministerial Council*. Letan i dir pou annan *equal number of Ministers*, lekel bann Minister ki nou pe mazin asiz lo sa *Council*? Lekonomi Ble? Lekel sa bann Minister, bann *portfolio* ki pou asiz? Sa i premye.

Dezyenm, *Designated Authority*, kote nou anvi sa

Designated Authority i baze? Sertennman mon ti ava kontan i Sesel, akoz i annan en retonm ekonomik. I Sesel, so, *ok*.

E trwazyenman, letan mon vwar bann aktivite ki pe deza fer dan sa rezyon. Mazorite i fer par bann *third parties*. Ki pa Morisyen neserman e ki pa Seselwa. Akoz vremen kekwfa nou napa kapasite. Be *is this the model that we want to continue with* e ki alor nou zis ganny larzan *license, royalties*?

Ki kalite resours ki kapab ganny mobilize ant sa 2 zil ki nou menm nou kapab fer serten travay. Sirtou a lavenir avek evolisyon dan teknolozi, lasyans, ki nou menm nou, *we are the main players*. Mersi.

MR SPEAKER

Wi, Minis?

DESIGNATED MINISTER JEAN-FRANCOIS FERRARI

Yeah, mersi Mr Speaker. Mr Speaker, mon a reponn enn de bann bout. Ou premye pwen lo negosyasyon avek *Tanzanie*. Mon fek demann *PS* pou anvoy ou en *briefing note* lo sityasyon nou negosyasyon avek *Tanzanie*.

Anvoy, pa ou. Anvoy Lasanble Nasyonal en *briefing note* konmsi pou eksplike kot nou ete, e kot nou krwar

sityasyon pe bloke. E si zot kapab ede i ava enportan.

Lo kestyon resers ek leksplwatasyon. I vre Onorab ki pandan plizyer lannen ankor nou pou napa kapasite pou nou al fer resers lo sirfas, *on the seabed* e dan lanmer an zeneral. Donk nou pou siny bann Lagreman resers.

E sa i bout ki pli fasil aköz ou *allocate* en *block*, ou sarz par kilomet kare, ou ganny ou larzan. Parey ou pe fer resers ver petrol oubyen *gas*, ou partaz an de, Moris i ganny lanmwatye, Sesel i ganny lanmwatye. *That's the easiest part.*

Lo leksplwatasyon, i en lot kalite. I pli konplike aköz partaz bann resours i konmans vin pli teknik, alors... Be i annan bann pei ki annan leksperyans ladan e ki pare. E ki nou, nou pare pou nou demann zot, zot sipor.

Bann pei parey *La Norvège*. Bann pli pti pe dan lemonn ki'n fer sa bann Lagreman leksplwatasyon, ki anmenn benefis pou bann pti pei plito ki pou bann gro *corporations* dan lemonn.

Donk lo sa nivo la, mon pa enkyet. Me selman ou annan rezon pou dir ki si keksoz i marse, e nou komans fer resers, nou pou vwar bann konpanyen etranze ki annan

kapasite pou fer sa bann resers vini o depar. I pa pou bann pti dimoun.

Parkont nou, sa ki nou pe sey fer lo en pti nivo pou nou, pou nou reste dan filozofi devlopman ki Sesel in swazir. Par egzanp ler nou pou al fer resers lo banbara, nou pou servi nou bann peser banbara avek zot bato, pou zot al ver ed nou fer en pe resers zot osi.

Aköz zot ki bann spesyalis e zot...Nou anvi konmsi ki dan sa prosesis, nou bann dimoun, nou bann teknisyen, nou bann spesyalis i benefisyè.

Donk, a tou nivo i annan sa bann posibilite. Nou ganny en pe larzan avek *Global Environment Facility*. Nou pey en pe nou bann peser, nou bann plonzer. Nou lwe zot bato e tou dimoun i benefisyè en pe dan sa prosesis. Donk sa i mon 2 repons ki mon ti anvi donn ou. Ou ti annan en trwazyenm kestyon mon krwar?

MR SPEAKER

PS, i le azoute, wi?

AMBASSADOR KENNETH RACOMBO

Onorab, *Designated Authority* i deza Providence. I en biro ki annan, ki byen ekipe, i annan bann *latest* lekipman ladan. Me parey ou'n dir, *capacity building*

pou Seselwa *is a must*. I en priyorite. Me selman nou ti kapab mobiliz \$2.2milyon pou siport, *part of it* ti siport *capacity building* pou Seselwa ek Morisyen. *Recently* nou'n fer *training Maxam, bathymetry study, GIS*. So nou deza annan *a number of* Seselwa ki'n ganny bann *training*. Me *unfortunately* zot tou zot deza sitye dan en lot Minister, oubyen en lot departman. Me selman *in my view it is a step in the right direction*. Mersi.

MR SPEAKER

Mersi PS. Onorab William?

HON WAVEN WILLIAM

Mersi Mr Speaker. Bonn apre midi *Designated* Minis avek ou delegasyon. Mon annan en pti *query DM*. Mon pe regarde. Par lefe ki sa i en *joint venture*, definitivman mon pou dir Lasanble pa pou kapab pa siport sa, akoz i dan lentere.

Me mon anvi demann avek ou par lefe ki ou'n dir ki Moris i proaktiv. Vreman proaktiv. Eski Moris in fini *domesticate* Lalwa? E par sa pwen ki Onorab Georges in leve. Eski i pa fer plis sans ki sa 2 parti, zot annan en Lalwa ki apepre menm parey vizavi domestikasyon?

Akoz sa pwen ki'n leve, ki fer se ki si nou pa pe kominik

ek kanmarad pou annan en set Lalwa ki preski parey akoz i en *joint management*; *then* nou pa pe vwar nou pli tar pou annan plis problem obzeksyon isi laba? Si sa 2 parti pa kapab tonm dakor pou dir, be regarde, vi ki i en *joint venture*, annou tonm dakor lo en pwen komen lo vizavi sa Lalwa ki nou anvi enplimante? Mersi.

MR SPEAKER

Mersi Onorab. Minis?

DESIGNATED MINISTER
JEAN-FRANCOIS FERRARI

Onorab, sa bann Trete avek sa bann *Code*, normalman i pou bezwen parey. I pou bezwen parey akoz i *co-management*. E enn pa pou kapab vini pou vin fer lot keksoz ki lot pa dakor avek. Donk i pou bezwen parey.

Diferans se son *process*. Moris pa ankor *domesticate* sa Lalwa. Li osi i dan en faz diskisyon, negosyasyon pou gete si- Me son *process of domestication* i diferan avek pou nou. I annan plizyer keksoz ki pa al devan Lasanble. Donk, *in fact* mon krwar, mon krwar sa enn i pa ni al devan Lasanble, i zis ganny sinyen par Premye Minis. Donk i bokou pli fasil pou zot.

Me selman mwan mon ti a kontan dir zot, pa bezwen ezite.

Sa *process* in pran plizyer lannen. Si bezwen pran ankor detrw mwan oubyen ankor en pe letan, annou pran. Akoz i enportan ki parey zot menm zot, zot in dir ki *we get it right*.

Akoz nou pa pou kapab. Mon mon'n deza en parlmanter e mon pa anvi vin devan zot, e demann zot pou *rubber stamp* en keksoz ki zot pa dakor avek, ki en lot dimoun in prodwi. Mwan, mon pa ti pou fer li, so-Kekfwa zot...Reste *calm*, reste *calm*.

(laughter)

(Interruption)

MR SPEAKER

Ok, bon.

**DESIGNATED MINISTER
JEAN-FRANCOIS FERRARI**

Ou dezyenm kestyon Onorab, ti? Ok, so i annan en bout ki mon'n manke. Mon pa rapel. Mersi Mr Speaker.

MR SPEAKER

Onorab William, eski i annan keksoz esansyel ki ou'n demande ki ou santi Minis pa'n reponn ki ou le rebran?

HON WAVEN WILLIAM

Yes, Mr Chairman. Ki arive se ki, Minis mon konpran ou tre

byen mwan. Me par lefe ki ozordi Sesel pe fer li, e prezan lot parti li pa ankor fer li. Zis mwan mon anvi konnen poudir ki demen bomaten dizon nou, nou pas sa Lalwa.

E parey mon dir se ki sa pwen ki Onorab Georges in leve i vremen valab en kantite. Me pa ti a byen si lo kote Moris osi, menm si in pas *the Treaty* sepa Premye Minis i sinyen. Si nou ti kapab annan sa travay ansanm pou fer sir ki keksoz i *flow*? Mersi.

MR SPEAKER

Panel, Minis, oubyen *PS*?

**DESIGNATED MINISTER
JEAN-FRANCOIS FERRARI**

Wi, Mr Speaker, mon le zis reponn. Prezan mon mazine ki kestyon ou ti demann...Bann Minis ki pou, lekel bann Minis ki pou...Konbyen? Lekel ki ti demann sa kestyon? Onorab Henrie, wi. Mon krwar Onorab, ti reponn non? Bann Minis ki pou asiz lo...Pa'n reponn?

An prensip dan nou refleksyon i ti, i ti, i pa devret. Parey ou vwar, mon anvi en striktir ki pa tro lour. Me normalman i en Minis teknik e en Minis diplomatik. Donk normalman i Minis Zafer Etranzer avek sa Minis ki

annan *portfolio responsibility* ki fer bann travay teknik.

E Minis Zafer Etranzer li i debloke kot i annan bann problem, bann problem politik, bann problem, bann *issues* diplomatik, e li i ede pou rezourd sa. Donk, sa i en pe nide deryer sa *Ministerial Council*.

MR SPEAKER

PS?

AMBASSADOR KENNETH RACOMBO

Mersi Mr Speaker. Pou reponn kestyon Onorab William. An Fevriye, le 2 *heads of* sa 2 *commissioners*. Nou ti annan en Lagreman minite, sinyen, ki la nou pou al *initiate the process* pou nou konsilte nou bann manm Parlman. E nou pou *report at the next meeting* ki pou fer *in July*.

So, Moris zot osi zot pe fer parey nou. Nou ti *agree the process* pou fer *simultaneously*. Osi pou ou lenformasyon, lo kote Moris ti ganny sinyen *by the Secretary to the Cabinet*. Mersi.

MR SPEAKER

Mersi. Onorab Cosgrow?

HON WALLACE COSGROW

Mersi Mr Speaker. Mr Speaker, mon kestyon i en pe dan laliny kestyon Onorab Uranie. Petet si zot kapab eksplik mwan. Dan en ka kot tou lede parti petet pa agree lo diferan *request* en parti, *hmm?*

Eski i annan okenn mekanizm legal ki en parti i kapab fors en lot pou fer, pou *allow* serten keksoz arive? Ler mon dir mekanizm legal. Petet a en Lakour Enternasyonal or en Lakour Abritasyon. Akoz ki mon pe gete; par egzanp letan sa ti ganny sinyen, sa Trete, en? Petet nou ti annan serten. Serten nide *of* serten keksoz i ganny fer.

Ozordi par egzanp Mr Speaker. Moris, mon pe get lo, lo...(En pti moman, mon soz in al lo-) *Lo Deep Sea Conservation Coalition*, mon pe *get Ocean Mining Intel*, Moris i annan lentansyon diferan avek nou. E demen bomaten dizon Moris li i anvi fer *deep sea mining*, akoz in montre son lentansyon e i anvi al laba - e Minis li in dir li i kont *deep sea mining*.

E nou, nou blok Moris, i pa kapab bouze li, en. I pa kapab bouze. Demen bomaten, nou, nou anvi fer serten konservasyon par egzanp, e Moris i blok nou i dir nou. Konmsi ki arive ler i annan en *deadlock* ozordi? Konmsi ki

arrive e ki manner nou pou benefisye *going forward*? Mersi.

MR SPEAKER

Mersi. Yes, Minis?

DESIGNATED MINISTER
JEAN-FRANCOIS FERRARI

Mr Speaker. Mon pa konnen si sa lekspresyon nou kondannen pou nou reisi, i en bon lekspresyon. Me selman mon repons pou Onorab se ki nou'n antre dan en lagreman ki fors nou rod en solisyon. E si nou pa ganny en solisyon, nou esper lot proze vin lo latab ann esperan ki en zour nou ava ganny en solisyon.

Mon krwar napa *dispute resolution mechanism* dan sa Lalwa aköz, i pou tou an permanans en negosyasyon. I pou an permanans. E mwan mon dir ki menm ler ou negosye avek en dimoun ki en pe pli for ki pou, si ou annan en sans en zour pou ou ganny en *outcome* ki dan ou faver, ou *still* negosye.

Donk mwan mon. Nou an tou ka kote isi nou pran li dan en fason pozitiv pou nou dir, lemonn i permet nou, in... *Well*, lemonn in rekonnèt nou ki nou'n vin ansanm dan en *co-management*. E lemonn in dir nou prezan travay ansanm *and get things done*.

Donk, i en kondannasyon ki nou pou bezwen travay e nou pou bezwen reisi ansanm. Donk mon pa vwar - mon pa pe vwar en *outcome* negatif dan sa travay ki nou pe fer. Mersi.

MR SPEAKER

Mersi Minis. Onorab John Hoareau?

HON JOHN HOAREAU

Mr Speaker, mon pa tro konnen si sa kestyon i pou ganny aksepte. Me selman mon a sey demande an tout fason. Dan ka kot i annan en polisyon lo *open sea*. Aköz sa *area* i annan *open sea* anler. E sa polisyon i fer en *damage* ki enreparab lo sa *seabed*, ki nou avek Moris nou annan ziridiksyon lo la.

Ki fason sa bann *dispute* koumsa i ganny realize, konmsi i ganny *sort out*? Eski i ganny fer atraver, (mon pa konnen mwan) en *Court* enternasyonal. Oubyen eski sa *Designated Authority* ki pou kapab fer keksoz? Mersi.

MR SPEAKER

Thank you. Panel? Kestyon difisil?

DESIGNATED MINISTER
JEAN-FRANCOIS FERRARI

I pe vin en pe pli konplike Mr Speaker. Parey nou'n dir, sa ki

pase lo sirfas i pa nou – li pa nou. I kapab arive nenport ler. E si i en *third party*, nou pa, napa naryen ki nou kapab fer.

If it's a second party. Si swa Moris ouswa Sesel ki dan pe rod banbara, oubyen dan pe rod sa, in al *pollute* landrwa. Sa i en kestyon valab ki mon krwar i merit ganny reponn. Me mon napa en repons pour le moman.

Donk, si i en konsern. Si i en konsern ki devret ganny regle la, avan, e ki devret dan sa dokiman. *Then it's up to you.* Se zot bann lezislater ki pou bezwen *thrash out* sa enn la. Pa mwan. *Sorry.*

MR SPEAKER

Mersi. Mersi Minis. A se pwen mon anv demande. Mon annan 3 Manm ki reste lo lalis. E mon sipoze le 2 *Leaders* pou rebran laparol. Eski i annan lezot Manm ki pou annan kestyon, akoz mon bezwen regarde si nou pou pran en *break* la. Oubyen zot...*Ok*, be nou a pran en *break* e nou a rebran 4er edmi.

(BREAK)

MR SPEAKER

Mon krwar nou ti'n ariv lo. Ti'n aret lo Onorab John Hoareau. Onorab Monthy *is next* pou ou kestyon?

HON PHILIP MONTHY

Mersi Mr Speaker. Bonn apre midi Minis ek ou delegasyon. Zis en pti kestyon an pasan pour *panel*. Ou konnen ki Sesel i form parti *COI* ansanm avek 4 lezot *état membre*. E parmi zot manda. Parmi manda *COI* se pou zer, ki i annan en zesyon entegre leko sistenm maren. Lapes soutenab i enn osi, e sekirite maritim parmi lezot.

E la ki nou vwar i annan en Lagreman Bilateral ant Sesel ek Moris. Ant 2 *état membre*, separe. Eski sa pa pou kree en divizyon *au sein* Komisyon Losean Endyen *COI*? Mon ti a kontan zot reaksyon lo la. Mersi.

MR SPEAKER

Mersi Onorab. Wi, Minis?

DESIGNATED MINISTER JEAN-FRANCOIS FERRARI

Mersi Onorab. Non Onorab, mon krwar sa pa pou arive. Sesel ek Moris i reste 2 manm Fondater Komisyon Losean Endyen. E dan sa travay ki nou pou fer lo *Joint Management Area*, nou pou probableman osi envit Komisyon Losean Endyen pou *partner* avek nou dan bann resers, dan bann finansman.

I pa vdir ki si nou annan en Lagreman Bilateral, nou

bann obligasyon rezyonal i sanze. Non, non. O kontrèr i fer li pli for mon krwar mwan. Mersi.

MR SPEAKER

Onorab Esparon?

HON REGINA ESPARON

Mersi Mr Chairman. Mr Chairman, mon ti ava zis kontan Minis i donn nou en leklersisman. In dir poudir Sesel ti siny sa Trete 2012. Kwa ki'n anpese ki Sesel in *domesticate* sa tou sa letan? La i fer preski 11an.

E dan ka parey in dir nou poudir Moris osi pa ankor *domesticate* sa Trete, dan ka kot Moris pa pase avek sa Trete, ki pou arive? Eski ziridiksyon sa *plateau* pou tonm antyerman anba- eski *management* sa *plateau* pou tonm antyerman anba ziridiksyon Sesel? Mersi.

MR SPEAKER

Mersi. Minis?

**DESIGNATED MINISTER
JEAN-FRANCOIS FERRARI**

Mersi Mr Speaker. Mersi Onorab. Onorab, si nou pa kapab konklir en lakor e siny sa lakor, sa proze antye i *collapse*. E nou pou bezwen al antre dan en sityasyon kot Sesel pe al *claim*, Moris pe *counterclaim*.

Oubyen si Moris pe *claim*, Sesel pe al *counterclaim*. Mon pa vwar li pe arive.

E donk, parey mon'n dir pli boner, mon santi poudir nou kondannen pou reisir. Nou bezwen reisir. E i en kestyon nou repitasyon o nivo enternasyonal. E enn bann kestyon ki ou'n demande pli boner sete aköz in pran sitan letan pou nou depi 2007 ziska le ozordi nou 2023?

Aköz zisteman, ler ou sey, ler ou sey rod en konsansis, i souvan pran plis letan ki ler ou enpoz ou lekor atraver en Lalwa. Donk tou bann keksoz ti ganny met lo latav e in ganny diskite enn par enn, enn par enn. E pou kontinyen ganny diskite enn par enn.

Donk, *it's all about negotiations. It's all about tonm dakor dan en co-management*. I pa egziste an deor. Sa *co-management* i pa pou egziste avek en manm. I bezwen sa 2 manm i ladan. Mersi.

MR SPEAKER

Onorab Loze?

HON JOHAN LOZE

Mersi Mr Speaker. Mr Speaker, mon ti zis anvi eklersi avek Anbasader. Si tou keksoz ki zot in sinyen i dan sa dokiman ki nou pe sipoze pe *domesticate*

ozordi, si tou in ganny rekonsilye ansanm? Tou bann *bits and pieces that is?*

E si i annan okenn keksoz ki kapab anmenn okenn lobligasyon finansyel ou Bidze? Akoz enn bann rezon mon pe lev sa.

Resaman Anbasader, mon vwar ou'n siny en lagreman avek Moris pou annan en patrol konzwent. En teritwar ki posed en sipersifi 400mil kilomet kare, si mon pa tronpe. So mon pe zis gete si tou keksoz i la, e i pe ganny *domesticate* ansanm, ouswa si i annan bann lezot *bits and pieces* an deor?

E an terminan Mr Speaker, mon zis anvi swet Minis Ferrari bonn fet koudeta ki i ti partisip aktivman ladan. Mersi.

MR SPEAKER

Onorab, mon pa konnen ki manner mon pou pran sa dernyen komanter. Mon vwar li i *out of order* pou ou anmenn sa size la dan sa deba. Selman fransman mon pa konnen ki mon pou dir ou plis ki sa. Me mon a reflexir lo la. Mersi.

Panel, zot annan en repons pou kestyon ki...? Tre byen. Bon, me pou sa dernyen komanter mon krwar ou merite, ou kestyon ganny inyore. Mersi.

(APPLAUSE)

MR SPEAKER

Mon a demann, mon a demann bann *Leaders* Lasanble...Mon a demann bann *Leaders* Lasanble si zot annan okenn pwen pou zot retourn lo la? Onorab Pillay?

HON SEBASTIEN PILLAY

Mersi Mr Speaker. Mr Speaker, devan mwan, mon pe regard sa 2 *S.I* ki nou ti fer ki ti etabli bann diferan pwen. E mon prezimen si zot kapab konfirman, sa bann pwen in reste parey, i pa'n sanze ziskan kot nou'n arive ozordi. I ankor parey.

Prezan kestyon ki mwan mon annan, en? Prenon kont ki inevitableman i pou annan serten eleman travay ki pou *involve* en brigad idrografik, si nou *end up* annan eksplorasyon laba anba. Kote pou baze sa biro Idrografik? Nou ti deza annan enn, be la nou napa enn ki *currently* pe marse.

So mon premye kestyon i eski *out of* travay ki nou pe fer ozordi, Gouvernman pe met an plas en brigad idrografik oubyen en Departman Idrografik. Si pou tonm anba Departman *Blue Economy*

oubyen pou tonm anba en lot departman?

Klarifye pou mwan si sa pou annan, akoz Moris i annan enn li ki pe fonksyonnen, e i annavans avek nou lo la. Savedir li i pou annan potansyel pou li regard bann keksoz ki vini an sa ki konsern eksplorasyon. Ki mon konsern ki petet nou ava napa, si li ki pe inisyé eksplorasyon lo son kote?

Dezyenm kestyon ki mon le ganny en klarifikasyon, dan prezantasyon nou'n koz lo *seabed* e sa ki ganny trouve lo *seabed*, e bann resours ki ganny trouve lo *seabed*. E pran nou'n koz lo, Lalwa i fer provizyon pou sa *joint management of* tousala. E nou'n kree sa Lotorite.

Mon pa konnen, ler mon pe analize. Eski konstitisyonnelman prezan, nou pou bezwen fer serten sanzman, ki pou fer ki an sa ki konsern Konstitisyon ler nou regard nou teritwar. Nou pou bezwen enkli sa *Plateau Mascarene*? Ki *currently* mon krwar pa si, i pa ganny defini *currently*. Nou enkli bann zil, nou enkli tou bann lezot keksoz nou pou enkli.

Be vi ki menm si i en *joint management*, lafason ki ou'n prezante i montre poudir nou

annan *part ownership* of sa landrwa. So eski sa pou, eski zot in konsider *whether* nou pou bezwen...

An sa ki konsern sa *continental shelf* mon pe koz lo la, eski i pou neserer annan en derogasyon dan Konstitisyon ki pou prevwar. Malgre ki nou pou napa ziridiksyon lo sa delo enternasyonal. Me anba lanmer vi ki nou annan serten ziridiksyon pou ki sa i ganny klarifye. E si sa pe vin avek ansanm avek sa, avek sa travay ki nou pe fer?

E mon dernyen kestyon Mr Speaker. Ler mon'n regarde, i paret pou dir bann dimoun ki savedir prezan pou form par sa Lotorite. Mon pa pe al dan Lalwa, mon pe regard sa Lotorite. Eski sa Lotorite pou annan en stati diplomatik dan nou pei, oubyen dan tou lede pei?

Akoz i prevwar ki si ou annan en Lotorite koumsa, i pou bezwen annan en serten derogasyon vizavi bann Lalwa nasyonal ki nou annan. Swa taksasyon, swa lezot fason.

Mon pa'n get *Treaty* an antye, me mon prezimen dan lezot landrwa kot in annan sa, mon'n vwar poudir in enkli. So, eski sa i pou leka dan konteks Lotorite ki pou *manage* sa *plateau*? Mersi Mr Speaker.

MR SPEAKER

Mersi Onorab. Minis?

**DESIGNATED MINISTER
JEAN-FRANCOIS FERRARI**

Wi, mon ava reponn 2 kestyon la. Enn sa enn dernyen Onorab. Tou bann lorganizasyon ki annan en konponan miltilateral. Oubyen bann lorganizasyon ki'n enskri dan en Trete Bilateral oubyen Miltilateral, zot annan en stati kazi diplomatik. Sa se enn bann keksoz ki zot pou bezwen deside zot, si devret ganny spesifye, oubyen si bezwen ganny agree par bann diferan parti, me selman lozikman se en keksoz ki pou bezwen ganny rezourd.

Lo kote ziridiksyon oubyen souvrennte lo sa *plateau*. I toultan reste koman en ziridiksyon. *It's the management. This is why* i ganny apele *the management - Joint Management Area*. I pou napa zanmen okenn souvrennte.

E Sesel pa pou kapab zanmen *claim li back* koman i annan en par ladan. I zis nou pe ganny otorize par Nasyon-z-Ini pou nou *manage* sa *area* e servi bann resours ki lo fon lanmer. Donk sa, sa 2 pwen. E Onorab ou ti annan en pwen? Non?

Wi, *hydrographical office*. Onorab pli boner ler mon'n dir ki Moris i annan kekfw a en pe lavans lo nou. Mon ti pe dir ki Moris i annan bokou plis kapasite ki nou. Par egzanp dan sa *Joint Management Area* ki enn bann zofisye *senior* ladan se Lanbasader *Koonjul*. I preski en departman antye dan Biro Premye Minis.

Donk zot annan en *full* konpleman travayer spesyalize ki pe fer sa travay. Zot kapab *respond* bokou pli vit ki nou. Tandis ki nou, nou ankor dan en pti Minister, en pti departman ki pe, ki pe met bann resours ansanm kot nou pe pran resours, kot later, *MLH*. Nou pe pran resours kot *AG's Office*. Nou pre pran resours kot Lakour. *Judge Robinson* i asiste nou.

Donk, nou napa en striktir permanan si oule. Nou annan bann striktir ki nou met ansanm pou fer bann travay spesifik. Donk se sa ki pe fer nou, ki met nou en pti pe an dezavantaz avek sa ki pe pase Moris. Me apard sa, menm nou brigad idrografik ki nou pa'n zanmen annan otan ki mon rapel. Me selman nou ti annan en idrograf atraver Komandan *Coast Guard*. Wi, Mr Rosette ki ti fer sa travay.

Donk, si nou get li dan sa perspektiv ki mon pe dir, nou annan tou pou benefisyé avèk lekspektiz ki annan Moris. E nou, nou pe profite pou nou zisteman benefisyé avèk sa ki zot, zot anmennen. Akoz zot anmenn en pe plis ki nou pour le moman. Mersi.

MR SPEAKER

Wi, Onorab Pillay?

HON SEBASTIEN PILLAY

Mersi Mr Speaker. Mr Speaker, mon oule adres sa dernyen pwen avan. Mon pou dir ek Minis ki annou admet ki ler sa *item* in vin lo *Order Paper*, nou tou nou'n bezwen fer en serten resers pou nou konpran egzaktman kwa ki nou pe angaz nou ladan.

Mon annan benefis ki mon ti dan Lasanble an 2012, ler sa Trete ti vini pou premye fwa. E *since then* mon'n ale mon'n regard, mon'n fer resers pou mon konnen ki Lasanble ti dir e ki bann desizyon ki'n ganny pran. Menm ou a plizyer repriz ou'n koz lo la dan Lasanble *subsequently*. Sirtou ler nou ti pe koz lo bann Bidze ki ti pe *allocate* avèk Departman *Blue Economy* pandan 6enm Lasanble.

Lo ou kestyon lo brigad hidrografik, mon bezwen dir ek

ou koumsa poudir petet rekonsider ou pozisyon e pran li koman bokou pli enportan ki petet ou kapab pe konsider li la. Akoz i lakle dan sa travay ki bezwen ganny fer an relasyon ek sa. Sesel i bezwen pare avèk sa.

Mon lot pwen, mon pou vin lo ou determinasyon letan nou'n koz lo ziridiksyon avèk bann drwa souverèn. Mon pe regard sa *S.I. 36*, ki si oule li ki ti etabli baz pou nou komans langazman pou sa Trete. E i servi 2 term. I servi *exercise of sovereign rights and joint management*. Me trwazyenm pwen i dir, Repiblik Sesel pou *exercise joint sovereign rights and joint jurisdiction in accordance with the provision of the treaties*.

So, se pou sa rezon ki mon dir be si i pe. *Joint jurisdiction means* i pe vin kazye en patrimwann Leta Sesel *partly managed* par *Mauritius*. E i ti ava enportan dan lenter nasyon pou nou pa zis kit li dan en Trete. Akoz sa i en depar *from '93*. Nou Konstitisyon ler ti ganny fer nou pa ti enkli; I pa ti enkli ladan.

Be la nou'n fer sa diskisyon. E byensir sa lot diskisyon ki *involve* kot nou pe ganny serten *claiming process* avèk *Tanzania*. Sa osi pou

redefini serten *boundary*. Petet sa osi en keksoz ki nou bezwen konsidere pou *internalise* li dan nou konstitisyon ki a tou moman *then* si i annan bann desizyon ki bezwen ganny pran lo la. I pa bann desizyon ki ganny pran par zis en Trete, me i ava en desizyon ki anmenn en diskisyon pli aprofondi par leta Sesel a sa moman. E i ava en dokiman ki dan Konstitisyon.

Akoz, ou a dakor ek mwan poudir si en dokiman, en eleman i reste zis dan en Trete. Sanz li baze lo pouwar legal ou bezwen mazorite. Be sanz en Konstitisyon i pa zis *straight forward* kantmenm ou annan mazorite. I pou toultan annan en deba lo la.

So petet mon ti a kontan ganny ou lopinyon si sa i en travay ki zot pou angaz lo la baze lo bann diskisyon ki ou'n donn nou, e potansyel resours ki kapab annan, ki a kapab vin en benefis pou nou lekonomi. Mersi Mr Speaker.

MR SPEAKER

Mersi. *PS* i le adrese?

PS AMBASSADOR KENNETH RACOMBO

Mersi Mr Speaker. Onorab, si mon'n konpran byen ou kestyon mon a sey entervenir. *Basically*, wi ou annan

sovereign rights, me selman nou napa *sovereignty*.

MR SPEAKER

P.S mon pa pe tann ou byen. Ou mikro i *on*?

MR SPEAKER

Arh, good.

AMBASSADOR KENNETH RACOMBO

So, basically Onorab, nou annan *sovereign rights* selman nou napa *sovereignty* lo *the extended continental shelf*. Me selman pou nou adres sa *challenge* ki ou'n dir pou *claim* li *as* nou teritwar *fully, it goes beyond* Lalwa Sesel sa. Akoz ler ou sot *the 200 nautical miles* ki ou pe sot ou *EEZ*, ou *bond* par bann lezot Lalwa *UNCLOS*.

Prezan kwa ki fer li vin en pe pli *challenging*? Akoz *recently* la i annan *another* Trete ki *involve more than 2* pei ki *the BBNJ Treaty*, ki *govern* bann landrwa ki pa pou okenn pei. So i pa sitan en prosedir *straight forward*. Me selman wi, i en keksoz ki kekfwa nou devret reflexir lo la ki mannyer nou fer *some sort of a firm more ownership* lo sa.

In fact, nou annan 2, en Onorab. Lo sa 2 *Extended Continental Shelf* ki nou'n fini

gannyen, ekskli sa enn ek Tanzania, ok. Thank you.

MR SPEAKER

Thank you. Onorab? Yes Minister? Go ahead.

DESIGNATED MINISTER
JEAN-FRANCOIS FERRARI

Ti annan en lot bout. Ti annan en lot bout dan ou kestyon Onorab? Sete...?

MR SPEAKER

Ale, wi.

HON SEBASTIEN PILLAY

Mersi Mr Speaker. Sa ki mon ti pe *follow up* lo la an premye lye sete, lafason ki nou, nou pou *log* nou *data* an sa ki konsern bann *data* idrografik ki nou pou gannyen.

As ki mon konpran la, Anbasader, avek tou ou leksperyans ou en teknisyen administratif. Ou pa neserman en eksper dan idrografi. E se pou sa rezon ki mon pe ensiste ki nou annan en fason pou nou fer li, Mr Speaker.

Akoz baze lo prezantasyon ki Minis in fer. E si mon'n ekout byen bann *statement* ki Prezidan Larepublik li menm in fer dan bann medya - mon pa pou al dan bann *statement* be

koman Sefdeta, i pe koz lo resours Leta Sesel.

E sa bann resours nou bezwen annan en fason. Akoz tou sa bann *data* i kapab ganny *challenged going forward*. E nou bezwen annan en Lotorite ki ganny *recognised* pou fer sa.

E sa Anbasader Morisyen ki Minis in nonmen i en dimoun ki tre renonmen *in terms of* enternasyonalman pou sa travay ki'n fer. I pa zis avek sa travay *joint management*, be i annan lezot travay ki in fer pou Moris an sa ki konsern *Marine Biodiversity and Conservation*.

So, nou osi nou bezwen Lotorite referans dan sa domenn. Nou pa kapab zis angaz nou, fer sa Trete *and then* nou napa sa *follow up*. Mersi.

MR SPEAKER

Mersi. Minis, wi?

DESIGNATED MINISTER
JEAN-FRANCOIS FERRARI

Wi. Mon dakor avek ou Onorab. E mon dakor osi avek ou ki nou bezwen donn gran lenportans idrografi e okenn striktir lokal ki pa kapab asir en pe travay dan sa domenn. Mon pa'n-Mon'n rekonnnet nou bann limitasyon ki nou annan. Me selman mon pa'n anvi – mon pa'n anvi donn lenpresyon ki mon pe, mon pe minimiz son

lenportans. I annan en gran lenportans.

E pour le moman nou pe fer en pe travay idrografik avek bann *visiting* - bann bato ki pe vizite; Bann Endyen. Bann lezot ki fer bann releve batimetrik, eksetera. Donk nou vreman konsyan ki nou bezwen, nou ti a kontan gannyen en pli bon striktir idrografik a lavenir. Mersi.

MR SPEAKER

Onorab Georges, eski ou ti annan pwèn ki ou ti le rebran?

HON BERNARD GEORGES

Mersi Mr Chair. En pti pwèn avek ou permisyon. Mr Speaker sa dokiman ki devan nou i en long dokiman. I annan 168 paz. Me paz 24 i paz kekfwa ki pli enteresan. Akoz i annan en *map* ki eksplik nou egzaktman kisisa ki nou pe fer.

E mon krwar mon ava, pou benefis bann dimoun ki kekfwa pe ekout nou dan lakour ki pa tro konbran sa ki nou pe fer, permet mwan rod konsey avek *panel* ki si sa ki mon pe dir i vre.

Rezon ki nou dan sa *Joint Management Area*, oubyen sa *Joint Management Agreement or arrangement* se akoz, nou *plateau* kontinantal ki sorti isi Mahe, i fer letour e i al fini anba

Moris. Annefe i enn gran *plateau* kontinantal e nou vwar li tre byen.

Nou problem. Anfen. Problem ki tou lede pei ti annan se ki anba *UNCLOS (United Nations Law of the Sea)*, tou lede ti kapab *claim* en morso sa *plateau* kontinantal. E parey Minis in dir taler, ti pou annan en *to and fro* lekel ki devret gannyen, lekel ki pa devret gannyen. E kote laliny demarkasyon ti pou pase.

E donk sa 2 pei i trouv li dan zot lentere. Olye annan sa proses kontrovers; enn i a gannyen, lot a perdi. Oubyen tou lede pou gannyen e nou pa pou konnen kote laliny pou pase. Zot in deside pour sa bout ki tonm an deor. Akoz sa morso *plateau* kontinantal i tonm an deor *EEZ* sa 2 pei. Antre anba en *joint management* pou benefis tou lede kote. So i en *win-win*.

E mon krwar se pou sa rezon ki bann ladministrasyon presedan e ladministrasyon aktyel, in deside ki anver e kontre tou, sa se meyer solisyon. Meyer solisyon se pa antre dan en dispit si nou kapab *share the bounty*, nou ava *share the bounty*.

Mon pa tro - mon napa tro problem personnelman avek si nou, nou pa pe fer otan ki

Moris, e Moris pe fer en pe plis eksetera. Akoz *at the end of the day*, tou bann resours bezwen ganny *shared equally*. So, *at the end of the day* i zis en kestyon *pride*, me pa plis ki sa.

Nou... Dezyenm keksoz ki mon ti a kontan ki nou konpran, se ki sa *Joint Management Area* i pa komans lwen avek nou. I komans zis la anba *Coëtivy* li. I pa lwen. E sa se akoz, Moris son *EEZ* i mont o akoz *Agaléga* ki parey tou dimoun dan sa Lasanble i konnen. Mon krwar Sesel ti devret revandike me sa set en lot deba.

E se pour se la ki Moris i ariv o bor nou isi anler, e nou'n bezwen fer en laliny medyann. En *median line* ant *Coëtivy* avek *Agaléga* pou *split* nou *EEZ*. E nou problem se egzaktman sa. Se Moris apart *La Reunion* o bor li kot i bezwen fer en *median line*, tou larestan losean i kapab *claim*.

Alor ki nou, ler nou ariv *Farquhar* nou bezwen fer en laliny medyann ant Sesel avek *Madagascar*. Ler nou ariv *Aldabra* nou bezwen fer en laliny medyann ant nou avek *Comores*, ant nou avek *La Tanzanie* eksetera. Alor, nou en pti pe kwense dan sa sirkonstans akoz nou pozisyon.

Alor ki Moris zot kapab *claim* en bon pe plis.

Pou sa bann rezon, Mr Chair, mon krwar ki bann lespri ki negosye sa *Joint Management Area*. E nou tou nou'n lir sa bann Trete ki nou pe *domesticate* ozordi, ti en bann gran lespri. E mon krwar ki Sesel pa'n mal fer, Sesel pa'n mal debourye. E malgre nou kontrent an term nou siperfisi zeografik, vizavi sa ki pou Moris.

Malgre sa *plateau* kontinantal ki bokou pli gran ki Moris ti a kapab *claim* vizavi sa ki nou, nou ti pou kapab *claim*. Lefet ki nou'n arive annan en prosedir ki nou kapab partaze, i dan lentere Sesel, e mon krwar ki nou devret satisfè avek sa travay ki nou'n kapab fer.

Prezan Minis, i ava nou devwar dan sa Lasanble pou *take you across the line* atraver sa *Bill*, ki ozordi ou demen dan en dat fitir, nou pou aprouve pou *domesticate* sa laranzman e pou donn li lafors legal. Mersi Mr Chair.

MR SPEAKER

Mersi. Mon pa konnen si Minis i annan okenn komanter spesifik. Oubyen si ou ti a kontan zis *sum-up* pou termin ou prezantasyon. Ou annan sa dernyen parol.

DESIGNATED MINISTER
JEAN-FRANCOIS FERRARI

Wi, mersi Mr Speaker. Zis selman mon ti a kontan *sum-up* Mr Speaker. Premyerman mon a konmans par dir ki mon apresye ki Lasanble ann antye in regard sa propozisyon dan en fason pozitiv, e i vwar li koman en pa ann avan pou Sesel. E ki Sesel sertenman pou benefisye si nou kapab *domesticate* sa bann Lalwa.

E si nou tou nou trouv bann mo ki neseler pou nou fer sir ki nou souvrennte, nou bann responsabilite i ganny... E nou bann drwa i ganny sofgarde. Donk i en travay ki'n komanse par en administrasyon *autre* ki sa enn la, e ki ganny terminen par en administrasyon ki...

Onorab. Wi. E Onorab i dir mwan nou pou koup riban. Nou pa pou koup riban me selman nou pou kontinyen. Akoz toultan sa ki nou dir se ki sa ki bon pou Sesel, nou pran li e nou kontinyen nou fer li abouti.

Donk, mwan mon ti avamon ti ava vreman lans en lapel avek Lasanble an zeneral pou nou annan en vot inanim lo sa *Bill* ler i ariv devan Lasanble. Nou ava kontinyen nou lo nou,

lo kote Departman Lekonomi Ble.

E lo kote *staff Joint Management Area* ki dan nou departman. Nou ava kontinyen asiste zot avek tou bann lenformasyon ki neseler, ki zot ti a kontan gannyen pou zot kapab fer en desizyon byen formen.

Donk mersi bokou Mr Speaker pou donn nou posibilite, pou nou vin prezant sa travay avek tou son bann difikilte, tou son bann *challenge*. Mon krwar i vo lapenn. E i fer nou bokou pli gran. I fer nou dan Losean Endyen vin A dan lemonn; vin bann *partner* rezonnab e respektab ki ou kapab fye lo la. Ou pa bezwen mefyan Sesel. *Ok*.

Mefyans i pa en mo dan nou vokabiler. Donk mersi bokou tou bann Manm. E mon swete ki mon ava revin devan zot o manman kot zot ti ava pran sa desizyon final pou vot sa Lalwa. Mersi bokou.

MR SPEAKER

Mersi Minis. Mersi bann Manm pou zot partisipasyon. Minis ek ou delegasyon, mon swet ou bonn kontinyasyon lo sa travay. E byensir bann Manm a ganny loportinite pou retourn lo sa size ler nou pran *Bill* ki'n pe

ganny prepare. Mon a dir zot mersi.

Mon a dir bann delegasyon bon depar. Mon demann Manm Lasanble pou reste an plas silvouple pou en lot *item*. Mon a swet zot orevwar.

**(THE DESIGNATED
MINISTER AND HIS
DELEGATION WERE
EXCUSED FROM THE HOUSE)**

MR SPEAKER

Mersi, nou a retourn dan Staz Lasanble. Onorab Flory Larue in demann mwan laparol pou en *matter of privilege*, e mon pou akord li la a se moman. Onorab Larue?

HON FLORY LARUE

Mersi Mr Speaker. Mr Speaker, anliny avek gidans ki ou'n deza donnen dan lepase, mon ti a kontan anmenn en *matter of privilege* anba *Order 40*, pou bann *posting* ki Manm i fer lo *Facebook*.

Mr Speaker, nou pou kapab mazine ki zis semenn pase Onorab Cosgrow ti anmenn en *matter of privilege* dan menm laliny kot i ti koz lo en *posting* ki ti'n ganny fer lo *Facebook*. E i ti menm lir sa *posting* pou nou.

Mr Speaker, mon ti a kontan anmenn a ou latansyon ki ti annan en *post* ki ti ganny mete par...Mon napa en *choix*, mon bezwen apel li Onorab - Onorab Johan Loze. Kot mon santi in afekte privez Lasanble, e mon privez koman en Manm, letan i denigre Vis-Prezidan lo en *post* an piblik.

Kot i servi bann langaz ki mon pa ni menm kapab lir Mr Speaker, lo sa *post*. E i servi sa *platform* pou li eksprim son lekor. Koman en Manm Onorab, i reflekte sa standar ki nou pe mete pou nou Lasanble. Mwan, mon pa dakor ditou Mr Speaker, pou ganny reflekte dan sa fason. Nou menm vwar la detrwa minit pase ki mannyer in adres Minis Ferrari.

Mr Speaker, mon...Dan sa *post*, *even* menm mank respe pou ou, pou ou lofis e ou Sez kot i dir ki dimoun i devret *screenshot* sa, anvoy pou ou, e ou, ou a gete si ou kapab vin koriz li. Akoz li i en zonm, e depi ler son papa in mor, napa personn ki kapab dir li ki pou fer dan son fason *behave*.

Mr Speaker koman en Manm, i mank total respe pou nou Lasanble! I annan en *limit* lo ki kalite *post*. Me sa bann kalite *wording* koman en Manm Lasanble Nasyonal Sesel i pa reflekte ditou lo ki kalite

Lasanble ki nou, nou ti a kontan annan Mr Speaker.

Sa *post* i sal. I plen ek lensilt, i degoutan anver Vis-Prezidan. E mon santi ki mon privez in ganny afekte Mr Speaker, e mon ti a kontan demann ou *ruling* anba 40(4). Mersi.

MR SPEAKER

Mersi Onorab. Manm i a rapel ki mon'n adres sa size avan. E mon'n adres li an relasyon avek Onorab Loze, lo size sa ki i mete lo bann zofisye Gouvernman. E lezot Manm in adres menm size. Mon krwar pwen in ganny fer ase souvan.

Donk mon krwar poudir a se moman, nou bezwen pran sa size serye. E mon dakor avek Onorab, pwen ki Onorab Larue in mete, ki limaz Lasanble e privez Manm in ganny afekte.

Alor mon pou donn otorizasyon Onorab Larue anba *Order* 40(5) ki dir...40 (4) i dir; *The Speaker shall then state whether the matter may or may not affect the privileges of the Assembly.* E mon dir wi, i afekte privez Lasanble.

E 40(5); *A member May then move a motion relating to that matter of privilege which shall take precedence of other business.* Donk, mon pou aksepte en Mosyon Onorab

Larue, e nou pou pran sa Mosyon demen bomaten. Mon permet Manm ganny loportinite.

Onorab Larue, mon pou demande ki sa, sa *post* i ganny donn avek Madanm Clerk, e ki Madanm Clerk i sirkil sa *post*. Menm ki mon pa anvi fer repandi lo sa *post*, be mon krwar i neser ki bann Manm i konnen kisisa ki nou pe koz lo la.

Ou pe ekout mon *ruling*? Mersi. *Ok.* So, mon pou donn...Mon pou donn Onorab Larue otorizasyon pou anmenn sa Mosyon demen. *Ok?* Normalman Onorab Pillay, mon ti pou termin la. Me selman akoz sa i en *matter* ki mon konnen i sansib, mon pou les ou met ou *point of order* si ou le. Wi. Met ou *point of order*. Met ou *point of order* Onorab! Ale.

HON SEBASTIEN PILLAY

Mersi. Mersi Mr Speaker. Mr Speaker, mon bezwen eksprim mon konsern lo la fason ki Lalwa Lasanble i ganny enterprete. Ler nou, nou *raise* en *matter of privilege* kot en Manm *senior* - pa nenport ki Manm. En Manm *senior* dan Lotorite Lasanble, i apel lezot Manm Lasanble '*simple*', savedir poudir nou...

(Mr Speaker, Onorab Larue in koze. Mon kapab koze silvouple?)

MR SPEAKER

Onorab, fini ou pwen. Silvouple.

HON SEBASTIEN PILLAY

Ou vire, ou pa donn okenn *ruling*. Ou pa...Zis ou fer ou *statement* e ou *blatantly cast it aside*. *What is* - pou mwan ki mon vwar poudir *a well-orchestrated* keksoz ki'n arive. Akoz en *matter of privilege is dealt with* apre *Question Time*. Apre *Question Time*.

Ou ti fer mon fer sa, e i on *record* Lasanble Nasyonal annakor avek *Order 25* kot en *matter of privilege* i ganny *dealt with*.

MR SPEAKER

Ok.

HON SEBASTIEN PILLAY

Ou'n *allow* tou biznes Lasanble pou fini, e pou les Onorab Larue pou fer sa. *Be that as it may*, ou'n fini donn ou *ruling*. Mon pa kapab kestyonn ou *ruling*. Napa problem. Me la mon le met en keksoz devan ou ki konsern travay Lasanble.

Nou ti ganny dir poudir i annan bann lezot morso rapor *TRNUC* ki pou ganny anvoye kot

Lasanble. Mon le met lo rikord ki nou pa ankor resevwar sa bann morso latab. Sa bann morso rapor. E prezan, nou napa ni *sufficient notice* pou nou al regard 300 ekek determinasyon. E mon vwar nou'n retourn bann Mosyon lo *Order Paper*.

Dezyenmman, mon met lo rikord Lasanble Nasyonal ki pandan letan ki nou pe esper sa bann *rulings*, sa bann determinasyon, in annan plizyer *meeting* zis ant Mr Michael Green, *Vice-Chairman TRNUC* e lezot Komisyoner avek *Leader Zafer* Gouvernman, e okenn *meeting* Mr Speaker.

(Interruption)

HON SEBASTIEN PILLAY

Mr Speaker, mon pe *raise* mon pwen. Mon pa'n dir ou mon pa pe... ou *ruling* mwan.

MR SPEAKER

Ou'n demann laparol pou en *point of order*. Silvouple, termin avek ou pwen, koumsa nou a kapab terminen.

HON SEBASTIEN PILLAY

Mr Speaker, mon pwen ki mon le termin avek i se ki'n annan 2 *meeting* as ki mon, mon okouran ki mon'n ganny dir. E ki enn ki mon'n vwar ki'n ganny

fer ant *TRNUC* e *Leader Zafer* Gouvernman. Me selman, nou pe sey travay pou nou anmenn en Mosyon ki Bipartizan.

Sufficient notice nou napa. Konmsi akoz mon'n met sa devan ou Mr Speaker, pou Lepep Seselwa vwar ki mannyer Lalwa Lasanble pe ganny enterprete pou en kote latab e pou lot kote latab.

Parey mon'n dir ou, ou'n fini donn ou *ruling*. Mon respekte ou *ruling*, Nou ava *deal* avek ou *ruling as and when* sa Mosyon i vin lo *Order Paper*. Me selman mon ti ava enplor ou.

MR SPEAKER

Mon'n ekout ou silvouple.

HON SEBASTIEN PILLAY

Mon ti a kontan enplor ou pou mon konnen ki desizyon ou pou pran vizavi sa bann bout rapor ki reste?

MR SPEAKER

Wi. Wi, mon pou adres ou bann pwen. Premye mon krwar pwen ki ou'n leve lo *post* ki Onorab Henrie ti mete, mon krwar sa 2 keksoz ki nou konsidere pa konparab ditou. Dan Mosyon, dan *posting* Onorab Henrie, wi mon ti regrete sa term ki ti servi. Sanmenm mon ti dir i "banal". I napa naryen ensiltan,

e mon krwar sa 2 ka pa konparab.

Lo size, lo size *TRNUC*. Wi mon'n pran serye sa rapor ki'n ganny manke, selman mon a eklersi ou poudir ou dir nou napa *sufficient notice*. Ek Mosyon ki lo *Order Paper*, nou pa pe al konsider sa bann ka reparasyon. Sa i pou vin pli tar.

E mon pe met kler poudir bann Mosyon *TRNUC* i tou senpleman lo ki mannyer Lasanble pou *deal* avek sa rapor. E donk ou pwen la I - mon pa krwar i valid akoz sa bann determinasyon ki nou pe rode i pa enplike dan Mosyon ki nou bezwen pran demen.

E lo size sa bann determinasyon; wi, mon'n fer le neserer pou tras sa bann *files* ki manke. E mon pe fer le neserer pou anvoy kot *Secretary of State* dan Biro Prezidan, pou notife li poudir la i la sa ki nou ti pe rode. E sa i a kapab ganny soumet ek Lasanble. Mon termin la...

(Interruption)

MR SPEAKER

Ou'n leve ou *point of order*! Mon termin la. Nou pou...Mon termin la. Nou pou *adjourn* e nou pran Lasanble demen *matin 9er. Adjourn.*

(ADJOURNMENT)